



## QARQARU SAYINSE ROSAANOTE MAXXAFA ONTIKKI KIFILE

*Qixxeessitinori Buuxxinorinna Silanchimma Buuxxinori:*

*Xilahuni Eeyyamo Dengele (MSc.)*

*Faanaye Kariisa Dooyyamo (BA)*

*Taaddese Guja Baraasa (MA)*

*Sisayi Sheeddiso Roorriso (MSc.)*

*Keensiisino hunna Gumulisiisino hu:*

*Xilahuni Eeyyamo Dengele (MSc.)*

*Gaamote massagaanchi: Daanieeli Xoona Wotaro (MA)*

*Gaamote Amaalaano: Legesse Burraaqa Lole (MSc.)*

*Demisse Shimellisi Gawiwa (MSc.)*

*Lawwuxaayyo Leggese Waaqo (MSc.)*

*Suudisaanchu: Tesfatsiyooni Daawiti Maddebo (BEd., BSc.)*

*Misilete Ogeessi: Antene Miliyooni Yihuni (BSc.)*



ITIYOPHIYU FEDERAALITTE  
DIMOKIRAASITTE MOOTIMMA ROSU  
MINISTERE



SIDAAMU DAGOOMU  
QOQQOWI MOOTIMMA ROSU  
BIIRO

# Galata

*Kuni maxaaifi rosunna qajeelshu finoote kaarti amanyooti hedo rosu ministere qixxeessitinoha rosu bude kaima assi'rate Sidaamu Dagoomu Qoqqowi Mootimma Rosu Biironni qixxaawinoha ikkanna qixxeessatenna attamate fulo Sidaamu Dagoomu Qoqqowi Mootimmanna Federaalete Rosu Minisitere xaphoomu rosu buuxo pirogiraame(GEQIP-E) baattino.*

*Ledoteno, maxaafa qixxeessate woxunni, mannu wolqanninna uduunnichunni, hasi'nanni taje aatenni, uurrinshansa fajjatenni, rosichonsanna egennonsa beehatenni, hattono wole babbaxxitino doogonni irkissu bissara, uurrinshuwaranna umoomi baalunkura rosu biiro galata shiqishshanno.*

© Hinkiilote Qoosso

Konni maxaafiti hinkiilote qoosso 2016 M.D Itophiyu Federaalitte Dimokiraasitte Rippaabiliike Rosu Ministerenna Sidaamu Dagoomu Qoqqowu Mootimma Rosu Biiro Jajja Ikkanna Seeraancho Hinkiilote Qoosso Agarantinote.

*Umi Attamo - 2016 M.D*

*Sidaama / Hawaasa*

<b>FOOLIISHSHO MITTE.....</b>	<b>1</b>
<b>ITOPHIYU LEELLANOWA.....</b>	<b>1</b>
1.1 Darga.....	3
1.2 Darga Kaartu aana Leellishsha.....	7
1.3 Itophiyunnita taalootunna uurrinshu teesso.....	11
1.4 Olluu gobbuwanni heewisinsiro Itophiyu darga kaartu aana .....	14
1.5 Itophiyunnihu darguwate raganna leellitannowa.....	19
1.6 Kaarta kaysanna Ji pi Esse (GPS/KRA) horoonsira.....	27
<b>FOOLIISHSHO LAME.....</b>	<b>35</b>
<b>SAYINSE HUWATA.....</b>	<b>35</b>
2.1 Sagalenna sagalete daahama amanyoote.....	37
2.1.1 Sagalete daahamara irko assitanno kifilla.....	43
2.1.2 Sagale daahate amanyooti horo.....	44
2.1.3 Sagale daahamate amanyootira assa hasiissanno qoropho.....	45
2.1.4 Sagalete daahamara kora ikktanno qarra.....	46
2.2 Way horo.....	48
2.3 Bikkaano.....	52
2.4 Wolqate buicho.....	61
2.5 Huuro.....	64
<b>FOOLIISHSHO SASE.....</b>	<b>74</b>
<b>ITOPHIYUNNITA KALAQAMU JIRO.....</b>	<b>74</b>
3.1. Itophiyunnita diilallote gade.....	77
3.1.1 Diilallote gadenna diilallote ikkito badooshshe.....	78
3.1.2 Diilallote gade kifilla.....	79
3.1.3 Diilallote gade zoonna.....	82
3.1.4 Diilallote gade qorqora.....	83
3.1.5 Qara Itophiyunnita diilallote gade wogga.....	84
3.2. Itophiyu kalaqamu jiro.....	86
3.2.1 Itophiyunniha bushshu dana .....	88
3.2.2 Itophiyunnita shiilote jiro.....	92
3.2.3 Itophiyunnita kalaqamu dubbu jiro.....	94
3.2.4 Itophiyunnita way jiro.....	99
3.2.4.1 Itophiyaho way jiroha qara qara qarra.....	100
3.2.4.2 Itophiyu garbuwanna akatansa.....	100
3.2.4.3 Itophiyunita qara way daado .....	101
3.2.5 Itophiyunnita gobba saada jiro.....	104

3.3 Itophiyunniha wolqate dana.....	109
3.4 Itophiyunniha qara qarqaru qarranna agarate deerra.....	111
<b>FOOLISHSHO SHOOLE.....</b>	<b>119</b>
<b>ITOPHIYU DAGOOMU QARQARA.....</b>	<b>119</b>
4.1 Itophiyunnita budu babbaxxa.....	121
4.1.1 Itophiyunniha qara budu assoote.....	122
4.1.2 Itophiyunnita budu kifilla.....	125
4.1.3 Qara Itophiyu afuubba maate.....	128
4.1.4 Itophiyaho horoonsi' nanni afuubba.....	131
4.2 Itophiyunnita budu dan.....	133
4.2.1 Millissannonna millisannokki donna.....	133
4.2.2 Kalaqmunnitanna mannu loosinno donna.....	134
4.2.3 Angatenni amandanninna amandanikki Itophiyu budu donna ....	135
4.2.3.1 Angatenni amandannita Itophiyunnita budu donna.....	135
4.2.3.2 Angatenni amandannikkita Itophiyu budu donna.....	141
4.2.4 Bude agarrate, qorqoratenna irkisate gashshootunna dagatewiinni agarraanni qeecha.....	143
4.3. Baadillichonna yannitte budu uurrinsha.....	145
4.4. Qara Itophiyunnita miinju kifilla.....	147
4.4.1 Giwirinnu qeecha Itophiyu miinju millimo aana .....	148
4.4.2 Itophiyu giddo leellitanno industire dana.....	148
4.4.3 Itophiyu Turiizimete dana.....	150
<b>FOOLISHSHO ONTE.....</b>	<b>156</b>
<b>WAAXA NTINOTA QARA QARA HAJO.....</b>	<b>156</b>
5.1 Echi Ay Vii/ Eedisi (HIV/AIDs) Itophiyaho.....	158
5.2 Kemikaalenna xagga seerimale horoonsira.....	163
5.3 Gawaijitanota baadillico assootubba.....	168
5.4 Moollenna hude.....	176
5.4.1 Moolletenna hudete tiro.....	176
5.4.2 Moollete koranna Itophiyinkera aana abbitanno hekko.....	177
5.4.3 Itophiyaho Moollete reqecci yitino qarqarubba.....	179
5.4.4 Itophiyinkera moolle gargaranni doogga.....	180

# FOOLIISHSHO

## MITTE

### ITOPHIYU LEELLANNOWA

#### FOOLIISHSHONNITA XAPHOOMU HEXXO

Rosaano tenne fooliishsho rossuhu gedensaanni:

- ❖ *Taalootu teessonna uurrinshu teesso mayiimma baddanno;*
- ❖ *Sayinsaawe doogga horoonsidhe dargubbanna ragansa buuxxanno;*
- ❖ *Itophiyaho qasiisote xaaddanota Soojaati Afiriku buudira afantanno gobbuwa baddanno;*
- ❖ *Itophiyu giddo afantanore qara qara dargubbanna afantannowa buuxxanno;*
- ❖ *Kaarta kayinsanninna horoonsi'nanni hayyo buuxxannonna;*
- ❖ *Ji pi Essete (GPS) mayimanna uytanno horo buuxxanno.*

### Qara qara amado

- 1.1 Darga
- 1.2 Darga Kaartu aana leellisha
- 1.3 Itophiyunnita taalootunna uurrinshu teesso
- 1.4 Olluu gobbuwanni heewisinsiro Itophiyu dargi kaartu aana
- 1.5 Itophiyunnita dargubbate raganna leellitannowa
- 1.6 Kaarta kaysanna Ji pi Esse (Gps) horoonsi'ra

## Bitima

Dargaho yaa mittu udiinnichi, manchi woy babbaxxinori leellanowaati yaate. Darga battote aana woy kaartu aana leellisha dandiinannihu taalootu teessoninna uurrinshu teessonniiti. Taalootu teesso xawissanohu mitte uurrinsha woy gobba bayycho, wolu dargi ledo amadisiinse raga kullanni harinshooti. Taalootu teesso xawisa dandiinannihu qara kompaasete birxichinna Kompaasete qaru ragi beehaachi birxicho horoonsi'neeti. Uurrinshu teesso yaa kayinni hawiittotenna uurrinshu xuruura horoonsi'ne mittu dargi teesso xawinsanni ha'rinshooti. Kaartaho yaa baattote ofolla ilaalaame, taalo baattonna way bisubba misiletenni riqimbe woraqatu aana leellinshanni malaateti. Kaartu bikkaancho yaa baattote aana noo xeertinye woraqatu aana xawisate. Itophiyu afamannota taalootu teessosi Aliyye widoonni Ertiru gobbaanni, Keeniyaho Aliyyenni afamonno, Wodiidi Galchimi wodiidoonni Wodiidi Suudane, Aliyye widoonni Aliyye Suudaanenni, Soojaati widoonni Sumaaleteninna Soojaati widoonni Jibuuti gobbaanni taalootu teessora afamanno. Itophiyunniti uurrinshu teesso baattote hallira Aliyye ragaanni 30-150 geeshsha keekiroosinna giriiniwichi meeridiyaaninna Soojaati ragaanni 330-480 geeshsha kekiroosi aanaati. Itophiyu leellannohu Aliyye Soojaatti Afriku buudiraati. Albi yannara kaarta kayinsannihu woy horoonsi'nannihu way bissanna ugaanxanni dubbu saada leellishatenna dubbu Saada noo base afate horoonsi'nanni. Xaa yannara kaayinni, karta horoonsi'nannihu mitturichi raga, xeertinye, hala'linye, fanfe, ofola w.k.l. darga buuxxateeti.

## 1.1 Darga

### Rosate Dandoo

Rosaano konne roso rossuhu gedensaanni:

- ❖ *Dargaho yaa mayyaatero kultanno;*
- ❖ *Darga woy darga xawinsanni doogo hasaabbanno;*
- ❖ *Taalootunna uurrinshu teesso badooshshe xawissanno;*
- ❖ *Kompaasete bixxe/bixxille borreessitanno.*

#### Qara qaalla

- |                     |                    |
|---------------------|--------------------|
| • Darga             | • Kaarta           |
| • Kaartu bikkaancho | • Uurrinshu teesso |
| • Taalootu teesso   |                    |

**Xa'mo:** *Dargaho yaa mayyaate?*

Dargaho yaa mittu udiinnichi, mannu woy dargu leellanowaati yaate. Darga battote aana woy kaartu aana leellisha dandinanni. Raga lamu garinni xawissanni

**Insano:**

- taalootu teesso
- uurrinshu teesso

## I. Taalootu teesso

**Xa'mo:** *Taalootu teesso yaa mayyaate?*

Taalootu teesso mitte uurrinsha woy gobba baycho, wolu dargi ledo amadisiinse raga kullanni harinshooti. Tini taalootu teesso xawissanohu mitto darga fanfesinna leellanno raginni xawisate harinshooti. Wole widooni, taalootu teesso yaa mitte uurrinsha teesso darga kaima assine wole darga xawisa dandiineemmo doogooti. Mittu dargi qarqaraho danna woy olliimma xaaddannori ledo heewisiinse kullannita teessimmasi **taalootu teesso** yinanni. Tini teesso leellishshannohu danna xaaddannota mitte gobba wole gobba, mitto qoqqowo wolu qoqqowinni woy mitte darga wole baattote amadonna way bisi ledo lawinse xawinsanni doogooti.

**Xa'mo:** *Rosaano, Taalootu teesso xawinsanni doogo affinoonni?*

Taalootu teesso xawisa dandiinannihu lame doogonniiti.

**Insano:**

- Qara kompaasete birxichootinna
- Kompaasete qaru ragi beehachi birxicho horoonsi'ne xawisa dandiinanni.


### A. Qara kompaasete birxicho

Qaru kompaasete birxichi xawisanohu udiinnichu, manchu woy baychu xaphoomu ragaati. Kuni qaru kompaasete birxichi manchi beetti barru giddo loossanno loosira jawa qeecha afi'noho.

**Qara kompaasete birxichooti yineemmori:**

- |              |                |
|--------------|----------------|
| • Wodiidi;   | • Aliyyenna    |
| • Soojjaati; | • Galchimaati. |

Kuni qara raganna barru barrunkunni taalootu teessubba  
horoonsi'neemmota xawissanno.




**Misile 1.1.** Qara kompaasete birxicho

## B. Kompaasete qaru ragi beehaachi birxicho

- Aliyye Soojjaato              • Wodiidi Soojjaato
- Aliyye Galchima              • Wodiidi Galchima

(Hani Misile 1.2 la'e)



**Misile 1.2** Qara raga leellishshanno kompaase

## Ragunniha harancho borrote xawishsha

- A=Aliyye
- S=Soojjaato
- W=Wodiido
- G=Galchima
- WG=Wodiidi Galchima
- WS=Wodiidi Soojjaato
- AS=Aliyye Soojjaato

## II. Uurrinshu Teesso (Absolute Location)

**Xa'mo:** *Uurrinshu teesso yaa mayyaate?*

Uurrinshu teesso yaa kayinni hawiittotenna uurrinshu xuruura horoonsi'ne mittu dargi teesso xawinsanni harinshooti. Baattote aanaanni haawiitaaamunna uurrinshu xuruuri hedotenni calla worroonniho ikkininna baattote aananni illetenni dileellannoho.

### Lawishshaho:

- |                         |                          |
|-------------------------|--------------------------|
| • baattote ofolla gara; | • heeshshoonda gara      |
| • way bissa;            | • bushshu dananna w.k.l. |

Uurrinshate teesso leellishshannohu mitturichi raga laatituudetenninna longituudete xuruurinniiti. Tini teesso xawissanohu mitturichita addu teessoositi.

## Rosiishsha 1.1

**Konni woroonni noo xa'muwara harancho dawaro borreessitine qolle.**

1. Dargaho yaa mayyaate?
2. Taalootu teesso yaa mayyaate?
3. Kompaasete qara bixxile kulle.
4. Arriishsho fultannohunna e'annohu kompaasete hiiko ragaanniiti?
5. Taaloootunna uurrinshate teesso badooshshe xawisse.
6. Kompaasete cinaancho beehaache borreesse.

## 1.2 Darga Kaartu Aana Leellishsha

### Rosate Dandoo

Rosaanno konni rosi gedensaanni:

- ❖ *Kaartaho yaa mayaatero kultanno;*
- ❖ *Kaarta horoonsidhe raga leelliishshanno;*
- ❖ *Kaartu horore hasaabbanno;*
- ❖ *Baattote aana noo xeertinye woraqatu aana worranni doogo xawissanno;*
- ❖ *Baattote aana nooti mitte kiilo meetire woraqatu aana me'e saanti meetire ikkitanoro xawissanno;*
- ❖ *Angatenni kaayinsoomo kaartinna foto kaayinsoomo kaarti mereero noo badooshshe kultannonna*
- ❖ *Angate kaarta kayisate maayi hasiisannoro bade xawissanno.*

### Qara qaalla

- Kaartogiraafere
- Angate Kaarta kaayisa

**Xa'mo:** *Kaartaho yaa mayyaate?*

Kaartaho yaa baattote ofolla ilaalaame, taalo baattonna way biso misiletenni riqimbe woraqatu aana leellinshanni malaateeti. Kaarta loosanno ogeessa **kaartogiraferete** yine woshshinanni.

## Kaartu horo


Xa'mo:

1. Rosaano kaartu horo maati?
2. Rosaano misile 1.3 la'ine manchunna kaameelu noo raga kompaasete raga horoonsidhine xawisse.

**Kaartu aanno horo babbaxittinote.**

**Insano:**

- mitte gobba targubba leeltanno raga leellishshate;
- addi addirichi afamano darga buuxisiisate;
- baattote aanna noo ilaalla, taallo baatto, Way bisonna addi addi uurrinshuwa leellishshate
- baattote hala'linye afate (misile 1.3 la'e)



**Misile 1.3.** Manchunna kaameelu raga

### Kaartu bikkaancho (scale map)

**Xa'mo:** *Kaartu bikkaancho yaa mayyaate?*

Kaartu bikkaancho yaa baattote aana noo xeertinye woraqatu aana xawisate.

Kuni kaartu bikkaanchi leellishannohu mageeshshi geeshsha halaalanya baattote xeertinye kaartu aana ajinshe borreessinannirooti. Kaartu bikkaanchinni mitte saanti meetire mitte kiilo meetirenni battote aana riqibbanno. Tini leellishshannohu kaartu aana nooti mitte saanti meetire baattote aana mitte kiilo meetire riqibbannotaati.

### Angankenni kaarta kaysa (Sketch Map)

**Xa'mo:** *Angankenni kaarta kaysate yaa mayyaate?*

Mitturichi biso kaarta angankenni calla misilsate yaate. Kayinseemmo huno irsaase horoonsi'ne qaraamo birxicha afidhino biirenni maalate assatenniiti. Angatenni loonsoonni kaarti raganna darga woy baycho leellishannonkeha ikke foto kayinsoonnihunni rooranno. Korkaatuno, angatenni kaarta kayinseemmo yannara hasi'noommo baycho gudinse leellisha dandiineemmo huraati.

**Xa'mo:** *Kaarta kaysate hasiisanno udiinnichi maati?*

**Kaarta kayinsannihuno angankenni ikkanna kaarta kaysate hasiisannori:**

- umisi mixonna hala'linyu hee'ra
- amadonna qasiiso bada
- xuruura, biire, irsaase, laaphise, addi addi kuuli noose paarkerenna woraqata.

**Kaarta kaysate balaxote aantetenni assa hasiisannori.**

- kaarta kayinseemmo woyte albiidonna midaado heqiche bikkanchinni bikka;
- horoonsi'neemmo woraqati amado bada;
- horoonsi'neemmo woraqati amado aana malaate assanna
- konni aleenni kulloonniire qixxeessinihu gedensaanni kaartu seendillenna hala'linye gumula hasiissanno.

**Xa'mo:** *Kaarta kayinseemmo woyte woraqatu hala'labye bikka hasiissannohu mayyraati?*

**Kaarta kayinseemmo woraqata bikkineemmu:**

- kaarta kaysate injo kalaqateeti
- nabbawate injo kalaqateeti
- horoonsirate injo kalaqatenna
- hala'labyesi xawisateeti.

**Rosishsha 1.2**

**I. Aante shiqqinno xa'mora halaaleho woy kaphoho yitine dawarre**

1. Kaarta rossanno rosaano kaartogiraferete yinanni.
2. Mitte kiilo meetere woraqatu aana nooti mitte saanti meetere baattoote aana riqibbanno.
3. Kaartu aana mitte gobba ikkinnina gobbate giddo noo qoqqowo leellisha didaandiinanni.

**II. Aante noo xa'mora taalo dawaro doortine qolle.**

1. Kaarta kayinsaanni woraqata bikkinnihu?  
A. Woraqata qolle horoonsirate      B. Nabbawate injo kalaqate  
C. Kaarta kaysate injo kalaqate      D. B- nna C dawarote
2. Angatenni loonsoonni kaarti foto kayinsoonni hunki roorannohu?  
A. Biifado ikkinohuraati  
B. Yanna gudanoikkihuraati  
C. Hasii'noommo bayicho gudise leellishshanohuraati  
D. Umisi mixonna hala'linyu noosihuraati
3. Lame saanti meetere woraqatu aana \_\_\_\_\_ kiilo meetere baattote aana riqibbanno.  
A. 2      B. 20      C. 2000      D. 200

### III. Aante shiqqino xa'mora harancho dawaro borreesse.

1. Kaartu horo borreesse.
2. Kaarta kaysate hasiisannonkerichi giddonni shoole borreesse.
3. Tonne saanti meetire kaartu aana nooti baattote aana me''e kiilo meetire ikkitanno?
4. Baattote aana nooti 1.5 kiilo meetere woraqatu aana riqiwanturo me'e saanti meetire ikkitanno?
5. Woraqatu aana 5 saanti meetire battote aana me'e kiilo meetire ikkitanno?

#### 1.3 Itophiyunnita Taalootunna Uurrinshu Teesso

##### Rosate dandoo

Rosaanno konne roso rossuhu gedensaanni:

- ❖ *Itophiyunnita taalootunna uurrinshu teesso mayimma badde xawissanno;*
- ❖ *Gobbanketa taalootu teesso tittirte kultanno;*
- ❖ *Gobbanketa uurrinshu teesso kultannonna*
- ❖ *Afiriku buudira afantanno gobbuwanni heewisse Itophiyunnita taalootu teesso xawissanno.*

##### Qara qaalla

- |                    |                   |
|--------------------|-------------------|
| • Taalootu teesso  | • Afiriku buuda   |
| • Uurrinshu teesso | • Qasiiso gobbuwa |

##### Gobba

##### Xa'mo:


1. *Itophiyu giddo meu qoqqowi afamanno?*
2. *Gobbatte yaa mayyaate?*

Gobbate yaa wolambinaatise, ayirinyise agarammoti wolootu gobbuwanni badannose danni, woga, afuu, amma'nonna w.k.l xaaddannorinna mimmitu ledo sumuu yite heedhano daga amaddinotenna umise gashshooti noosete.

Rosaano, umi kifilenni shoole kifle geeshsha ollaa, worada, zoonenna qoqqowo rossinooni. Olluubate gambooshshi woradda, woraddate gambooshshi Zoone, Zoonete gambooshshi qoqqowo ikkannota rossinooni. Qoqqowu gambooshshi kayinni gobba ikkanno.

#### Itophiyinke giddo afantanno qoqqowubbanna quchumu gashshootta:

Tigiraye, Affaare, Amaara, Oromiyu, Suumaale, Gaambeela, Sidaama, Harare, Beenishangule Gumuze, Wodiidi Daganna Dagooma, Addisaawu quchumi gashshootinna Dire Daawu quchumi gashshooteeti (misile 1.4 la'e).



**Misile 1.4** Itophiyu giddo afantanno qoqqowubba leellishshanno kaarta

Ninke hee'noommo gobba Itophiyaho yine woshshinanni. Gobbanke duuchu qoqqowi gambooshsheeti. Itophiyu Afiriku gobbara Soojaati ragaanni Soojaati Afiriku buudira woy qaccera leellitanno gobbaati. Gobbankehu xaphoomu halalinyi 1,108,000 kaare kiilo meetireeti. Kunino Afrikaho afantannori hala'lado gobbuwa ledo gaammannise gede assannoseha ikkanna, Kalqete deerrinni 28<sup>ki</sup> hala'lado gobbaati. Itophiyu gobba hala'ladote yinannisehu Aliyyenni kayse Wodiidi geeshsha noo seendilise 1290 kiilomeetire ikkanna Soojaati Galchimi qasiiso geeshsha noohu 1,666 kiilomeetire ikkasenniiti. Tenne fooliishhora taalootu teessonna uurrinshu teesso yaa mayyaatero rossinoonni qaangannita ikkitanna, xa kayinni Itophiyunnita uurrinshannitanna taalootu teesso rossinanni.

### A. **Itophiyunnita Taalootu Teesso**

**Xa'mo:** *Itophiyu taalootu teesso yineemmor ihiikkureeti?*

Aleenni la'nummonte gede taalootu teesso yaa mitto baycho wolubaychinni lawishshaho baattotenni woy way bisinni ledora lawinse xawinsaanni doogooti. Taalootu teessooti yinanni tiro ragunni xawisa dandiinannihu kompaasete qaru birxichinniiti. Lamu qaru kompaaseete birxichi mereero nooha kompaasete birxichi beehaache yinnanniha ikke addu teessimma xawisanno.

**Itophiyu afamannota taalootu teessosi:**

- Aliyye widoonni Eritiru
- Keeniyaho Aliyyeenni
- Wodiidi Galchimi wodiidoonni Wodiidi Suudaane
- Aliyye widoonni Aliyye Suudaane
- Soojaati widoonni Sumaale
- Soojaati widoonni Jibuuti

### B. **Itophiyunniti uurrinshu teesso**

**Itophiyunnita uurrinshu teesso baattote hallira:**

- Aliyye ragaanni 3<sup>0</sup>-15<sup>0</sup> geeshsha keekiroosinna giriiniwichi meeriiidiyaani
- Soojaati ragaanni 33<sup>0</sup>-48<sup>0</sup> geeshsha kekiroosi aanaati.

### Rosiishsha 1.3

#### I. Aante shiqqinno xa'mora harancho dawaro borreesse.

1. Taalootunna uurrinshu teesso badooshshi maati?

2. Itophiyunnihu Afiriku buudira hiikko afamanno?

#### II. Aante shiqqinno xa'muwara fano darga wonshe.

1. Itophiyu xaphoomu hala'linyi \_\_\_\_\_ kaare kiilomeetereti.

2. Itophiyu gobba seendile Aliyyenna kayisse Wodiidi geeshsha 1,108,000 kaar  
kiilomeetereti, Soojaati Galchimi qasiiso geeshsha noohu kayinni \_\_\_\_kiilo  
meetire ikkanno.

### 1.4. Olluu Gobbuwanni Heewisinsiro Itophiyu Darga Kaartu Aana

#### Rosate dandoo

#### Rosaano konni rosi gedensaanni:

- ❖ *Itophiyu ledo qasiiso afidhinori hiiitte gobbuwaatiro kultanno;*
- ❖ *Afiriku buudira afantanno gobbuwa ikkite gobbankenni ledo qasiiso xaaddannore xawissanno*
- ❖ *seendillinsa amadonni Afiriku buudira afantanno gobbuwa mittunni shoolu geeshsha noonsa aantenni borreessitanno.*

#### Qara qaalla

- |                  |                 |
|------------------|-----------------|
| • Olluu gobbuwa  | • Duumo baara   |
| • Daddalu furcho | • Arawete baara |

Itophiyu gobba Soojaati Afiriku buudira afantano gobbuwa giddo mitte ikkite leellitanno gobbaati.

**Xa'mo:** Rosaano, Afiriku buuda yine mayra su'ma uynoonni?

Afriku buuda yaanno su'ma uynoonnihu Afiriku kaarti offollasi suudi Soojaati ragi widoonni buudu suude lawannohuraati. Afiriku onte cinaancho beehaache afirino.

**Insano:**

- Aliyye
- Wodiido
- Soojaato
- Galchimanna
- Mereeri Afirikaati.




**Misile 1.5.** Ollu gobbuwanni heewisinseenna Itophiyu dargi kaartu aana

*Buicho: Afiriku kaarti buichonni.*

**Xa'mo:** Afiriku buudi afamanno hu hiikkiIdi ragiraati?

Afiriku buudi afamanno hu Soojaati Afiriki birxichiraati. . Afirkunnu hu buudu leellishshanno hu Arawete baarati. Kunni Afiriku buudi qasiisso xaadanno hu daddaallu furchonna (Gulf of Aden) duumu baari (Red sae) Aliyye Soojaati widoonni na Hindi wuqiyanoose (Indian ocean) Wodiidi Soojaati widoonniiti. Afiriku buudira afantanno gobbuwa mimmitu ledo mittimatenni qasiiso xaaddannoreeti. Sumaalete gobba wo'munni wo'ma Hindi wuqiyanoose ledo qasiiso xaaddanno.



**Misile 1.6.** Satellitete foto Afiriku buudi gaamo hindi Wuqiyanoose ofolla leellishshanno

**Xa'mo:** Soojaati Afirikira afantanno gobbuwa me"ete? .

Soojaati Afirikira (Afiriku buudira) afantanno gobbuwa shoolete. Insa giddonni mittu Itophiyaho, wolootu sasu Jibuute, Ertiranna Sumaalete gobbaati. Umikkiti hala'lado gobba Sumaale ikitanna shiimiiditi kayinni Jibuutete.

**Xa'mo:** Soojaati Afiriki buudira afantanno gobba ledo qasiisotenni  
xaaddanno gobbuwa hiittenneeti?

Afirku buudira afantanno gobba ledo qasiiso afidhinori sase gobbuwa no.

**Insano:**

- Aliyye Suudaane
- Wodiidi Suudaane
- Keeniya

Suudaane Afirku buudira Itophiyaho Galchimaanni afantanno. Keeniyu kayinni Itophiyaho Wodiidoonni danna (qasiiso) xaaddanno. Itophiyu onte (5) gobbuwa ledo xaadanno woy gutamanno qasiiso seendilli 5,260 kilomeetire ikkanna kuri giddonni seeda qasiiso afidhinoti Suudaanete gobbaati. Harancho qasiiso afidhinoti kayinni Jibuutete gobbaati.

**Shae1.1.** Itophiyu ledo qasiisote xaaddanno gobbuwa qasiisote halalinyenna seendille leellishshanno shae.

A.K	Qasiiso gobba su'ma	Halal'inyu kaare kiilo meetire (km <sup>2</sup> )	Qasiisote seendille (km)
1	Aliyye Suudaane	1861484	744
2	Wodiidi Suudaane	644329	1299
3	Sumaale	637,657	1640
4	Keeniya	580,000	367
5	Eritira	117,600	1033
6	Jibuute	23,200	342

**Shae1.2.** Afirku Buudira (Soojjaati Afirikira) afantanno gobbuwanna qara quchummansa.

T.kiiro	Gobbuwa	Qara quchummansa
1	Itophiya	Addisaawaho
2	Sumaale	Muqaadisho
3	Ertira	Asimara
4	Jibuute	Jibuuti

Kompasete qara bixxille kaa'litannonkehu qara quchummansa raganna Afiriku buudira afantanno gobbuwa buuxisateeti.

**Lawishsho:**

- Addisaawu quchumi afamannohu Asimaru quchumira Wodiidoonni;
- Galchimi widoonni Jibuutinninna
- Aliyye widoonni Muqaadishotenni.

**Rosiishsha 1.4**

**I. Aante shiqqino xa'mora halaaleho woy kaphoho yitinnanni dawarre.**

1. Afiriku buudira afantanno gobbuwa mimmitu ledo qasiiso xaaddannoreeti.
2. Jibuuti gobba wo'munni wo'ma Hindi Wuqiyaanoose ledo qasiiso xaaddanno.
3. Asimarunnihi qaru quchumi Ertiraho.
4. Addisaawu quchumi afamannohu Aliyye ragi widoonni Muqaadishoteti.

**II. Aante noo xa'muwara taalo dawaro doortine qolle.**

5. Afiriku kaarti ofollasi suudi \_\_\_\_\_ ragi widoonni buudu suudi noosi.  
A. Wodiidi   B. Soojaati   C. Aliyye   D. Galchimi
6. Afiriku buudi leellishanohu \_\_\_\_\_ ti.  
A. Daddalu furcho                      B. Hindete Wuqiyaanoose  
C. Arawete baara                        D. Arawete baatto
7. Mitto agurranna woloottu Soojaati Afiriki buudira afantanno gobbaati  
A. Keeniya   B. Itophiya   C. Jibuute   D. Sumaale

8. \_\_\_\_\_ Soojaati ragaanni afantanno gobbuwa giddo umikki hala'lado gobbaati.  
A. Itophiyu      B. Ertiru      C. Sumaale      D. Jibuuti
9. Wodiidi Suudaane Afiriku buudira Itophiyaho Galchimaanni afantanno;  
Keeniyu kayinni Itophiyaho \_\_\_\_\_ danna xaaddanno.  
A. Galchimaanni    B. Wodiidoonni    C. Soojaatoonni    D. Aliyyeenni
10. Itophiyu ledo harancho qasiiso nooseti \_\_\_\_\_ gobbaati.  
A. Keeniyu      B. Jibuuti      C. Suudaane      D. Ertiru
11. Itophiyunniti onte gobbuwa ledo xaaddanno woy gutamanno seendilli \_\_\_\_\_  
kiilo meetire ikkanno.   A. 1640   B. 5260   C. 5925   D. 1033

### III. Aante shiqqinno xa'mora harancho dawaro qolle.

12. Afiriku buudira afantanno gobbuwa Ertiriyu ledo qasiiso afidhinore borreesse.

## 1.5. Itophiyunniha Dargubbathe Raganna Leellitannowa

Rosate dandoo:

Rosaano konne roso rossuhu gedensaanni:

- ❖ Haawittaamonna uurrinshu xuruura horoonsidhe dargubba Itophiyu kaarti aana leellishshanno;
- ❖ Itophiyu giddo afantanore jajjabba ilaalla, garbanna lagga kultanno;
- ❖ Itophiyunnita dhaggetenna woggate donna leellitannowa kultannonna
- ❖ Itophiyu giddo afantanno kalaqamu jiro kultanno.

### Qara qaalla

- |                     |                    |
|---------------------|--------------------|
| • Ilaalaame baatto  | • Baattote lixamme |
| • Xeichaame baatto. | • Lixxinno baatto  |
| • Laggate boonna    |                    |

**Xa'mo:** *Itophiyunnita babbaxxitinota baattote ofolla kulle.*

Itophiyu leellannohu Aliyye Soojaatti Afiriku buudiraati. Itophiyu afamannohu qiidadonna iibbado baattote halli mereero 3<sup>0</sup> Aliyyenna 15<sup>0</sup> Aliyye laatituudera 33<sup>0</sup> Soojaatinna 48<sup>0</sup> longituuderaati.

Itophiyaho babbaxxitinno baattote ofolla noose. Hakkurino,

**Insano:**

1. Ilaalaame baattooti
2. Lixxino baattooti
3. Xeichaame baattooti

Tini baattote ofolla babbaxitino suude afidhanno gede kora ikkinoserichi:

Lolahu, baattote giddoydi millimmo, iibbillunni fulanno ruqani, qara qara koraati

**1. Ilaalaame baatto**

Ilaalaame baattote ofolla baaru gaxinni 1000 meetire luphi yite leellitanno dargubbaati. Itophiyunniti ilaalaame baatto wole Afiriku gobbuwa ledo heewisiinse la'niro tullichaamenna gottiima gobbaati. Konni kaimini, gobbanke Soojaati Afiriki heelicho yaamantanno. Gottiima Itophiyu baatto 40 anga ikkitanno. Tenne gottiima baatto qarqara sase qara gaamora gaammanni.

**Insano:**

- A. Aliyye ilaalaame gottiima dargubba;
- B. Wodiidi galchimita ilaalaame gottiima dargubbanna
- C. Wodiidi Soojaati ilaalaame dargubbaati.

### A. Aliyyeha ilaalaame gottiima darga

**Xa'mo:** *Itophiyu giddo afantanno ilaalaame dargubba mereerinni jawiidi ilaali hiikkonneeti?*

Tini ilaalaame dargubba Tigirayete tullo diramme, mereerimu Aliyye ilaallanna Shawwa tulluwa hanqaffanno. Itophiyaho hojjatenni umiki ilaali **Raasi-Daashiniiti**, afamannohuno tenne gottiimma baattora Amaaru qoqqowi giddooti. Seendilunni baaru gaxi aleenni 4620 meetire ikkanno.

### B. Wodiidi Galchimita ilaalaame dargubba

Wodiidi Galchimiti ilaalaame dargubba Gaamonnihanna Konsonniha ilaalu diramme, Maaji-korma ilaala, Jimmu ilaalaame dargubba, Benishanguligumuze ilaalaame dargubba amaddanno. Gaamo ilaalaame baatto aana afamannohu Guuge ilaali seendilli baaru gaxi aleenni shoole kumenna lame xibbe meetireeti (4200m).

### C. Wodiidi Soojjaatita ilaalaame dargubba

Tini ilaalaame dargubba afantannohu Baale, Arsinna Sidaamu qoqqowi giddo luphi yitiwo baseraati. Baale ilaali aana afamannohu Tulu Diimtu ilaali seendillunni umikkiha ikkanna, Itophiyaho afantanno ilaalla giddonni Raasi Daashininni aane layinki ilaalaati. Hojjassino baaru gaxi aleenni 4377 meetireeti.

Itophiyu giddo afantannoti ilaalaame baatto jawa xeena afi'rasenna kainohunni, laggate bu'a kalaqamara kaima ikkitanno. Tenne baatto ofolla qarqarrara lowo xeeni hee'rannohura baatto lolahunninna daadanno wayinni kainohunni xeichaame suude afidhanno.

**Shae. 1.3.** Itophiyaho 4000m aleenni hojja noonsa ilaallanna afantannowa

A.k	Ilaallate su'ma	Meetirete	Afamanno darga
1	Raasi Daashi	4620	Aliyye gottiima darga
2	Legedda	4532	Aliyye gottiima darga
3	Meyimbeero	4472	Aliyye gottiima darga
4	Abba-Yaareedi	4462	Aliyye gottiima darga
5	Inaalo	4480	Aliyye gottiima darga
6	Lifau lezeri	4456	Aliyye gottiima darga
7	Baahiito	4437	Aliyye gottiima darga
8	Mesuriya	4360	Aliyye gottiima darga
9	Guna	4281	Aliyye gottiima darga
10	Raasi-Birehaanu	4190	Aliyye gottiima darga
11	Cooqi	4100	Aliyye gottiima darga
12	Qolo	4300	Aliyye gottiima darga
13	Laalibela	4276	Aliyye gottiima darga
14	Abune-Yooseefi	4201	Aliyye gottiima darga
15	Abbiyye meeda	4154	Aliyye gottiima darga
16	Guugge	4200	Aliyye gottiima darga Wodiidi Soojaati
17	Kaakka	4180	Aliyye gottiima darga Wodiidi Soojaati
18	Baadda	4139	Wodiidi Soojaati
19	Cilaalo	4039	Aliyye gottiima darga
20	Baatu	4307	Wodiidi Soojaati
21	Tullu Diimtu	4377	Wodiidi Soojaati

## 2. Lixxino targubba

Tini baatto lamu gottiimu ilaalaammu targubba mereero leellannohu seendaanna lagimma afidhino targubbaati. Itophiyu giddo afantannota lixxino targubba lamewa gaammanni. **Insano:**

- A. Laggate boonnanna
- B. Baattote lixamme

## A. Laggate boonna

**Xa'mo:** *Laggate boonnanni kalaqantinoti Itophiyinke giddo jawiidi booni hiikkonneeti?*

Tini lagga kaiminsanni ka'e wororricho bobbakke hadhanno woyte bushsha hoshoooshatenni boonnanna bobbooddaame baatto kalaqqanno. Tini boonna Seeda yanna keeshshitu gedensaanni lixxino dargubba kalaqantanno gede assitanno. Tenne harinshonni kalaqantino boonna laggate boonna yine woshshinani. Itophiyu giddo laggate hoshoonshenni kalaqantino boonna giddo jawiidihi **Abbay** booni mitto ikkana boonate hojjano sase kiilo meetireeti(3Km).

## B. Baattote lixamme

**Xa'mo:** *Itophiyunniti baattoote lixamme kalaqantannohu may korinniiti?*

Baattote lixamme kalaqantannohu baattote giddoydi hembeelamme kaiminni ullate millimilonnee. Tini ikkito baattote gobbaydi suudi aana lame gulantaame dadhamme kalaqantanno gede assitanno. Tenne dadhame mereero noo baatto lixxuro baattote lixamme yine woshshinanni. Gobbanketi baattote lixamme tenne doogonni kalaqantinote.

Itophiyaho baattote lixammenni jawiidihi soojjaati Afiriki lixamme biso ikke gobbankera wodiidi galchiminni kayse aliyye soojjaati geeshsha lamewa beekke sa'anno.



**Missile 1.7** Itophiyu baattote lixxame

**Xa'mo:** *Itophiyunniti baattote lixamme ruukkitannohunna hala'litanohu  
hiikkunni ragaanniiti?*

Itophiyunniti baattote lixamme Wodiidi Galchimi ragaanni ruukkado ikkite, Aliyye Soojjaati widoonni kayinni hala'ladote. Konni qarqarira ge'inokki baattote giddoydi ruqani (active volcanic eruption) heerasinni baattote milimillo woy shafamme leellitannowaati. Konni qarqarira afantanno garbuwa baattote millimillonni kalaqantinno garbuwaati. **Insano:**

- Mereerimu ziway garba
- Abbaayyu garbi
- Laanganno garbi
- Shaala garbi
- Hawaassi garbanna w.k.l.

### **3. Xeichaamma dargubba**

**Xa'mo:** *Itophiyu giddo afantanno xeichaamma dargubba beehaache ikkitinore  
borreesse.*

Itophiyaho baaru gaxi 1000 meetire woroonni ikkitino dargubba baala xeichaame dargubba yine woshshinanni. Kuni dargi iibadonna moola ayyarete gade noosih. Afantohunno, Itophiyaho qaccete qarqarira ikkite sasewa gaamantanno.

**Insano:**

- A. Galchimaanni leellitanno xe'a baatto
- B. Wodiidi Soojaati widoonni leellitanno xeichaame baatto
- C. Awaashinna Afaarete leellitanno xeichaame baatto

**A. Galchimaani leellitanno xe'a baatto**

**Xa'mo:** *Galchimiidi xea baatto giddo afantanno xeichaame dargubba kulle.*

Galchimaaanni leellitanno xea baatto Itophiyunna sudaanete dannirra Aliyyeenni kayse Wodiidi ragira leellitannoreeti. Giddonsano babbaxxitinnoti xeichaame dargubba amadinno.

**Insano:**

- Tekeze
- Baaro
- Abbay-denaaderi
- Angerbina.
- Akoobo

Akoobonna Baaro xeichaame baatto iibbadonna moola ayyarete ikkito affidhino qarqara ikkiturono qunfe wolootunni baxxitanno.

**B. Wodiidi Soojaati Widoonni leellitanno xeichaame baatto**

**Xa'mo:** *Wodiidi Soojaati xeichaame baattora hiittoo ayyarete gade noo qarqaraati?*


Tini xeichaame dargubba afantannohu Itophiyaho lixxino baatto giddooti. Kuni saeno gobbatte deerrini afantanno xe'anni duucha koofficho ikkanna baaru gaxi woroonni 116 meetire ikkannohu Kobaari (Daalooli) lixxino baatto afantannohu konni xeichi giddooti.

Gobbanketi xeichaamma dargubba iibbadonna moola ayyarete gadeetinna mannu sae sae xerri yee hee'ranno qarqaraatinna manchi beetti saada ce''e hee'ranno (teesanno) dargaati.

### C. Awaashinna Affaarete leellitanno xeichaame baatto

**Xa'mo:** *Itophiyu giddo jawiiditi xeichaame baatto afantannohu hiikkunni qoqqowiraati?*

Tini xeichaame baatto afantannohu Aliye Soojaati Afiriki qacceraati. Jawiiditi Afirikunniti xeichaame baatto afantannohu, Itophiyu giddo Jibuutete gobba muleeeti.



### Rosiishsha 1.5

#### I. Aante noo xa'mora halaaleho woy kaphoho yitine dawarre.

1. Baaru gaxi aleenni 1000 meetire luphi yee leellanno baycho, xeichaame baatto yinanni.
2. Itophiyu giddo jawiidi ilaala Tullu Diimitu yinanni.
3. Itophiyu giddo laggate hoshoonshenni kalaqantino boonna giddo Abbayi booni . afamanno.

## 1.6. Kaarta Kaysanna Ji pi Esse (GPS) horoonsira

### Rosate dandoo

#### Rosaano konni rosi gedensaanni:

- ❖ *Kaartu horo tittirte xawissanno;*
- ❖ *Kaarta kaysate aante badde borreessitanno;*
- ❖ *Kaarta loose horoonsi;ra kultanno;*
- ❖ *Ji Pi Esse (GPS) yaanno qaali mayimma xawissanno;*
- ❖ *Ji Pi Esse uytanno horo xawisse kultannonna*
- ❖ *Ji Pi Esse horo'nsidhe mittu baychi raga xawissanno.*

#### Qara qara qaalla

- |   |   |
|---|---|
| <ul style="list-style-type: none"><li>• Kompaase</li><li>• Kuula</li><li>• Ugaaxa</li></ul> | <ul style="list-style-type: none"><li>• <i>Ji Pi Esse GPS</i></li><li>• Reesho(Ratio)</li><li>• Kalqe</li></ul> |
|---|---|

**Xa'mo:** Albi yannara kaarta horoonsi'nannihu mayirati?

Albi yannara kaarta kayinsannihu woy horoonsi'nannihu way bissanna ugaanxanni dubbu saada leellishatennna dubbu Saada noo base afate horoonsi'nani. Xaa yannara kayinni kaarta horoonsi'nannihu mitturichi raga, xeertinye, hala'linye, fanfe, ofola w.k.l darga buuxateeti

#### Kaarta kayinsanni woyte afa hasiissannori:

1. Kaartu amado
2. Kaartu bikkaancho
3. Kompaasete raga
4. Kuula, malaate
5. loosaminno barra borreessa

## 1. Kaartu amado

Aye kaartano loosate korkaatu noosiha ikke umisi su'ma afi'rino. lawishshaho: Itophiyu kaarti leellishshannohu dagoomu daa"atote baycho, Itophiyu Garbuwa, Lagga w.k.l.

## 2. Kaartu bikkaancho

Kaartu bikkaanchi baattote aana noori ofolla woraqatu aana ajinshe malaate leelishate kaa'lannonke. Kaartu bikkaanchi sasu daninni xawinsanni.

### Insano:

- Kaartu bikkaancho qaalunni xawisa
- misiletenni xawisanna
- Reeshotenni xawisa

## 3. Kompaasete Raga

Kompaase mitturichi baycho woy raga hiikkaanni afamannoro leellishshanno.  
**Lawishshaho, Kompaasete birxe:**

- Aliyye/raga
- Soojaati/raga
- Wodiidoi/raganna
- Galchimi raga noowa bande xawisate kaa'litanno.

## 4. Kuulu malaate

Kuulu malaati kaarta nabbawate horo aannoha ikke, kaartu giddo noo kuula woy malaate addinni bande qara xawishsha uynanni doogooti.

## 5. Kaartu loosamino barra

Kuni leellishshannohu kaarta albi yannahaa, xaa yannahanna albilicho yannahaa heewisiisate kaa'lanno.

### Kaarta kaysate ha'runsinanni aante:

1. Kaarta kayinsanni qarqara bada
2. Kaarta kaysate hasi'noonnita qara base bada
3. loonsanni qarqari quchuma bada
4. qara hasatto bayichi raga bada
5. halaalanya hasi'noonniricho ikkasi buuxanna kuula buura.

### Ji Pi Esse

#### Xa'mo: *Ji pi Esse (GPS) yaa mayyaate?*

GPS yaa ingiliizete Afiinni (Global Position System) yaano qaale riqibbannota ikkite kalqete baatto ofollase gara leellishanno udiinnichooti. GPS/KRA yaa kalqete nooricho saatalaytete mashalaqqe ho'roonsi'ratenni teessonna addi addi millimillo yannatenni xawisanno uduunnichooti. Mittu udiinichi woy manchi beetti hiikkinni kae hiikkira millisanni nooro ragunninna teessotenni xawisate horo aanno udiinichooti. GPS/KRA kalqete baatto offolla gara saatalaytetenni massagamatenni ofollase garanna afantannowa addu teesso xawissate horoontsi'nanni. Qoleno, ayewano wora woy horoontsi'ra dandiinanni.

GPS/KRA kaartu qasiiso badate kaallitanno, mittu ollii qasiiso badate, mittu woradi woy zoonete qasiiso badate woleno konne labbino horo uytanno. GPS/KRA babbaxitino millimillo assanno udiinni aana horoontsi'ra dandiinanni. Lawishshaho, kaameelu, xexxerrisu, mobaylete aana, yowolute aana, Ayyarete buuwanno horophillinna jettete w.k.l. aana worre afamannowa, rankesinna yanna amanyootunni horoontsi'nanni gara bikkate horo uytanno.

### GPS/KRA uytanno horo

#### Xa'mo

1. *Rosaano, qarqari'nera GPS/KRA horoonisi'ratenni xawisa dandiinanniri maattro tittirtine xawisse?*
2. *Ji Pi Esse uytanno horo giddo sase borreesse?*

## GPS/KRA uytanno horo garinni ontewa gaamanni.

- Dargu leellannowa xawissanno (location) - Dargubbate ofolla xawissate horo uytanno.
- Millimillo massagate ogimma (Navigation) – way giddo hodhishshira horo uytanno. **Lawishsha:** Yowolo ooffannori xaphoomu millimillo buuxate GPS/ KRA horoonsidhanno; mitte basenni wole base harate horo uytanno, w.k.l.
- Haruma (Tracking) ayerichi ha'rumanna millimillo qorqorate, malaatta qorqorate, w.k.l horo uytanno.
- Kaarta kaysate horo (Mapping): kalaqamu kaarta kalaqe loosate horo uytanno. **Lawishsha:** Jaddo loonsanni haruma afatenna mitte gobba woy kalqete kaarta kalaqe loosate
- Yanna bikkunni horonsirate (Timing): yanna amanyootunni horoonsi'nanni gara leelishshanno. **Lawishsha:** kaameelu hodhishsha, xexxerrisu hodhishsha, shalleettete hodhishsha, w.k.l ranke bikkate GPS/KRA horo uytanno.

### Rosiishsha 1.6

1. *Kaarta kayinsanni woyte afa hasiissannori maati?*

2. *GPS/KRA may horo uytannonke?*

## Fooliishhote Xaphishsha

- Dargaho yaa mittu udiinnichi ofolla leeltannowa xawisanno.
- Darga lame doogonni xawisa dandinanni Insano: Taalootunna Uurrinshu teessooti.
- Taalootu teesso xawissannohu mitto uurrinsha baycho kaima assine wole baycho xawinsanni doogooti.
- Uurrinshu teesso kayinni haawiittotenna uurrinshu baattote aani xuruura hedotenni horoonsi'ne mittu dargi teesso xawinsanni doogooti.
- Kaartaho yaa baattote ofolla gara way bisonna dagoomu daa"atote baycho misiletenni riqimbe woraqatu aana leellinshanni doogooti.
- Kaarta kayissanno ogeeyye Kaartograaferootaho yinne woshshinanni.
- Kaartu bikkaancho yaa baattote aana nooha xeertinye woraqatu aana ajinshe xawinsanni hayyooti.
- Itophiyu taalootu teesso garinni leellannohu Aliyye Wodiidinni Ertiru Gobbanni, Wodiidoonni Keeniyu gobbaanni, Wodiidi Galchimaanni Wodiidi Suudaanenni, Soojaatoonni Sumaalete gobbaanni, Soojaati widoonni Jibuuti gobbaanni, Aliyyeenni Aliyye Suudaanenni taalootu teesso noosi.
- Itophiyunniti uurrinshu teesso baattote hallira Aliyyeenni 30-150 geeshsha kekiroosi giriiniwichi meeridiyaani, Soojaatoonni 330-480 geeshsha kekiroosi aanaati.
- Itophiyu babbaxxitino dargubba afirino. Insano: ilaalaame baatto, lixxino baatto, xeichaame baatto dargubbaati.
- GPS/KRA yaa kalqete aana nooricho saatalaytete mashalaqqe horoonsi'ratenni teessonna addi addi millimillo yannatenni xawisate horo aanno udiinnichooti.
- Ji Pi Esse mitto udiinnicho manchi beetti hiikkinni kae hiikkira millisanni nooro ragunninna teessotenni xawisate horo uytanno udiinnichooti.

## Fooliishhote Xaphishshi Rosiishsha

### I. Aante shiqqino xa'mo halaaleho woy kaphoho yitine qolle.

1. Kaartu baattote ragase ikkininna ofollase dileellishanno.
2. Soojjaati Afirikira Afiriku buuda yaanno su'ma uynonnihi buuda ikkinohuraati.
3. Baaru gaxi 1000 meetire worooni ikitino dargubba gottiima dargubba yinanni.
4. Itophiyu giddo laggate hoshoshhammenni kalaqantino boonna giddo shiimiidihu Abbayi boonoti.
5. Dargaho yaa mittu manchi, udiinnichu woy babbaxxinori leelltanno baychootii.
6. Taalootu teesso yaa mitte uurrinsha teesso baycho kaima assine wole baycho xawisa dandiineemmo doogooti.
7. Kompaasete qaru ragi beehaache ikitinori, Aliyye, Soojjaato, Galchimanna Wodiidooti.
8. Haawittotenna uurrinshate xuruuri baattote aana hedote calla worrooni xuruuraati.
9. Angatenni loonsooni kaarti raganna darga woy baycho leellishannonkeha ikke foto kayinsoonnihunni rooranno.
10. Itophiyunni uurrinshu teesssosi Aliyye ragaanni 3-15<sup>0</sup> geeshsha kekiroosinna giriiniwiichi meeridiyaaniraati.

## II. Woroonni “A” gaamo widoonni shiqqinnore ‘B’ gaamo ledo fiixoonse.

### Gaamo “A”

1. Keeniya
2. Jibuute
3. Itophiya
4. Wodiidi Suudaane
5. Ertira
6. Aliyye Suudaane

### Gaamo “B”

- A. Soojaatoonni
- B. Aliyyeenni
- C. Widiidoonni
- D. Soojaati Galchimira
- E. Soojaati Afirikira
- F. Wodiidi Galchimira
- G. Aliyye, Aliyye Soojjatira
- H. Aliyye Sojjaatira

## III. Aante shiqqino xa’mora taalo ikkitino dawaro doortinne qolle.

1. Sumaalete gobba qaru quchumi hiikkonneti?

- A. Adisaawa   B. Muqaadisho   C. Jibuuti   D. Kaartume

2. Itophiyu giddo shoole kume meetire aleenni gottiima afirino dargi giddonni

Raasi Daashini ilaali afamannoohu hiikkooti?

- A. Wodiidi Sojjaatiraati  
B. Aliyye gittiima darga Wodiidi Soojjaatiraati  
C. Aliyye wodiidi Soojjaatiraati  
D. Aliyye gottiimu dargiraati

3. Itophiyu gobba ledo hala'lado qasiiso noose gobba hiittenneeti

- A. Keeniyu   B. Wodiidi Suudaane   C. Sumaale   D. Suudaane

4. Itophiyunna Keeniyu gutu danni \_\_\_\_\_ ikkanno.
- A. 1299 K.M<sup>2</sup>      B. 580, 000 K.M<sup>2</sup>      C. 867 K.M<sup>2</sup>      D. 342 K.M<sup>2</sup>
5. Kaarta kaysate balaxote qixxeessi'ra hasiisannori maati?
- A. Woraqatu amado      B. Heqichu bikkaanchi  
C. Haawiittote xuruuri      D. Baalunku dawarote
6. Kaartu horo ikkinohu hiikkonneeti?
- A. raga leellisha  
B. baattonna baattote aana afamannore leellisha  
C. haawittote xuruuri  
D. "A"nna "B" dawarote
7. Konni woroonni noori giddo qara kompaasete bixxille ikkinohu hiikkonneeti?
- A. Dargu      B. kaartu      C. Soojaati      D. dawaro dino
8. \_\_\_\_\_ buudu lellishannohu Arawete baaraati.
- A. Itophiyunnihu      B. Jibuutihu      C. Afirikunnihu      D. Sidaamunnihu
9. Konni woroonni noori giddo Afiriku buudira afantanno gobba ledo qasiiso afidhinoti hiittenneeti?
- A. Aliyye Suudaane      B. Wodiidi Suudaane      C. Keeniyu      D. Baalunku
10. Itophiyaho hojjatenni umikki ilaala ikkinohu hiikkonneeti?
- A. Raasi-Daashini      B. Gaamote ilaalli      C. Maaji-kormi      D. Guugge

#### **IV Aante shiqqino xa'muwara fano darga wonshe.**

1. Kaarta loossanno ogeeyye \_\_\_\_\_ yine woshshinanni.
2. Afiriku buudira afantanno gobba ikkite Itophiyu ledo qasiiso afidhinori.
- A. \_\_\_\_\_  
B. \_\_\_\_\_  
C. \_\_\_\_\_
3. Soojaati Afiriki buudi qasiiso xaaddanno daddalu furchonna duumu baari \_\_\_\_\_ widoonniinha Hindi Wuqiyanoose \_\_\_\_\_ widoonniiti.

#### **V. Woroonni noo xa'muwara harancho xawishsha borreessitine qolle**

1. GPS/KRA uytanno horo maatiro xawishsha uyiyye.
2. Kaarta kayinsanni yannara maricho afa noonke?

# FOOLIISHSHO LAME

## SAYINSE HUWATA

### XAPHOOmA HEXXO

Rosaano tenne foolishsho rossuhu gedensaanni:

- ❖ *sagalete mayimma baddanno*
- ❖ *sagale daakkanno bisu kifilla affanno*
- ❖ *sagale daahate amanyootita qara kifilla buuxxanno*
- ❖ *sagale daahate amanyooti kifilla horo xawissanno*
- ❖ *way kompawunde ikkasi baddanno*
- ❖ *Way horo buuxxanno*
- ❖ *ayiirrinye, seendille, amado, yanna, iibbillenna qiindille bikka dandiitanno*
- ❖ *Aye millimmora woy ikkitote soorrora hasiissano wolqa buichonna horo kula dandiitanno*
- ❖ *wolqate buichonna wolqate horo affanno;*
- ❖ *huurote mayimmanna addi addiha huuro saysanno udiinnicho buuxxanno*
- ❖ *huurote dana buuxxanno*
- ❖ *huuronna huuro addi addi udiinni widoonni sa'anno gara affanno.*

### Qara amado

- 2.1 Sagalenna Sagalete daahama amanyoote
- 2.2 Way horo
- 2.3 Bikkaano
- 2.4 Wolqate buicho
- 2.5 Huuro

## Bitima

Sayinsete yaa mittoricho egennotenninna loosu assootinni amadisiinse suudisinni akitisinni, hattono sonuninna kalqete kalaqama la”ateninna loosunni xawisate yaate. Sagale bisu giddo daahante shiimmaadda sagelete niyutireente widiranna mundeete giddora xuuxante ea dandiitanno deerrika soorrama sagelete daahama harinsho yine woshshinanni. Sagelete daahama hasiissannohu qara hasatto bisinke seella sagale afidhe loosonsa loossanno gede assateeti. Sagale daahama hanaffannohu afiinke giddooti; jeeffannohu kayinni shiimiidi hellee giddooti. Way manchi beettira barru giddo duucha loosono loossate kaa'lanno. Way hoogiro lubbo noonsari baalaho seellansa loosonsa loossanna lubbotenni heera didandiitanno. Waaho danu, nyammonna foolu dinosi. Way 100°C aleenni hufiro fooraroho sooramanno qoleno 0°C worooni qidiro kaadete widira sooramanno. Bikkaanchoho yaa mitturichi qelpheepho, amado, yanna, iibbille labbannore keenate ha'rinshooti. Manchi beetti barru tuqa loosanno loosi bikkaanchu ledo amadaminoho. Wolqate yaa tenneeti yine xawisate qarisannoha ikkirono wolqa mitto looso loosate dandooti. Huuro kalaqamu ikkito giddo mittete. Huuro barru giddo duuchu raginni macciishshantanno. Mitturichi lowo geeshsha irbamanno, hurgufamonna ribbisanno woyte qoonqo kalaqanteenna maccankera tini irbama woy hurgufama macciishshantannonke ikkitooti.

## 2.1 SAGALENNNA SAGALETE DAAHAMMA AMANYOOTE

### Rosate dandoo

Rosaano konne roso rossuhu gedensaanni:

- ❖ *Sagale daakkannota qara bisu kifilla xawissanno;*
- ❖ *Sagalete mayimma xawissanno;*
- ❖ *Sagale daakkannota qara bisinke kifilla borreessitanno*
- ❖ *Sagalete daahama horo kultanno*
- ❖ *Sagalete daahamara kaa 'litannota bisu kifile misile kayisse su 'mitanno.*

#### Qara qaalla

- |   |  |
|---|--|
| <ul style="list-style-type: none"><li>• Sagale</li><li>• Liiqama</li><li>• Afoo</li><li>• Yogoore</li><li>• Salto</li></ul> | <ul style="list-style-type: none"><li>• Shiimiidi hellee</li><li>• Jawiidi hellee</li><li>• Qochima</li><li>• Xuuxxo</li></ul> |
|---|--|

Shoolki kifile deerrinni sagale, sagalete keeraanchimma, sagalete horonna taaltino sagalere rossiinoonni. Xa kayinni tenne kifilera sagalete daahama amanyoote rossiinanni. Ha'runsitineno leyikki kifilera manchi beettita mundeete doycho, wedellichimmana foolate amanyooti kifilla yaanno roso rosiinanni. Tenne amado rossinihu gedensaanni buuxa hasiissanno'ne yine aleenni borreessinoonni rosu dandoo aana ikkado egenno afi'ra noo'neta buuxxe.

**Xa'mo:** *Sagalete yaa mayyaate?*

Sagalete yaa intannirennna angannire ikkite bisinkera wolqa, iibbille kaajillenna dhaambe uytannotenna dhibbunni gargartannota baala sagalete yinanni.

### Lawishshaho:

- Waasa, tima, buddeena, maala, ado, waa, gafumma, quuphe, daabbo, shaana, buuro, malawo labbannori sagalete yinannireeti.

Manchi beetti umisinni sagale kalaqa didandaano. Konni daafira, manchi beetti sagalesi afi'ranno mu'rotewiinnitinna saadatewiinniiti. Gumma, laalonna gati kaashshi saga'lineemmu haanja mu'ronniti. Saadatewiinni afi'neemmo sagale, ado, quuphe, maalanna buuro, ikkanna kuri afineemmu saada haanja mu'ro saga'litu gedensaanniiti. Sagale bisinkera uytanno hororeenna sagalete gattonni daanno dhiwani aana xiinxallo assitanno sayinse **sagalete amanyoote** yine woshshinanni.

### Sagale daahamate amanyootita qara kifilla

#### Xa'mo:

1. *Sagalete liiqama yaa mayyaate?*
2. *Sagale liiqate kaa'litannori bisu kifilla hiikkuritiro su'mansa kulle.*

Sagale bisu giddo daahante shiimmada sagalete shiilla widiranna mundeete giddora xuuxante ea dandiitanno deerrira soorrama **sagalete daahama ha'rinsho** yine woshshinanni. Sagalete liiqamara hasiisannori qara hasato bisinke seella sagale afidhe loosonsa loossanno gede assateeti. Sagale liiqantanno sagale liiqanno bisu kifilla giddo noo mujjanni fultanno (cingiitanno) inzaymooti mitteenni assitanno kaa'lamanniiti.

### Sagale daakkannota bisinke kifilla

Manchi beetti millisate, lophatenna lubbotenni hee'rate sagalenna wolqa hasiisanno. Bisinke seella sagale intoommo garinni horoonsira didandiitanno, Konni daafira, bisinke intoommo sagale seelete injanno widira soorranno. Tenne bisinke sagale shiimmammaaddu liiqo widira soorranno ha'rinsho sagalete daahama (liiqama) yine woshshinanni. Tenne liiqamate ha'rinsho giddo afantanno bisubba sagalete dahama amanyooti bisu kifilla yine woshshinanni. Sagale saga'la bisinke keeraanchimmara lowo kaa'lo uytanno. Babbaxxitino sagale babbaxxitino niyutireente giddose amaddinohura lowo horo uytanno.

### Niyutireente giddonsa amadinno sagale ikkitinori:

- Kaarbohaydireete
- Pirootine
- Cooma
- Vaytaamine
- Mineraale
- Waa

kuu baalunku sagalete niyutireenteeti. Bisinke giddo afantanno sagalete daahama amanyooti kifilla kuri niyutireentoota liiqqanno. Kuri liiqqantinno sagalete niyutireentooti bisinke giddo. sagale hadhano doogo widoonni higge mundeete doycho e'anno. Mundee kayinni tenne liiqantino sagale seellate giddora fincitanni bisinke wolqa afi'ranno gede iillishshanno Sagalete liiqama harinsholamewa gaammanni;

- A. Mekaanikaale doogo
- B. Kemikaalaawe dooogo

#### A. Mekaanikaale doogonni liiqamate ha'rinsho

Sagale mekaanikaale doogonni daahamate yaa sagale afuu giddo hinkotenni corqinne egemmeeenna salto iillate geeshsha noo ha'rinshooti. Tini liiqama godowinke giddo saltotenni kayisse hellee iillite rahotenni liiqantanno gede injo kalaqqanno. Yaano, godowinke giddo sagale daakkanno inzaymootira injo kalaqantanno.

#### Loosu assoote

1. *Rosiisaancho, aante noo assootu harinsho rosaanokkira leellishshinsa. Lame taalo waa amaddanno burcuqo qixxesite mitte burcuqora see cancanaminno tima worte layiinkitera kayinni cancanaminokiha geeshshasi alleeni cancanami timi ledo taalo ikkinoha taalo yannani layinki burcuqora wori. Rosiisaancho rosaanokki hiiku timi balaxe shiilinoro woy liiqaminoro rosaanokki baddano gede assi.*
2. *Rosaano, mittu manchi lowo geeshsha hudiriro rahotenni hudesi hoo'lara waasanso sherko ita noosiro gaamotenni hasaabbine kifilete rosiisaanchinera korkaatunni irkisine kulle.*

#### B. Keemikaalaawe doogonni liiqamate harinsho


Tini liiqama sagale inzaymootu kaa'ltonni liiqante bisu seella giddora e'anno gede injeessitanno doogooti.

### Loosu assoote:

Gaamotenni sagale keemikaalenna mekaanikaale doogonni liiqamate mereero noo badooshshi maatiro hasaabbine dawaro'ne rosiisaanchi'nera kulle.

**Xa'mo:** *Sagalete daahama hiikko hanaffanno? Hiiitto ikkite daahante hiikko gooffanno?*

Sagalete daahamate ha'rinhora ikkitinota seeda boombe afuunni kayisse xuuxxote geeshsha noota sagalete liiqote doogo elimentaarete kaanaleeti yine woshshinanni. Tini hanaffannohu afuuni ikkite jeffanohu kayinni xuuxxoteeti.(misile 2.1 la'e)



**Misile 2.1** Sagale daahate amanyootita qara kifilla

#### Elimentaare kaanale giddose hanqaffanno bisu kifilla aantensa garinni:

- Afoo
- hinko
- Arrawo
- Yogoore
- Salto
- shiimiidi hellee
- Jawiidi hellee;
- Qochima
- Xuuxxo.

Sagalete daahamate amanyootira qara kifilla ikkitinore xaphoomunni Sagale liiqannoreeti yinnanni.

### **Insano:**

- Afoonna arrawo
- Salto
- Shiimiidi hellee

### **Afoonna arrawo**

sagale daahama hanaffannohu afinke giddo hinkote kaa'lanniiti. Afuu yaa sagale daahama hanaffano dargaati. Balaxxe sagale hinkotenni daahantannohu afuu giddooti. Afinke giddo nooti hinko sagale hiiqqate, corqatenna cancanate kaa'litanno. Arawu loosi kayinni sagale anjunni ledo karsiisatenna sagale yogoorete widira xiiwate. Aanteteno sagale yogoorete giddooni sa'e salto dirritanno. Afinke giddo arrawinkenni fultanno inzayme amileesi (taliini) yinanniti coomu istaarche maaltoosete widira qolte soorritanno. Afuu yaa kaarbohaydireetetenna istarchete sagale daahamanna liiqama hanaffanno baseeti. Hakkuno anju giddo nooti tayiliini yinanni inzaymete istaarchi yinanni kaarbohaydireete maaltoosi widira qolte soorritanno.

### **Arrawu looso**


Sagale corqine egemminara albaanni sagalete nyamo badate kaa'lanno. Hinkotenni daahantino sagale arrawu godowu giddora egemate enjo kalaqanno. Sagale anjunninna anju mujjanni burqitanno inzaymootu ledo karsiise shaqqishate.

### **Yogoore (Esophagus)**

Yogoore afuu giddo hinkotenni daahantino sagale salto sayissanno boombeeti. Tini boombe sagale sayissanno doogo eramanna ruukisammete harinshooniiti. Yogoore sagale egemmata ha'rinsko jeefantanno baychooti. Yogoore sagale goddowinke giddora ha'rissanohu rukkatenna halaa'late hurgufammenniiti. Tenne harinsho woy millimmo **piristaliytikete** millimmooti yinanni.

## Salto

Sagale yogoore sa'u gedensaanni salto e'anno. Salto sagale yannate geeshsha kuusantanno dargaati. Saltote giddo gastiriki juuse du'namaancho. Tini gastirike juuse pepsininna haydirokilooriki asiide giddose amaddino. Salto sagale kuusante daahamate afuunni aante layinki dargaati. Saltote gidoydi bisinni saltote du'namaano burqitanno. Tini du'namaano giddonsa inzayimenna haydrokilooriki yinanni asiide amaddinoreeti. Haydrokiloorikete asiide sagalete ledo saltote giddora e'ano jarne shaate kaa'litanno. Inzayimma kayinni pirootinete sagale wole shiilla widira qolte soorrate kaa'litannoreeti. Pirootinete sagale liiqantannohu saltote giddooti yaate. Mite mite yannara **piristalis** gurcho looso loossanno, yaano sagale saltote widira xiiwa agurte afuu widira xiibbanno. Tenne gurcho ikkito **tushshiishate** yinanni. Tushshiishha kalqantara dandiitannohu sagale bisoho injaa hooggurooti.



Salto

Jawiidi hellee

Shiimiidi hellee

**Misille 2.2** Salto, Jawiidinna Shiimiidi hellee

## Shiimiidi hellee

Saltote giddo bocunni liiqantino sagale suutunni ikkite shiimiidi hellee e'anno. Sagalete liiqamme gumulantannohu shiimiidi hellee giddooti.

### Shiimiidi hellee e'anno du'namaano burqitannohu:

Shiimiidi hellee sagale liiqqanno gede kaa'lanno du'namaano afaletenninna efeleqqunni burqitanno.

- Afalete dombophiicho giddoonti fultanno du'namaano coomunna zaytete sagale bisu horoonsiranno widira soorranna sagalete giddo noo asiide soorrate kaa'lanno.
- Efeleqqu giddoonti efelqqu du'namaano burqitanno. Kunino lippeese, amilese, trapinosenetenna, w. k. l yinannireeti.


Shiimiidi helleera sase kifile noose. Hakkurino

- allidi shiimiidi hellee (duodenum)
- mereri shiimiidi helleenna (Jejunum)
- woriidi shiimiidi hellee (Ilium) yinanni.

Aantetenni shiimiidi hellee giddo liiqantino sagale shiimiidi hellee giddo noo shiimmaadda illete leeltannokki doycho e'anno woy xuuxantanno yaate. Tini liiqantu sagale shiimiidi hellee giddoo higge e'ano xulluwa **viilay** yine woshshinanni. Sagale mundeete widoo higge bisu seella baala iillitanno.

### 2.1.1 Sagalete daahamara irko assitanno kifilla

Afale, efeleqqunna dombophiichote ufuuffa sagale daahantanno boombe kifile dikkitinoreeti; ikkollana kayinni, sagalete daahamara irko assitannoreeti. Afale, dombophiicho woy dombophiicho qixxeessite coomu sagale liiqantanno gede assitanno. Hattono, mundeete heedhannota gawajjitanno bisubba liiqqanno. Efeleqqu kaarbohaydireete, pirootinenna cooma liiqqanno du'namaancho kalaqanno. Dombophiichote ufuuffa, afalete dombophiicho duuntannohu dombophiichote ufuffaraati. Tini aliidi shiimiidi helleera higge du'nantanno.



**Misile 2.3.** Sagalete daahammera irko ikkitannota bisu kifilla

### Jawiidi hellee

Daahantinokki sagale jawiidi hellee giddo ofoltanno. Daahantinoikki sagale giddose jawa waa amaddino. Qaru jawiidi hellee loosi waa xuuxate. Tenne niyutireente xuuxanteena fiica ikkitino sagale godowu giddo noota **ciloho** yinanni. Cilu kuusamannoti jawiidi hellee kifile **qochimaho** yinanni. Cilu fulanno xullo **xuuxxote** yinanni. Xuuxxote loosi daahantinokki sagale gobbara fushshate.

#### 2.1.2 Sagale daahate amanyooti horo

**Xa'mo:** *Sagalete daahama uytanno horo maati?*

Daahante liiqantino sagale niyutireentete widira soorrate kaa'litanno. Tini niyutireente bisoho babbaxxitino horo uytanno. Hakkuno, wolqa, bisu lophoranna bisinke giddo noo seele dhaawate, dhibba gargarate horo uytano. Intoommonna angoommo sagale mundeete widira xuuxante horo uytannohu shiimmaadda niyutireentete widira soorrantu gedensaanniiti.

Manchi bisi sagale liiqe addi addi niyutireente widira soorranno. Bisinke giddora e'e niyutirentete widira soorrantannoha sagelete dana woroonni xawinsoonni.

- Kaarbohaydireete
- Pirootiine
- lipiidete
- Vaytaamine

### **Qara sagale daahate amanyoote**

- Sagale afuu giddora essi'ratenna sagelete liiqama umo ikkite hanafate ha'rinsho (ingestion).
- Sagale mekaanikaalaawetennina keemikaalaawetenni liiqantanno ha'rinsho (digestion).
- Liiqantinno sagale shiimiidi helleenni mundeete doychora xuuxama (absorbtion)
- Liiqantinokki sagale ciyo ikkite gobbara fula (elimination).

#### **2.1.3. Sagale daahamate amanyootira assa hasiissanno qoropho**

- taaltino sagale ita,
- sagale seekkine corqa,
- ikkado waa (saseleetire geeshsha) mittu barrinni aga,
- masilunna yaaddote yannara rake daahantannokki sagale hooronsi'ra hooga,
- sagale itate albaanni woy inte ka'nihu gedensaanni millimillo assa,
- yannatenni jawiidinna shiimiidi shumara (cilohonna shumate) ofolla
- yanna agare sagale ita
- ikkado goxano afi'ra,
- mannimate keeraanchimma agadha,
- hinkote co'mma agadha,
- gawajjитанно agatto lawishshaho alkoole, sijaaranna babbaxxitino kemikaalla adha agura;
- wo'ma woyte mannimate guunte loosanna w.k.labbanoreeti.

#### 2.1.4 Sagalete daahamara kora ikkanno qarra

Deeunna (diarrhea) godowu moolle sagalete daahama qarraati. Deeu sagale keeshshitukkinni du'namaanchu cilu suudinni fulate.

##### Deeoho kora ikkitannori:

- babbaxitino dhiwanna abbitanno jarne
- daafantino sagale saga'la
- babbaxxitino xagga horoonsi'raa

##### Deeu malaate ikkitinori:

- godowu game
- mundee giddo amadino cili
- bisu iibbabbo

#### Loosu assoote

Rosaano, Sagalete daahamara kaa'litanota bisu kifile leelliishshanno misile kayissine su'mansa borreesse.

**Godowu moolle (constipation):** godowu moolle manchi beettira dhiwanahonna cilu fula giwate qarra kalaqqanno. Godowu moolle noosi manchi ciло cilannohu sase hige woy sasunni ajinno yanna lamalate giddo ofollanno

##### Godowu moollera qara kora ikkanori:

- Haanxame sagale horoonsi'ra hooga
- Millimmo assa hooga (lack of physical activity)
- Ikkado waa aga hooga
- Hayishshira hooga

##### Godowu moolle gargadhineemmu:

- injaad heeshsho hee'ra (good lifestyle)
- duucha woyte ikkado millimmo assa
- ikkado waa afi'ra
- lowo haanxe afidhinno sagale saga'la
- bisonke duucha woyte hayishshira

## Rosiishsha 2.1

### I. Konni woroонни shiqqino xa'mora halaaleho woy kaphoho yitine dawarre.

1. Sagalete yinanniti intannirennna angannire ikkite bisinkera wolqanna iibbille uytannote.
2. Kaarbohaydireete bisinkera wolqanna iibbille uytanno niyutireenteeti.
3. Buurunna coomu mu'rotenni afi'nanni sagalete danaati.
4. Sagalete daahama hanaffannohu shiimiidi hellee giddo ikkite joeffannohu kayinni jawiidi hellee giddooti.
5. Barru giddo mittu manchi jawa sagale itiro taaltino sagale afi'no yinanni.
6. Afale cooma caalla liiqqanno du'namme kalaqqanno.
7. Gastriki inzayimma pirootiinenna coomu sagale liiqqanno.

### II. Taalo dawaro doortine qolle

1. .... sagale daakkannokki kifillaati.  
A. Anga      B. Afoo      C. Salto      D. shiimiid hellee
2. Konni worooонни nooori giddo mittu sagalete daahamara irko ikkinoho  
A. Jawiidi hellee    B. Shiimiidi hellee    C. Afoo    D. Afale

### III. Fanu baychira taalo dawaro borreesse.

1. Qara sagale daahamate amanyooti kifilla ikkinore borreesse.  
-----, -----, -----
2. Godowu moollera qara kora ikkinore borreesse.
3. Shiimiidi hellee burqaano giddonsa hanqaffanno inzaymooti hiikkureeti?
4. Qara sagale daakkanno inzayimma hiikkuriiti? Harancho xawishsha borreesse.

## 2.2 Way horo

### Rosate dandoo

#### Rosaano konne roso rossuhu gedensaanni:

- ❖ *Way tiro kultanno;*
- ❖ *Way formula borreessitanno;*
- ❖ *Way lubbo noonsarira baalaho aanno horo xawissanno;*
- ❖ *Waa xaadu gede xawissanno*
- ❖ *Wayinnita xaphooma horosi kultanno.*

#### Qara qaalla

- |   |   |
|---|---|
| <ul style="list-style-type: none"><li>• Waa</li><li>• Way formula</li><li>• Way xaado</li></ul> | <ul style="list-style-type: none"><li>• Way horo</li><li>• Way doycho</li></ul> |
|---|---|

#### Xa'mo:

1. *Waaho yaa mayyaate?*
2. *Way horo maati?*
3. *Way doycho yaa mayyaate?*

#### Waa

Way lee sagalete niyutireente giddo mittoho. Loosaminohuno lame haydirojinete atemenninna mitte okisijiinete ateme xaadinniiti. Way sagalete nyutireente giddo mitto ikkirono manchi beettira wolqate disorramanno. Lubbo noonsarira baaalaho seellansa giddo 60—95 anga geeshsha amadinohu waaho.

#### Lawishshaho:

- Manchi beetti seella giddo 60—95 anga geeshsha amadinohu waaho.
- Hawaawu gumma 90-95 anga waaho.

## Xaphoomunni way lamu korkaatinni horo aanno

- Umihu seellate giddo kalaqantanno kemikaalete ha'rinshora irko ikkanno.
- Babbaxxitino lubbo noonsarira minimma kaa'lanno.


Way kalaqaminohu lame haydirojiinenninna mitte okisijiinete atome xaadinniiti.



### wayinnita sonu soorro

- Kaajjadu soninni, lawishshaho: kaade (ice).
- Du'namaanchu soninni, du'namaancho umosi ikke heeranno.
- Gaazete soninni, fooraro ikke.

Way soni soorramannohu qarqaraho noo ayyarete ikkitubba jilbinniiti. Iibbile ledatenni woy ajishatenni mittu soninni wolu soni widira soorra dandiinanni. Togo yaano iibbille lende kaade daaqisatenni du'namaancho waa assanna du'namaancho waa hufinse fooraru widira soorra dandiinanni. Hattono iibbille ajinshe fooraro qiissine du'namaanchonna du'namaancho waa kaadete widira soorra dandiinanni. Iibbillu jilbi lexxanni ha'ranno woyte way fooraroho soorramanno. Iibbilu ajanni ha'ranno woyte way du'namanchoho soorramanno. Qiindete jilbi lexxanni ha'ranno woyte kaadete soorramanno ( misile 2.4 la'e).



### Missile 2.4. Way soni soorro leellishshano

## Way horo

Way babbaxxitinno kalaqamara addi addi horo aanno. Way horo duuchano ikkituro tenne kifile deerrinni way horo shiimunni woroонни xawinsoonni.

1. Way bisinke giddo sagalenna bisu giddo noo xure mittu darginni wolewa massate kaa'lanonke.

### Lawishshaho:

Liiqantino sagale mundete widoонни qole seellanke giddora iillishshanno. Qoleno bisinke giddo noo xurennna bisu hasi'rannokkire mundeete widoонни qole mulu giddo ximbiwante shuma ikkite fultanno gede kaa'lanno.

2. Mannaho barru baala sagale raisi'ratenna udiine hayishshi'rate kaa'lanno.
3. Mannahonna saadate bisinsa giddonni iibbile qiissate kaa'lanno.

### Lawishshaho:

Mannu wayinni bisonsa hayishshi'ranno, saada kayinni waa daahatenni bisinsa iibbille qiissidhanno.

4. Haanja mu'ro sagale qixxeessi'rate kaa'lanno.

### Lawishshaho:

Haanja mu'rora kaarbondayokisayidenna waa horoоnsidhe arrishshote xawaabba lexxite uminsa sagale qixxeessidhanno, Tenne harinsho **fotosentesisete** yinanni.



5. Bisinke giddo sagale shiilishshate kaa'lannonke.
6. Way hodhishshaho, daa"attote, dubbu saadara heeshshote horo aano.
7. Mu'rote lophora kaa'lanno.
8. Way saadate mundeete doychora kaa'lanno.
9. Way manchi beettira mikittate qunfe heedhanno gede assanno.
10. Waa industirete giddo horoоnsi'ne babbaxino udiinicho loonsanni.

### Lawishshaho:

- Woraqata, biira, siwiila labbannori no.
- Way korreentete wolqa burqisate kaa'lanno.
- Way mu'rote addi addi horo aanno. Kuri way mu'rote aanno horo giddo mu'ro bushshu giddo rumushshonsa lixisa dandiitanno gede bushsha shaqqishatenni horo aanno.

#### Way doycho

**Xa'mo:** Way doycho yaa mayyaate?

Arrishshote iibbillinni uullate aana noo way foorare gordu giddora eano. Kuni foorari gordo ei gedensaanni qiide gomicho ikkanno. Qoleno gordu aana aleenni nooti ayyare qiidado ikkitinohura suutunni qiiddanni xeenaho soorrantaanno. Gomicho gordu duhe afannoikkihura kaadete woy xeenu akeekinni baattote widira hige dirranno. Kuni du'namaanchu way fooraroho soorrame gordoho gomichi gedensaanni xena ikke soorrama **way doychooti** yinanni (misile 2.5 la'e).



**Misile 2.5.** Way doycho

## Rosiishsha 2.2

### I. Konni woroonni noota halaaleho woy kaphoho yitine dawarre.

1. Way haydroojinetenna okisijiinete karsooti.
2. Way manchi beettira wolqana iibbille uytanno sagaleeti.
3. Kaadete iibbili du'namaanchu ledo xaadiro way widira hige soorranmnno.

### II. Konni worooni noo xa'mora xawishsha borreesse.

1. Way soni aana harancho xawishsha borreesse.
2. Way doycho yaa mayyaate?

## 2.3. BIKKAANO (MEASUREMENT)

### Rosate dandoo

#### Rosaano konni rosi gedensaanni

- ❖ *Bikaanote mayimma xawissanno;*
- ❖ *Qelpheeph, amado, yanna, ibbillu jilba bikkinanni gara leellishshanno;*
- ❖ *BikaanoNnitta kalqetete deerri bikkaano kultanno*
- ❖ *Bikkinanni gara bikkitanni millansara xawissanno.*

### Qara qaalla

- |             |                  |
|-------------|------------------|
| • Seendille | • Yanna          |
| • Qelpheeph | • Iibbillu jilba |
| • Amado     | • Termomeetire   |

### A. Seendillu bikkaancho (measuring length)


Seendilleho yaa mitturichi deerra mitte bixxillenni wole bixxille geeshsha noo fanfeeti. Lame bixxille mereero no xeertinye seendilleho yinanni. Seendille bikkinanni udiinnicho ikkitinori verineri bikkaancho (vernier caliper), xaaxancho meetirennra babbaxxitino seendillu bikkantti(misile 2.6 la'e). Umi yannara seendille bikka hanaffinori Ferensayete; xaa yannara kayinni, kalqete derrinni 95 anga horoonsidhanni afantanno.

**Lawishshaho:** A\_\_\_\_\_B

A fidalenni B fidale geeshsha noo fanfe seendilleho yinanni.  
Seendilleho kalqete deerra agarino bikkaancho (SI unit) **meetirete** yine su'minoonni.

**Wolootu seendillu bikkaano ikkitinori:**

- kiilomeetire (km)
- saantimeetire(Sm)
- millimeetire (mm)
- deesimeetire (dm)



**A.Seendille bikkinnanni xuruura**



**B.verineri bikkaancho (vernier caliper)**



**C.xaaxancho meetire**

**Missile. 2.6** Seendille bikkinnanni udiinicho

**Loosu assoote**

1. Rosaano, gaamotenni ofoltine xuruuranna meetire horoonsidhine kifile'ne seendillenna daftari'ne seendille bikkintine dawaro rosiisanchi'nera kulle.

## Qaagishsha

Budu seendillu bikkaanooti yineemmorci cigile, ha'rumu, qaafonna w.k.l.

*Seendille bikkate horoonsi 'nanni bikkaano injo noonsata ikka noonsa.*

**Lawishshaho;** *lamu quchumi mereero noo xeertinye biikkinannihu kiilomeetiretenniiti. Kifilete seendilli geeshsha bikkinannihu kayinni meetiretenniiti Daftari 'ne woy maxaafi 'ne seendille bikkinannihu kayinni saanti-meetiretenniiti.*

Kalqete deerrinni, deerra agaritinoti seendillu bikkaanonna kalqete deerrinni deerransa agartinoikkiti seendillu bikkaano mereero noo xaadooshshe.

1 meetire = 1000 millimeetire      1 kiilomeetire = 1000 meetire

1 meetire = 100 santimeetire      1 kiilomeetere (k.m) = 1000 meetire (m)

100,000 saantimeetire (s.m) = 1000, 000 milimeetire (m.m)

## Kifilete Looso

1. Lamu quchumi mereero noo xeertinyi 100 kiilomeetire ikkano. Kuni xeertinyi:
  - A. Saantimeetiretenni me''e ikkanno?
  - B. Meetiretenni me''e ikkanno?
  - C. Millimeetiretenni me''e ikkanno?
2. Rosaano gaamotenni qarqaru sayinse maxaafi seendille bikkotine, maxaafa bikkotine afidhinnonni gumira halaalanya guma ikkara dandannohu hiikkonneeti?
  - A. 1.2 kiilomeetere
  - B. 1.2 meetere
  - C. 1.2 saanti meetere
  - D. 1.2 milli meetere
3. Mittu kaameeli 5 kiilo meetire seendilli geeshsha fafe ha'rino. konne kaameelu ha'rino seendille saantimeetiretenni xawinsiro me''e saantimeetire ikkanno?

## B. Qelpheeph (Mass)

Qelpheephote yaa mitturichi bisi geeshshisi ayirrinye yaate. Kalqete deerrinni deerrase agartino qelpheephote bikkaancho **kiilogiraamete** yinanni. Wole kalqete deerrinni deerransa agartinokki qelpheephote bikkaano ikkitinori:

- giraame
- miilligiraame
- toone
- kuntaala

### **Qelpheephoxo bikkinanni udiinicho kiilote (beam balance) yine su'minanni.**



#### **Misile 2.7. Qelphophoxo bikkinanni udiinicho**

Kalqete qelpheephote bikkaanchonna kalqete bikkaano ikkitinokkiri mereero noo xaadooshshe

1 toone = 1000 kiilogiraame

1 kuntaala= 100 kiilogiraame

1 kiilogiraame = 1000 giraame

1 toone = 10 kuntaala= 1000 kiilograame= 1,000,000 giraame = 1,000, 000,000 miiligiraame

Lamunna lamu aleenni babbaxxitinno qelpheephoxo afi'rino udiinne qelpheephonsa geeshsha mitteenni xawisate laamunkura noonsa qelpheephoxo mittu suudi bikkaanchira soorrine leda hasiissanno.

#### **Lawishshaho:**

- Udiinnichu ‘A’ qelpheephoxo 20 kg.
- Udiinnichu ‘B’ qelpheephoxo 5000g.
- Udiinnichu ‘C’ qelpheephoxo 1 toone.

Xaphoomu qelpheephonsa = A+B+C=.....

A= 20kg

C= 1 toone= 1000kg

B= 500g=5kg

**Xaphoomu qelpheephonsa = A+B+C = 20kg+5kg+1000kg= 1025kg**

### Mini - looso

1. Rosaano, labiraatoorete giddo sase babbaxxitino qelpheephoto afi'rino udiinicho qelpheephote bikkaanchira mittu ragi widoonni 0.5kg, 10g -nna 450mg kiilote aana wortu. Konne mittu ragira noo qelpheephoto taashshate layinki ragira kiilote aana mageeshshi qelpheephoto wora noonsa?
2. Kaayyimera minise giddo tonnu kuntaali gaashe noose. Kaayyimera noose kuntaalla toonenna kiilo giraamete widira soorriniro me”e ikkanno?

### C. Yanna (time)

Yannate yaa mitturichi hanafonna gumulamate keeshshinanni ha'rinshoti. Yannate kalqete deerra agarino bikkaanchi lipheessaho (second). Wolootu yannate bikkaano ikkite heedhe kalqete deerra agartinoikkiri xu'eessu (minutes), saate (hour), barru (day), aganunna (month) diru (year) kalqete deerra agartinnokki yannate bikkaanooti. Yanna bikkinanni udiinicho **saatete** yine woshshinanni. Yanna giddose saate, lipheesanna xueesa leellishshanno kifile afidhino.

- Lipheesu (second) mitte wo'ma higge saatete bikkaancho doyro, mitto xueesa ikkanno.
- Xueesu mitte wo'ma saatete doycho doyhu gedensaanni mitte saate ikkanno.
- Saate mitte wo'ma doycho doytuhu woy kiirtuhu gedensaanni 12 saate woy mittu barri boco ikkitanno.

#### Yanna bikkinanni udiinicho ikkitinori:

Angate saate, girkiddu saatenna dijitaale saateeti (misile 2.8 la’e).



**Misile 2.8.** Yanna leellishshanno saate.

Yannate bikkaano mereero noo xaadooshshe

1 saate = 60 xueessa      1 lamala= 7 barra

1 xueessi= 60 lipheessa      1 agani= 30 barra

1 barri = 24 saate      1 dirri= 13 aganaati phaagume ledora

1 diri= 365/366 barra

### Kifilete looso

1. Woroonni noore yannate bikkaano xueessu widira soorre.

- |               |                  |
|---------------|------------------|
| A. 3 saate    | C. 120 lipheessa |
| B. 1:25 saate | D. 1 barra       |

### D. Amado (volume)

Amadote yaa mittu udiinichi bikka woy udiinichu hanqafino darga yaate.

Amado sasu midaadinni (three dimensional) xawinsanni. Amado xawinsannihu seendillunni (length), hojjatenninna (height) kee'milunniti (width).

Du'namaanchu, kaajjadunna gaazete amado sasu midaadinni xawinsanni.

Litre, meetire kuube, gaaloone, millilitrenna shaete maanki amado bikkinanni bikkaanooti. Meetiri kuube kalqete deerra agartino amadote bikkaanchooti.

Du'namaancho, kaajjadorichonna ayyarete woy gaazete amado bikka dandiinanni. Ayyarete amado udiinichu amado ledora taalo ikkitanno.

Korkaatuno, ayyarete umise amado dinose. Du'namaancho bikkinannihu bikkaano udiinninniiti. **Korkaatuno**, du'namaanchoho umisi amado noosihä ikkirono umisi suudi kayinni dinosi. Du'namaanchu amado bikkinanni udiinichi kiiro afidhino silindere (graduated cylinders), filaasketenni (flask) kiiro aanaho noose buricuqqonniiti. Amado shallagginannihu suude afi'rino udiinninniiti. Wole kayinni kaajjaadurichi amado bikkinannihu du'namaancho giddosi amaddino geeshshiinniiti.

## Amadote bikkaano mereero noonsa xaadooshshe

1 meetiri cube ( $m^3$ ) = 1,000,000 saanti meetiri cube ( $s.m^3$ )

1 meetiri cube ( $m^3$ ) = (1meetire) (1meetire) (1meetire)

1,000,000  $s.m^3$  = (100 sm) (100 sm) (100 sm)

1 meetire kuube = 1,000,000,000 miilimeetiri kuube ( $mm^3$ )

(1m)(1m)(1m)=(1000mm)(1000mm)(1000mm)= $1m^3=1,000,000,000mm^3$

Kaajjadurichi amado lamewa gaammanni.

### Insano:

- Suude afidhinnonna
- Suudiweello amado yine gaammanni.

### I. Suude afidhino amado noonsa udiine

Suude afidhinore yineemmor ihojja, seendillenna du'mille afidhino udiinni amadooti yaate.

### Lawishshaho:

- Shooli- midaado (rectangular block)
- kuubenna
- Xasu (cylinder) suudi noonsa amado afidhinoreeti.

### II. Suudiweello amado afidhino udiinne

Kuri udiini ihojja, seendillenna du'millensa bande kula dandiinannikki amado noonsareeti. Togoo amado afidhino udiinira amadonsa kula qarissannota ikkituronno wole hayyonni xawisa dandiinanni. Suudiweelo amado noonsa udiinicho bikkansa afa dandiinannihu worooni shiqqino ha'rinshonniiti.

1. Bikkaancho aanansa afidhino silindere giddo waa worre bikkine bikkinooni amado geeshsha borreessine umi amado yine amadatenni.
2. Suude afi'rinokki udiinicho bikkaancho aanansa afidhino waa worri silindere giddo woratenni layinki amado yaatenni.
3. Suudiweelu udiinichi bikka af'irate layinki amado aaninni umi amado xeisatenni amadonsa afa dandiinanni.

### Shallagate harinsho:

Suudiweelo amado = amado mite - amado lame

### Lawishshaho:

Amado mitte = 40 miililitire ikkitanno yinummoro

Amado lame = 60 miililitire ikkitanno yinummoro

Suudiweelo amado = amado lame –amado mite

Suudiweellu udiini amado= 60 mililitire- 40 miililitire =**20miili litire.**

### E. Iibbillu jilba (Temperature)

Mitturichi iibbillinna qiindillu geeshsha iibbillu jilba yinanni. Manchi beetti barru heeshshosira iibbillu jilba horoonsiranno.

### Lawishshaho:

- Qaaqqullu ama qaaqqulle biso hayishshate way iibbilli jilba angasenni kisse la’anno.
- Wole kayinni mittu manchi aana keeraanchimma hooguro angatenni kinse bisu iibbilli jilba la’nanni.

Manchi beetti iibbillenna iibbillu jilba mittu garinni horoonsiranno. Ikkolana kayinni lamunku tiro babbaxxitinote. Iibbilleho yaa iibbillu wolqa ikkitanna iibbillu jilba yaa kayinni iibbillu wolqa millimmo bikkate yaate.

Millimmote wolqa shiima ikkituro iibbillisi jilbino shiima ikkanno ikkollana kayinni,millimmosi wolqa jawa ikkituro iibbillisi jilbino jawa ikkanno. Shimmammaadu udiinni giddo noo way hufate iibbillu jilbinna jajjabbaannu udiinni giddo noo way hufate jilbi duucha woyte 100°C.

Iibbillu jilba bikkate horoonsi’neemo udiincho **Termo-meetirete** yinanni. Halaalanya iibbillu jilba afate termo-meetire horoonsi’ra hasiissannonke. Termo-meetire mittu bisi iibbillu jilba kultannonikehu digirenniiti. Umi yannara 1592 Awuroppu kiilo garinni termo-meetire loosinohu Xaaliyu qansicha ikkinohu **Galileo** yinanni xinxallaanchooti.

## Iibbillu jilbi bikkaanno iskele (scale) ikkitinori:

- saantigireede (centigrade) woy selishese bikko (Celsius scale);
- faaranaate bikko (Fahrenheit scale)
- kelviinete bikko (Kelvin scale).

### I. Saantigireede (centigrade) woy selishese bikko (Celsius scale)

Umi yannara loosinohu siwudinete (Swedish) qansicha ikkinohu **Anders Celsius** yinanni xinxallaanchooti. Umisi xawishshi garinni zerote ( $0^{\circ}\text{C}$ ) way qiide kaade ikkannotanna xibbeho ( $100^{\circ}\text{C}$ ) way hufannote yee xawishsha uyno.

### II. Faaranaate bikko (Fahrenheit scale)

Loosinohu Jarmanete qansichi **Danieli Fahrenheiti** yinanni xinxallaanchooti. Kuni xinxallaanchi xawinsohu 32 faaranaate way qiide kaade ikkannotanna 212 faaranaate kayinni way hufano yee xawishsha uyno.

### III. Kelviinete bikko (Kelvin scale)

Kelviinete bikkaancho loosinohu Scottishete fiziksete xinxallaanchi **Lord Kelvin** yinanniho. Konni xawishshi garinni way qiide kaade ikkannohu 273 kelviinetenna hufannohu kayinni 373 kelviineteeti yee xawishsha uyno qansichaati.

## Rosiishsha 2.3

### Aante shiqino xa'mora xawishsha uyiyye.


1. Iibbillu jilbi iskele borreesse.
2. Qelpheephottenna amadote badooshshe borreesitine qolle.

## 2.4. Wolqate buicho

### Rosate dandoo

Rosaano konne roso rossuhu gedensaanni:

- ❖ *Wolqa maatiro xawissanno;*
- ❖ *Wolqate buicho kultanno*
- ❖ *Wolqate horo borreessitanno.*



### Wolqa

Rosaano, tenne kifile deerri rosiira wolqate buichonna wolqate dana rosiinanni. Aanchitine leyikki kifile rosira wolqa uytanno horore rosiinanni.

#### Xa'mo:

1. *Wolqa yaa mayyaate?*
2. *Wolqate buicho maatiro borreesse?*
3. *Wolqate dana xawissine kulle.*

Wolqa yaa tenneeti yine xawisate qarrisannoha ikkirono wolqa mitto looso loosate dandooti. Kunni garini mitturichi looso loosa dandaannohu noosi wolqa bikkinniiti. Hee'neemmo kalqe babbaxxitino doogonni wolqa uytannonke.

#### Lawishsaho:

- kinchu kasale
- way
- giirate haqqe
- kalaqamu nadaaje (petiroliyeme)

## Wolqate Bu'a

### Xa'mo: Wolqate buicho ikkitinori maati?

Wolqate yaa kalaqamunni afi'neemmore ikkite kalaqa woy huna dandiinannikkite, kayinnilla mitte wolqa wole wolqa widira soorramate akati noose. Wolqa mittu bisinni wolu bisi widira sa'anno. Wolqate bue yinanniri wolqa babbaxxitino garinni giddonsa amadde heedhanno bisubbaati.

#### Lawishshaho:

- arrishshote wolqa
- sagalete wolqa
- nadaajete wolqa
- baatirete kinchi wolqanna w.k.l.

#### A. Arishshote wolqa

Arrishsho baattonkera qara wolqate buichooti. Arrishshotewiini afi'neemmo wolqa sase doogonni horo uytanno.

- a. Roore yanna arrishshotewiini afi'neemmo iibbille baychonko horoonsi'ra dandiineemmo.

#### Lawishshaho:

- Hayishshinooni uddannanna daaqquinanni gide arrishshote hange mooshshi'nanni.
- b. Arrishshotewiinni afi'neemmo wolqa gamba assine kuunsanni udiinicho horoonsi'ne arrishshote wolqa afi'ra dandiinanni.

#### Lawishshaho:

Arrishshote xawaabbi wolqanni waa iibbishanna sagale raisi'ra dandiinanni.

- c. Arrishshote xawaabba: Arrishshote xawaabba gamba assanno udiinicho horoonsi'ne arrishshote xawaabbinni korreentete wolqa kalaqa dandiinanni.

### Lawishshaho:

Gobbankera baadiyyete qarqara shiimmaadda arrishshote seelle horoonsi'ne elektirikete wolqa kalanqe horoonsi'ra hananfinkunni lowo yannaati. Arrishshote seellanni afi'neemmota koreentete wolqa mini giddo Caabbichira, daamu mini loosira, balete giddonni waa goshshooshe fushshatemottora, w.k.l horoonsira dandiinanni (misile 1.9 la'e).



**Misile 2.9.** Soolaarete udiine leellishshanno misile

#### B. Sagalete wolqa

Sagalete giddose kuusante nooti kemikaalaawe wolqaati. Tini kuusantinoti kemikaalaawe wolqa bisinke giddo liiqancho sagale okisijiinete ledo giiranturo bisinke babbaxxitino millimillo assano gede kaa'litanno wolqate danaati.

#### C. Nadaajete wolqa

Kalaqamu nadaaje (laambu) kaameelaho, baaburaho, horopillahonna faabirikaho millisate hasiissanno wolqa uytanno. Wole duucha gobbuwara roore koreentete wolqa afi'nannihu lowo jilba afidhinota kinchu kasalenna kalaqamu zayte giiratenniiti.

#### D. Baatirete kinchi wolqa

Baatirete kinchi wolqate bu'a giddo mittoho. Baatirete kinchi seella giddo kuusantinoti kemmikaalaawete wolqaati. Tini wolqa wolu bisi ledo xaadde korreentete wolqa kalaqqanno.

#### Lawishshaho:

Angate baatire callase xawaabba uyte diaffanno. Xawaabba afi'rate baatirete koshi, baatirete kinchi baatirete illenna shiwo horoonsi'ra noonke. Wole kayinni, mitto kaameella ha'risate laambu woy beenzile calla di"ikkitanno. Sayinsitte doogonni qixxeessinooniiti baatirete seella hasiissannonke.

#### Risiishsha 2.4

##### I. Aante noo xa'mo halaaleho woy kaphoho yitinanni qolle.

1. Wolqa mitto looso loosate noonke dandooti.
2. Wolqate bue arrishsho callate.
3. Hee'noommo kalqe wolqa babbaxxino daninni uytannonke.

##### II. Aante shiqino xa'mora dawaro borreessitine qolle.

1. Baatire caabbicho uytannohu may giddose hee'rirooti?
2. Wolqate buicho ikkitinore onte borreesse.

## 2.5 Huuro

#### Rosate dandoo

Rosaano konne roso rossuhu gedensaanni:

- ❖ *Huurote tiro kultanno;*
- ❖ *Huurote taraawora hasiissanno bisubba xawissanno.*
- ❖ *Huurote ranke gara borreessitanno*
- ❖ *Huurote taraawo doogga baddanno xawissanno.*

#### Qara qaalla

- Huuro
- Ranke
- Huurote taraawa

### Xa'mo:

1. *Huuro yaa mayyaate?*
2. *Huurote taraawora may hasiisanno?*

Huuro kalaqamu ikkito giddo mitte ikkite barru giddo duuchu raginni macciishantanno. Mitturichi lowo geeshsha irbamonna hurgufamanno woyte qoonqo kalaqanteenna maccankera macciishshantannonke ikkitooti.

### Lawishshaho:

Kaameelu, woshshu, cea, sirbu, bilibilunna babbaxxitino saadawinni kalaqantanno huurooti. Huuro dambalu wolqa giddose amadde mittu bisinni wolu bisi widira taraabbanno woyte addi addi huxano kalaqqanno wolqaati. Mittu bisinni wolu bisira huuro taraabbanno woyte huurote wolqa ajjanni hadhanno. Huuro faffe hadhu bikkinni wolqase ajjanni hadhanno.

#### **Huurote kalaqamanna taraawo**

Huuro kalaqantannohu bisubbate hurgufamanniiti. Tini kalaqantino huuro taraabbannohu duuchunku ragiraati. Huurote taraawora babbaxxino bisi hasiisanno, yaano huuro mitturichi nookki bayicho (vacuum) taraawa didandiitanno. Aye bisino huuro taraawisa dandiirono huurote taraawote ranke kayinni bisu babbaxxanno woyite baxxitanno.

### Lawishshaho:

- Kaajjadu bisi giddo huurote ranke du'namaanchu bisi giddo noo rankenni roortanno.
- Du'namaanchu bisi giddo noo huurote taraawo ranke gaazete giddo noo rankenni roortanno.

Aleenni xawinsinte gede huuro mitturichi xiiwote ribbenyaati yaate. Huuro wolqa afidhino. Tini wolqa huuro taraabbanno woyte ajjanni hadhanno. Huuro haa're ha'rannose udiinichi hasiisanno.

## Hakkuno:

- kajjadorichooti
- du'namaanchorichooti
- gaazete

## Qaaggiishsha

*Huurote taraawora kaa'lanno bisi kaajjado, dun'amaancho woy gaaze ikkanno.*


*Huuro kalaqama dandiitannohu bisubbate irbamanniitti.*

*Huuro mittu bisinni woleho taraawa dandiitannohu bisu giddoонни callaati.*

*Huuro rakke taraabbannohu wolootunni roore kaajjadu bisi giddoонниitti.*

## Kifilete looso

1. Manchi beetti macca aye huurono macciishsha dandiitanno yitine heddinanni rosaano?
2. Xeena gananno yannara banqote xawaabba la'nanihu banqote huuro macciishshinannihu albaanniiti. Kuni ikkannohu may korkaatinniiti?  
Xuruura mitte anganni mitturichi aana milli yaannokki gede binqe amande layinki angankenni xuruuraho layinkidi birxe ale qolle goshshoonshanni aguranni yannara hurugufamatenni huuro kalaqantanno (misile 2.10 la'e).



**Misile 2.10.** Huurote ribbeenya xawissanno misile


Kuri aleenni xawinsiri huuro tarawisannori hoogiro huuro mittu baychinni wolewa disa'anno. Kajjadurichi huuro rahotenni tarawisatenni du'namaanchunni rooranno. Du'namaanchu kayinni gaazetenni roore rahe huuro giddosiinni tarawisanno.

**Xa'mo:** *Huurote tarawora hasiisannorichi maati?*

### **Huurote macciishshammera hasiisannori:**

- kaima, irbaamanno udiinichi;
- bisu, huuro saysannorichi
- adhannohu (Haa'rannohu), huuro macciishshitanno macca.

Huurote ribbeenyi rahannohu kajjadu udiinni addi addi bisi giddooniiti. Bisu nookkiwa huurote ribbeenyi hee'rannokkihura huurote taraawo diheedhanno. Babbaxxino bisi giddo huurote taraawo ribbeenyi babbaxxanno (misile 2.11 la'e).



**Misile 2.11.** Huurote hurgufamma leeliishshanno misile

## Loosu assoote

### Huuro mittu udiinichi giddoонни sa'анnota buuxa

Rosiisaancho, Rosaanote huuro sa'анnota addi addi doogo buuxxinnanni

#### Hasiisanno udiinnicho:

- qawaatete kokkobbe
- qawaatete kokkokbe tuana
- udiine gombanni heqo.

#### Ha'rinsko

- Kifilete giddo noo rosaano lame lame ikitanno gede waxinsa.
- Rosaano gaamonsanni qawaatete kokkobbe, qawaatete kokkobbe tuananna udiine gombanni heqicha amaddanno gede assa.
- Rosaano qawaatete kokkobberanna qawaatete kokkobbe tuanira xullo fushshitanno gede assa.
- Fushitinno xullo giddooni udiinne gombanni heqicha xullote giddora surkitanno gede assa.
- Surkitino heqichi xullote giddooni fulannokki gede gurda.
- Lame lame ikitinno rosaano mereeronsa noo xeertinye 10 meetirenni tonaa onte meetire (10-15m) geeshsha faffanno gede assa.
- Rosaano huuro heqechu noo xullo widira higge coyiratenni huuro hiitto ikkite taraabbannoro buuxanno gede assinsa.

Huurote ranke ayyarete giddo mittu lipheessi giddo 331 meetire xeertinye illitanno.

#### Shae.2.1. Huurote ranke babbaxitino bissa giddo noo badooshshe

Biso	Bisu sona	Rankete meetire /lipheessunni
Ayyare	Gaaze	330
Waa	Du'namaancho	1,500
Xuube	Kaajjado	3,600
Haqqe	Kaajjado	3,800
Arawete siwiila	Kaajjado	6,000

### Rosiishsha 2.5

**Aante shiqqino xa'muwara dawaro borreessitine qolle.**

1. Huurote may hasiisanno?
2. Huuro kaajjadu bisi giddo du'namaanchu bissa giddonni roore rakkannohu mayraati?
3. Manchi beetti macca duuchanta huuro macciishsha danditannokkihu mayraati?

## Foollishhote Xaphishsha

- Sagalete yaa intannirennu angannire ikkite bisinkera wolqanna iibbille uyte bisonke kaajjishshe dhaabbannotenna dhibbunni gargartannota baala sagalete yinanni.
- Sagale bisu giddo daahante shiimmaadda sagalete shiilla widiranna mundeete giddora xuuxante ea dandiitanno deerira soorrama sagalete daahama ha'rinsho yinnanni.
- Sagale liiqantannohu sagale liiqqanno bisu kifilla giddo noo mujjanni fultanno inzaymooti mitteenni assitanno kaa'lamanniiti.
- Tenne liiqamate ha'rinsho giddo afantanno bisubba sagalete daahama amanyooti bisu kifilla yinanni.
- Sagalete daahama uytanno horo sagale daahante niyutireentete widira soorrate kaa'litanno.
- Daahantino niyutireente bisoho babbaxxitino horo uytanno.
- Hakuno, wolqate, bisu lophoranna bisinke giddo noo seele xaawate horo uytano.
- Way lee sagalete niyutireente giddo mittoho.
- Loosaminohuno lame haydrojinete atomenninna mitte okisijiinete atome xaadinniiti.
- Way hoogiro lubbo noonsari baalu seellansa loosensa loossanna lubboteni hee'ra didandiitanno.
- Way 100°C aleenni huffiro fooraroho sooramanno qoleno 0°C worooni qidiro kaadete widira sooramanno.
- Waa anfannihu: Kaajjadu, du'namaanchunna gaazete soninniiti.
- Bikkaanchoho yaa mitturichi qelpheeph, amado, yanna, iibbille labbannore bikkate ha'rinshooti.
- Wolqa yaa tenneeti yine xawisate qarisanoha ikkirono mitto looso loosate dandooti.
- Wolqate bue ikkitinori Arrishho, sagale, kinchu kaasale, baatirete kinchonna w.k.labbannreeti.
- Huuro kalaqamu ikkito giddo mittete.

- Huurote taraawora kaa'litanno bisubba kaajjado, dun'amaancho woy gaaze yinannireeti.
- Huuro kalaqama dandiitannohu bisubbate irbamanniiti.
- Huuro mittu bisinni woleho taraawa dandiitannohu bisubbate giddooni callaati.
- Huuro rakke taraabbannohu wolootunni roore kaajjadu bisi giddooniiti.

### Foollishhote Xaaphishshi Rosiishsha

#### I. Aante shiqqino xa'mora halaaleho woy kaphoho yitine dawarre.

1. Way kalaqamannohu mitte haydirojiineteninna lame okisijinetate atome xaadinniiti.
2. Deeunna godowu moolle sagalete daahama qarraati.
3. Afale, efelequnna doombophiicho sagale daahantanno boombe qara kifillaati.
4. Baatirete kinchi giddo kuusaantino mekaanikaalawe wolqaati.
5. Mitturichi millimmosi wolqa jawa ikkituro iibbillisi jilbi kayinni shiimaho.
6. Huuro faffe hadhu bikkini wolqase ajjanni hadhanno.
7. Aye bisino huuro taraawisate rankensa ditaaltanno.
8. Way manchi beettira mikitate qunfe heedhanno gede assanno.
9. Sagale mekaanikaalaawenna kemikaalaawe doogonni liiqantannohu inzaymootu heedhuro callaati.
10. Sagalete daahamate ha'rinshta seeda boombe elimentaarete caanale yinanni.

#### II. “A” Gaamo worronni noo bisara “B” gaamo widoonni worroonni ranke ledora fixoonse.

- | <u>“A”</u>         | <u>“B”</u>                  |
|--------------------|-----------------------------|
| 1. Ayyare          | A. 6,000 meetire lipheessa  |
| 2. Waa             | B. 15,000 meetire lipheessa |
| 3. Xuube           | C. 330 meetire lipheessa    |
| 4. Haqqe           | D. 3,800 meetire lipheessa  |
| 5. Arawete siwiila | E. 3,600 meetire lipheessa  |

### III. Woroonni noo xa'mora taalo dawaro doortine qolle.

1. Iibbillu jilba bikkinannihu
 

A. Termo-meetiretenni	C. Iibbillu jilbinni
B. Wind veenetenni	D. Saantimeetiretenni
2. Sagalete daahamara assa hasiissanno qorowo ikkinohu
 

A. Sagale seekkine corqa	C. Ikkado goxano afi'ra
B. Taaltino sagale ita	D. baalunku
3. Wolqate buicho ikkinohu hiikkoneeti?
 

A. sagale	C. kalaqamu nadaaje
B. arrishshote xawaabba	D. baalunku
4. Umi yannara termo-meetire loosinohu ayeti?
 

A. Danieli Fahrenheit	C. Kelvineti
B. Anders Celsius	D. Galileo
5. Lubbo noonsari giddo liiqante seellate wolqa ikkitannoti hiittenneeti?
 

A. Sagale	C. Shiilo
B. Waya	D. Ayyare
6. ..... korreentete wolqa kalaqate kaa'lannonke
 

C. Sagale	C. haqqete giira
D. Waya	D. shiilo
7. \_\_\_\_\_ baattonkera qara wolqate buichooti.
 

A. Baatto	C. Arrishsho
B. Nadaaje	D. Diilallo
8. Sagalete daahama hanaffannohu \_\_\_\_\_ giddooti.
 

A. saltote	B. afuu	C. shiimiidi helle	D. jawiidi hellee
------------	---------	--------------------	-------------------
9. Qelpheephote kalqete deerra agarino bikkaancho ikkinohu hiikkoneeti?
 

A. Meetire kuube	B. Kiilogiraame	C. Saantimeetiri kuube	D. Giraame
------------------	-----------------	------------------------	------------
10. Mitto looso loosate dandoo \_\_\_\_\_ yinanni.
 

A. sagalete	B. wolqate	C. iibbillu jilba	D. amado
-------------	------------	-------------------	----------
11. Baadilicho bikkaancho ikkinohu hiikkoneeti?
 

A. Ha'ruma	B. Cigile	C. Qaafo	D. Baalunku
------------	-----------	----------	-------------

#### **IV. Aante shiqqino xa'mora dawaro borreessitine qolle.**

1. Wolqate buicho ikkitinore shoole borreessite xawishsha uye.
2. Suude afi'nokki udiinicho bikkinanni gara xawisse.
3. Huuro mittu raginni wolu ragira hiitto ikkite taraabbanooro xawishsha borreessi.
4. Sagalete daahama keeraanchimma agadhinanni gara borreessi.
5. Huuro kalaqantanno bu'a ikkitinore kirte kuli.
6. Babbaxxitino huurote dana kuli.
7. Huuro macciishshate dandoo kaimini manchi beetti macciishshate dandoosi woshshu macciishshate dandoonni ledo heewisiisatenni xawishsha borreesse.
8. Kalaqamunni iibbillu buicho ikkinohu maati? Su'masi calla borreesi.
9. Sagale garunni liiqantanno gede inzayimoota burqatenni irko assitannori sagale liiqate amanyooti kifilla su'mansa borreessi.

# FOOLIISHSHO

## SASE

### Itophiyunita kalaqamu jiro

Xaphooma Hexxo:

Rosaano tenne fooliishsho rossuhu gedensaanni:

- ❖ *Itophiyunniha yannate iibbillu jilbi ikkito affanno;*
- ❖ *Iibbillu jilbanna xeenu geeshsha bikkinni hayyo buuxxanno;*
- ❖ *Wole iibbado gobbuwanni Itophiyunniti ayyarete gade mayra babbaxxitinota ikkitinoro buuxxanno;*
- ❖ *Ayyerete babbaxara kora ikkitino korkaatubba buuxxanno;*
- ❖ *Itophiyu giddo afantanno kalaqamu jiro affanno;*
- ❖ *Itophiyu giddo afamanno ha bushshu dana huwatanno;*
- ❖ *Itophiyunnita bushshu hoshoshamme kora affanno;*
- ❖ *Itophiyu giddo afamanno dubbo huwatanno;*
- ❖ *Itophiyu giddo kalaqamu jiro agaroooshi hayyo buuxxanno;*
- ❖ *Itophiyunnita kalaqamu jiro horoonsi 'nanni hayyo baddanno;*
- ❖ *Way jiro qarra affanno;*
- ❖ *Itophiyunnita way daadonna garbu xiinxallo huwattanno;*
- ❖ *Itophiyunnita babbaxxitino shiilla buuxxanno;*
- ❖ *Itophiyunnita dubbu saada gawajjo buuxxanno;*
- ❖ *Itophiyunnita wolqate buicho buuxxanno;*
- ❖ *Gooffannonna gooffannokki kalaqamu doni badooshshe huwatanno;*
- ❖ *Qara qara Itophiyu qarqarubba qarra huwatanno;*
- ❖ *Qarqaru daafamara kora ikkitinore kula dandiitanno*
- ❖ *Itophiyunnita qarqaru agarooshshi hayyo affanno.*

### **Qara Qara amado**

- 3.1. Itophiyunnita diilallote gade
- 3.2. Itophiyu kalaqamu jiro
- 3.3. Itophiyunniha wolqate dana
- 3.4. Itophiyunniha qara qarqaru qarranna agarate deerra

## Bitima

Manchi beetti hasattonna halcho wonshate manchi beetti loonsonna kalaqamunni afi'nannire baala jirote yinanni. Manchi beetti loosino jirooti yinanniri kaameela, mine, raadoone, shalleette,xexxerrisa w.k. labbannoreeti. Kalaqamunni afi'neemmorri kayinni bushsha, mu'ro, saada, ayyare, shiilo labbannoreeti. Tenne fooliishho giddo rossinanniri Itophiyunita diilallote gadenna kalaqamu jirooti. Diilallote gadenna kalaqamu jiro afi manchi beettira lowo horo uytanno. **Korkaatunno**, manchi beettiti heeshsho biifadonna injiitinota ikka dandiitannohu ikkado jiro heedhuronna ayyarete gade biifado ikkiturooti. Kunni daafira, tenne fooliishhora hala'ladunni Itophiyunnita diilallote gadenna kalaqamu jiro amado rossinanni.

### 3.1 Itophiyunnita diilallote gade

#### Rosate dandoo

Rosaanno konne roso rossuhu gedensaanni:

- ❖ *Diilallote gade mayimma kultanno;*
- ❖ *Diilallote gadenna diilallote ikkito badooshshe xawissanno;*
- ❖ *Diilallote gade kifilla kultanno;*
- ❖ *Diilallote zoone borreessitanno;*
- ❖ *Diilallote gade qorqora hasaabbanno*
- ❖ *Qara Itophiyunnita diilallote wogga borreessitanno.*

#### Qara Qaalla

- |                     |                           |
|---------------------|---------------------------|
| • Diilallote gade   | • Diilallote wogga        |
| • Diilallote zoone  | • Diilallote gade kifilla |
| • Diilallote ikkito |                           |

Rosaano, shoolki kifilera qoqqowi'ne giddo afantanno diilallote gade, diilallote gade kifillanna diilallote qorqorto yaanno rosu umo rossiinoonni. Xa kayinni Itophiyu giddo afantanno diilallote gadenna diilallote kifillare rossiinanni. Aanchitinne leyikki kifile deerrinni soujaati Afiriki giddo afantanno diilallote gade rossinanni.

**Xa'mo:** *Ayyarete gadenna ayyarete ikkito mereero noo badooshshe xawissine kulle.*

Afiriku buudira afantanno gobbuwara iibbillu jilbi babbadooshshira kaima ikkannohu baattote gottimmaati. Itophiyu giddo iibbillu jilbi babbadooshshira qaru kaimi baattote gottiimmanna baattote halli xuruuri babbadooshsheeti. Itophiyu leellannohu baattote hallira iibbado ayyarete zooneraati. Konni qarqarira arrishsho diru giddo lame higge hossi yite umu taalira hossanno.

Itophiyu Gottiimmu iibbillu jilbi akata duuchankawa halallitte baattonni gottiima

baatto widira hinge ha'nanni yannara iibbillu jilbi ajanni ha'ranno. Kayinilla, gottiimu darginni wororricho woy halallitte baatto widira dirrinanni woyte iibbillu jilbi lexxanni haranno. Dirunnihu iibbillu jilbi babbaxxannohu 30°C aleenni iibbado halallitte gobbaranna 10°C woroonni gottiima baatto qarqariraati. Baale ilaali Itophiyu giddo afantanno qarqarra giddo gottiima qarqara ikke diru giddo afamannohu iibbillu jilbi wolu qarqarinni ajanno. Affarete xea baatto qarqarira iibbillu jilbi jawa ikkanno. Ledeno Aliyye Galchimi xea baatto, Galchiminna Wodiidi Soojjaati Itophiyu qarqarira diru giddo leellanno luphiimu iibbillu jilbi 30°C digire sentigireedeeti.

Itophiyu giddo barrunnihu jawiidi iibbilli babbaxxannohu aleenni xe'a baatto Wodiidi Soojjatinna Aliyye Sojjaati 10-15°C aleenni Aliyye Galchiminna Wodiidi Galchimi gottiima baatto qarqariraati.

Iibbillu bikka bikkinanni udiinnicho **Termomeetirete** yinanni. Xeenu jilba bikkinanni udiinnicho kayinni **Renguejete** yinanni. Itophiyu giddo xeenu jilbi baattote qarqarira babbadooshshe afi'rara dandiinohu babbaxxino korkaatinniiti.

### Lawishshaho:

- woggate soorronni;
- diilallote gade babbadooshshinni;
- dubbu batinyi babbadooshshinninna woleno kore labbannorinni xeenu jilbi babbaxxara dandaanno.

#### 3.1.1. Diilallote gadenna diilallote ikkito badooshshe

**Xa'mo:** Diilallote gadenna diilallote ikkito badooshshe kulle.

Diilallote gadenna diilallote ikkito guto assanon akati hee'rirono badooshshe afidhino. Diilallote gade (climate) yaa hala'lodu qarqarira seeda yanna giddo kalaqantanno ayyarete soorrammeeti. Tini soorro lowo darga hala'lado qarqara seeda yanna ikkito 30-35 diri geeshsha noo diilallote gadeeti. Diilallote gade leellishshanohu xeena, iibbille, qiida, shama diilallonna w.k.l ikkito hanqaffinote. Diilallote ikkito yinanniti kayinni mittu qarqarira harancho yanna giddo noo ayyarete ikkito soorramaati. Tini diilallote soorrama xueessu, saatete, barru, lamalatenna aganu giddo noo iibbille, xeena, qarqaru qiindenna diilallote soorrama

ha'rinshooti. Konni daafira arrishsho, xeenu, diilallo, iibbillu, qidu mittu dargira ayyarete ikkito kultannoreeti. Diilallote gade mannu ofolla babbadooshshira qara korkaataati. Manchu beetti hala'ladunni teesannohu mereerimu iibbilli jilbi noo qarqaranna ikkadu xeenu jilbi afamannowaati.

### 3.1.2.Diilallote gade Kifilla

**Diilallote gade kifilla giddo afantannori konni woroonni xawinsoonireeti.**

1. Arrishshote caange
2. Iibbillu jilba
3. Bubbe
4. Ayyarete xiiwo (Air pressure)
5. Wuqiyanoosete dambala
6. Baattote offolla gara
7. Loja (precipitation)
8. Gomichonna w.k.l hanqaffanno.

#### 1. Arrishshote caange:

**Xa'mo:**, Kalaqamunni arrishshotewiinni afi'nanniri maati?

Arrishshote caange afi'neemmu arrishshote xawaabbinniiti. Arrishshote caangei diilallote gade sooramara qara amado ikkite baattote aana ayyarete iibbillu jilba soorritanno ikkitooti. Tenne arrishshote caange xawaabbi wolqa baattote aana noo way bisi fooraru widira soorranno. Qarqaraho ayyarete iibbillu jilba soorrateeni gomichunna loju ikkito soorritanno. Kuni caangi baattote widira hige dirranno yannara baychunni baycho babbaxxanno korkaata afirinno.

**Lawishshaho:**

- baattote ofolla garinni
- barru giddo noo saate deerinni
- yannate gadenni
- qarqaru ayyarete ikkitonna labbannorinni

## 2. Iibbillu jilba

**Xa'mo:** Gomicho ikkannohu maati?

Diilallote ikkito soorramara kora ikknnohu mittu iibbillu jilbaati. Korkaatuno mittu qarqarira noohu iibbillu bikki lexxa woy aja diilallote ikkito soorramara kaima ikkanno.

**Lawishsha:**

- gomichu
- ayyarete qunfe
- lojunna
- ayyarete xiiwo

## 3. Bubbe

**Xa'mo:** Bubbete yaa mayyaatero kulle.

Ayyarete qelpheepho, iibbillu jilbi, ayyarete qunfenna ayyarete mittimma soorritanno. Ayyarete qelpheepho kaimi barrunni barra babbaxxitinohonna hattono ayyarete gadera seeda yanna soorrame abbanno. Diilallote millimmooti yineemmoti kaajjado ayyarete xiiwooti. Diilallo hadhannohu lowo xiiwama heedhanno ragiraati. Rankese kayinni jawa ayyarete xiiwonna shiima ayyarete xiiwo mereero noo badooshshinniiti. Lowo badooshshi heeriyo jawa xiiwo kalaqantanno. Diilallote ranke lexxituro iibbillu ajanni ha'ranno.

## 4. Ayyarete Xiiwo (air pressure)

Ayyarete xiiwo yaa ayyarete ayirrinye baattote aana yaate. Tini xiiwo baattote aana loju amado soorritanno. Ayyarete xiiwo adjuro baattote aana qunfe lexxitanno. Qoleno baattote aana ayyarete xiiwo lexxituro kayinni moolle batidhanno.

## 5. Wuqiyaanoosete Dambala

Wuqiyanooosete dambali ayyarete gade aana soorro abbanno. Yaano, iibbillu jilbi ayyarete aananna loju aana soorro abbanno. Ayyare bubbisannohu qiidadu wuqiyanooosete dambali wolqa adjannahuraati. Ayyarete qelpheepho iibbado wuqiyanooosete widira hadhanno woyte qunfese soorrantanno.

## 6. Baattote ofolla gara

**Xa'mo:** Baattote ofolla yaa mayyaatero lawishshunni xawisse.

Baattote ofolla babbaxino garinni ayyarete gade soorritanno. Ayyarete iibbillu jilbi baattote ofolla garinni babbaxano. korkaatuno, baattote ofolla gari arrishshote widira higinoha ikkiro iibbanno ha ikke arrishshote widira higinokkihu kayinni qiidanno. Baattote gottiimma lexxituro iibbillu jilbi ajanno.

## 7. Loja

**Xa'mo:** Baattote aana loju way afamate korkaata ikkannohu maati?

Ayyaretenni baattote aanira dirritanno qunfe lojaho yinanni. Tini loju qunfe babbaxxitino way bisinni guunjite baattote aana ofoltanno. Loju kalaqamate kora ikkannohu gomichoho.

## 8. Gomicho

**Xa'mo:** Rosaano gordu aana la'inanni gomichi giddosi maa amadinoha lawanno'ne?

Gomichoho yineemmo hu ayyarete giddo way hee'raati. Gomichu ayyarete giddo ayyarete ikkito hiiittoota ikkitanni nooro leellishanno ho.

## Gaamote looso

Rosaano aleenni diilallote gadi tiro rossinoonni qaangannita ikkitanna xa kayinni Itophiyu diilallote gade kifilla ikkitinore gaamotenni borreesse.

### 3.1.3 Diilallote gade zonna

**Xa'mo:** Itophiyunnita diilallote gade zonna borreesse.

Itophiyu giddo babbaxxitino baattote ofolla noosehunni kainohunni diilallose gade babbaxxitinote. Kuni babbadooshshi kaiminni Itophiyu giddo babbaxxitinota ayyarete gade zonna afantanno.

- |                |              |                            |
|----------------|--------------|----------------------------|
| <b>Insano:</b> | I. Qorra     | IV. Gammoojje              |
|                | II. Alichoo  | V. halallu zonna afantanno |
|                | III. Woricho |                            |

**Shae 3.1.** Itophiyu diilallo ayyarete gade zoone

Baadilicho su'ma	Dirunniha iibbillu jilba (seentigreedetenni)	Gottiimma (meetiretenni)	Kalqete deerri su'ma
Qorra (Wurci)	<10	3300 nna aleenni	Afiro Alpine woy Alpiini
A l i c h o (Dega)	10-16	2300-3300	Tempireeti
Woricho (Woyina-dega)	16-20	1500-2300	(Sub tropical ) gami-tiroppikaale
Gammoje (Qolla)	20-28	500-1500	Tiroopikaale
halalla	28-34nna aleenni	500 woroонни	Deeserte

#### I. Qorra diilallote gade afidhino zoone

Qorru diilallote gade afidhino zoone jawa gottiimmanna shiima iibbillu jilba afidhino. Tonne digire saantigireedenni ( $10^{\circ}\text{C}$ ) ajanno iibbillu jilbi noose zooneeti. Afantannohu jajjabba illaaalla noo qarqariraati.

**Lawishshaho:** Wodiidi Gondarera, Wolote, Shawaho, Arsinna Baalle afantanno.

### Kunni qarqarira afantanno illaalla:

- Raasi- Daashini ilaali Gondarete • Guna ilaali Wodiidi Gondarera
- Magazesi ilaali Aliyye Shawara • Baatu ilaali Baale qarqarira

### II. Alichoo diilallote gade afidhino zoone

Shii mu gottiimi qarqaraati. Iibbillu jilbi qorru zoonenni rooranno. Kunni qarqari mannu hee'rate doodhanno baychooti. **Korkaatunno**, ikkadu xeeni hee'rannowaatinna shekkeerete xisso heedhannoikkwiati. Aleenni xawinsoonni korkaatinni kainohunni mannu batinyunni teese hee'rannohura bushshu hoshshooshamme, dubbu mulqamana batinyuni saadate allaalooshi bati'rannowaati. Anfannihu Baale giddo Diinshu, Arsi giddo Cilaalo, Sidaamu giddo Hulatenna Wodiidi Shawara Debresiina afantanno.

### III. Woricho diilallote gade afidhino zoone

Konni qarqarira hala'ladunni giwirinnu loosi loosamanno. Mu'ro, weesetenna gidu laalchi hala'ladunni afamanno.

### IV. Gamoojje diilallote gade afidhino zoone

Tini gamoojjete ayyarete zoone afantannohu Itophiyu giddo xeichaamu qarqaraati. Konni qarqarira iibbillu jilbbi 20°C- 28°C geeshsha ikkanno.

### V. Halalla diilallote gade afidhino zoone

Iibbillu jilbbi 28°C aleenni ikkanno. Waa hasi'noonni bikkinni afi'rate dandiinannikki dargaati. Mannu saada allaa'lanni dargunni darga ha'ranni hee'ranno qarqaraati. Tenne ayyarete gade anfannihu Itophiyaho Sumaaletenna Jibuutete qarqaraati.

#### 3.1.4 Diilallote gade qorqora (control of climate)

**Xa'mo:** Itophiyunnita diiallote gade qorqoro kulle.

### Diilallote gade qorqora korkaata ikkannori:

- laatuude woy arrishhote sammo • diilallonna ayyarete xiiwo
- wuqiyanoosete dambala • baattote gottimma
- baattotenna way fiti'ra • laalu golamme

### 3.1.5. Qara Itophiyunnita diilallote gade wogga

**Xa'mo:** *Itophiyu giddo afantannota diilallote gade yanna kulle.*

Ibbadonna moola diilallo noo qarqarira iibbillu jilbi jawaho. Qara Itophiyunnita diilallote gade wogga ikkitinnori moollenna qunfe noo woggaati

Moola diilallote wogga yannara xeena ganannokki yannaati. Moolanna qunfete wogga baxxitannohu iibbillu jilbinna dirranno xeeniiti.

#### Wogga baadillichote egennonni shoolewa gaammanni:

- hawado (summer)
- arro (winter)
- birra (Autumn)
- badheessa (spring)

**Shae 3.2.** Diilallote gadenna wogga xawissanno shae

Aliyye birxichira		Wodiidi birxichira	
Ella	Hawado (Kiremt)	Ella	Arro
Maajja		Maajja	
Woxawaajje		Woxawaajje	
Wocawaaro	Birra (Meher)	Wocawaaro	Badheessa
Birra		Birra	
Boccaasa		Boccaasa	
Sadaasa	Arro (Bega)	Sadaasa	Hawado
Arfaasa		Arfaasa	
Ammajje		Ammajje	
Badheessa	Badheessa (Belg)	Badheessa	Birra
Dotteessa		Dotteessa	
Onkoleessa		Onkoleessa	

### Rosiishsha 3.1

#### I. Woroonni no xa'muwara halaaleho woy kaphoho yitine dawarre.

1. Halallitte baattonni gottiima baatto widira hinge ha'nanni yannara iibbillu jilbi ajanno.
2. Xeenu jilba bikkinanni udiinicho termomeetirete yinanni.
3. Diilallote gade xeena ikkinninna iibbille dihanqaffanno.
4. Qorru diilallote gade afidhino zoone jawa gottiimmanna shiima iibbillu jilba afidhinno.
5. Moolanna qunfete wogga Itophiyho qara diilallote gade woggaati.

#### II. Itophiyu diilallote woy ayyarete gade zoone baadilicho su'manna

##### **gottiimmansa fixonsse.**

“A” gaamo

1. Qorra
2. Alichoo
3. Woricho
4. Gammoojje
5. Halalla

“B” gaamo

- A. 500 meetire woroonni
- B. 2300-3300 meetire
- C. 3300nna aleenni
- D. 500- 1500 meetire
- E. 1500-2300 meetire

#### III. Konni shiqqino xa'muwara dawaro doortine dawarre.

1. Aliyye birxichira birrate diilallote wogga aganna ikkinoikkihu hiikkoneeti?
 

A. Ella	B. Wocawaaro	C. Birra	D. Boccaasa
---------	--------------	----------	-------------
2. .... diilallote zoone anfannihu Itophiyu Sumaaletenna Jibuutete qarqariraati.
 

A. Gamoojjete	B. Woricho	C. Halalle	D. Alichu
---------------	------------	------------	-----------
3. Qorru diilallote zoone anfanihu
 

A. Wodiidi Gondarera	B. Wolote	C. Baale	D. Baalunku
----------------------	-----------	----------	-------------
4. 30 – 35 diri geeshsha noo iibbille, xeenanna qiida xaphi assite xawissannoti.
 

A. Diilallote ikkito	B. Diilallote gade
C. Diilallote badooshshe	D. Diilallote wogga

5. Diilallote gadenna wogga Aliyye birxichira birra ikkituro Wodiidi birxichira ..... wogga ikkitanno.

A. Hawado    B. Birra    C. Badheesa    D. Arro

#### **IV. Woroonni shiqqinno xa'muwara dawaro borreessitine qolle.**

1. Diilallote gade qorqora ikkitinore borreesse.
2. Alichu diilallote gade afidhino zoone anfannihu hiikko qarqariraati?
3. Qorru diilallote gade afidhino zoone qarqarira afantanno ilaalla ikkitinore borreesse.
4. Itophiyu diilallote gade kifilla borreessitine mitte mittentera xawishsha uyiyye.
5. Diilallote gadenna diilallote ikkito badooshshe xawisse

### **3.2 Itophiyu kalaqamu jiro**

#### **Rosate dandoo**

Rosaanno konne roso rossuhu gedensaanni:

- ❖ *Itophiyu kalaqamu jiro dana kultanno;*
- ❖ *Itophiyu bushshu dananna bushshu hoshoo shamme xawissanno;*
- ❖ *Itophiyu dubbu qarra borreessitanno;*
- ❖ *Itophiyu kalaqamu jiro agarooshshi assoote hasaabbanno;*
- ❖ *Way jiro garunni horoonsi'nanni doogo xawissanno;*
- ❖ *Itophiyunnita way jiro gawajjitanota qara korkaatubba tittirte borreessitanno*
- ❖ *Addi addi Itophiyu kalaqamu way dirranno daado kultanno.*

#### **Qara qara qaalla**

- |                        |                   |
|------------------------|-------------------|
| • Kalaqamu jiro        | • Gobba saada     |
| • Riqiwantanno jiro    | • Qarqaru daafama |
| • Dubbo                | • Way daado       |
| • Riqiwantannokki jiro |                   |

Rosaano, shoole kifilera qoqqowi'ne giddo leellitanno kalaqamu jiro rossine dagginoonni qaangannite. Tenne kifile deerrinni Itophiyu giddo afantanno kalaqamu jirore rossinanni. Aanteno leyikki kifilera Soojjaati Afiriki giddo afantanno kalaqamu jirore rossinanni.

Manchi beetti hasattonna halcho wonshate manchi beetti loosinorennakalaqamunni afi'neemmore baala **jirote** yinanni. Jirote yineemmore lamewa gaamanni. Insano manchi beetti loosinorennakalaqamunni anfannireeti. **Lawishshaho:** ayyare, waa, bushsha, kalaqamu zayte, kinchu kaasalenna shiilla baalu kalaqamu jirooti yinannireeti. Manchi beetti loosino jirooti yineemmore kayinni kaameela, shalleette xexxirrisanna w.k. labbannoreeti. Kalaqamunni afi'nanni jiro lamewa gaammanni. **Insano:**

- A.Riqiwantannonna
- B.Riqiwantannokkita.

#### **A. Riqiwantannota kalaqamu jiro**

Ayetino kalaqamu jiro wirro higgannotanna umonsa riqiwa dandiitannore baala riqiwantanno jirooti yinanni.

**Lawishshaho:** Way, mu'ro, arrishshote xawabbi, bushshu, saadanna diilallo labbannori baalu umonsa riqiwa dandiitanno kalaqamu jirooti.

#### **B. Riqiwantannoikkita kalaqamu jiro**

Ayetino kalaqamu jiro ikkite uminsanni wirro higge riqiwa dandiitannokkire baala riqiwantannokki jiro yine woshshinanni. Tini kalaqamunni goffanno jiro goffannoki gedenna ajjannoki gede manchi beetti garunni horoonsi'ra hasiissannosi.

**Lawishshaho:** Camo, koppere, maxine, nooru kincho, shaafa, alimunueeme, kinchu kaasalenna labbannori baattote giddo anfanni siwilunna siwillu kaarso ikkitinore baala umonsa mitte higge gooffuha ikkilo shotunni riqiwa dandiineemmokki kalaqamu jirooti.

### 3.2.1. Itophiyunniha bushshu dana

**Xa'mo:** *Itophiyinke giddo afamannoха bushshu dana hiiittooho?*

Bushshu mu'rote lophora hasiisanno. Giwirinnu loosi horora bushshu hasiisanno. Mu'ro, saadanna mannu heeshshotenni hee'ra dandiitannohu bushshu hee'rirooti. Hala'ladunni baatto loosidhe galtinno gobbuwara, lophonsa kaimira bushshu qaraho. Bushshu kalaqama dandaannohu fizikaalaawenna keemikaalaawe ayyarete ikkito soorronniiti.

#### Itophiyu giddo afamannoха bushshu dan

- |                            |                             |
|----------------------------|-----------------------------|
| A. Nitosolisi (Nitolsols)  | F. Regosolisi (Regosolis)   |
| B. Akirisolisi (Acrisols)  | G. Zerosolisi (zerosols)    |
| C. Vertisolisi (Vertisols) | H. Yemosolisi (Yemosols)    |
| D. Kanbisolisi (Canbisols) | I. Luuwisolisi (Luuisols)   |
| E. Litisolisi (Lithosols)  | J. Fuluvisolisi (Fluvisols) |

#### A. Nitosolisi (Nitolsols)

Doraamo duumo kuula afi'rino bushsha ikke kalaqaminohuno baattote giddooydi ruqaninniiti. Afamannoхuno gottiima eaa fulcho baattora alichaamo shaqqado bushshinna kalaqamu dubbi noo qarqarira ikke jawu xeeni dirrannowaati. Hala'ladunni Itophiyaho Wodiidoonni, Soojaati Galchimaanni, Soojaatoonni, mereerimunna Aliyye gottiimu Itophiyiraati.

Jawa xena gananno qarqara ikkasini giddosi shiillate anje noosihonna asiide giddosi amadinoho. Wayinni shiiltanno bushshu giddo afantanno shiilo ajjano. wayinni shiiltannokki shiilla ayrenenna alumineeme batinyunni afantanno qarqaraati. Giddosi qunfe hala'ladunni amadino bushshaati. Bunaho, guma guminsano mu'rоранна Weesete injaano bushsha ikkinohura baatto loosidhe heedhanno daga batinyunni heedhannowaati.

### B. Akirisolisi (Acrisols)

Giwirinnu loosira injaannokkikhona giddosi afantano niyutireente xeenu batinyinni kainohunni ajanno bushshaati. Itophiyu giddo Wodiidi Galchimi gottiimu qarqarira afamanno.

### C. Vertisolisi (Vertisols)

Doraamo kolishho bushsha ikke kalaqamanno baattote giddoydi iibbillinni kinnate hiiqqaqqammenniiti. Itophiyaho Aliyye Galchimi, mereerimunna Wodiidi Soojaati gottiimu qarqarira afamanno. Nitrosoli bushshinni baxxanohu, qunfenna moollete wogga noosihuraati. Giwirinnu loosira injannokkiho.

Moollete woggara kuni dhodhohanni lixannina lowo geeshsha moollanni ha'ranno bushshaati. Xeena gananno yannara kayinni lixa ikkannonna mimmitoho qa'manno. Baatto loosi'rate horo aannokki daafira kunni qarqarira hee'ranno manni saada alaa'lite galtannoreeti.

### D. Kanbisolisi (Canbisols)

Lowo linxe afi'rinokikhona afamanno huno gottiimu, mereerimunna Aliyye baattote qarqariraati. Batinyuni giwirinna loonsannikki qarqara ikke kalaqamu mu'ro afantanno bushshaati.

### E. Litisolisi (Lithosols)

Kalaqamanno baattora ikke qarqarahono lowo qunfe nookki bushshu danaati. Giwirinnu loosira horoonsi'nannikkiho. Itophiyu giddo afamanno Wodiidi Soojaatina, Galchimi Soojaati xeichaame baatto qarqariraati.

### F. Regosolisi (Regosolis)

Harancho yananni kalaqaminoha ikke linxe afi'rinoikiho. Shaafaamo shotanna hoshooshamanno. Waa giddosi lowo yannara keeshshiishannokkiho. Shiimu xeeni dirrannohonna giwirinnu loosira hala'lado horo annokkiho. Afamanno huno Itophiyaho Danakillinna Soojaati Ugaadeenete qarqariraati.

### G. Zerosolisi (zerosols)

Giddosi linxe afi'rinokkihonna moolanna mereerima moola qarqarira afamanno bushshaati. Jawa maxinete amado afi'nohonna mu'ro batinyunni afantanoikki bushshaati. Giwirinnu loosira lowo horo annokkiho.

Konni qarqarira giwirinnu loosi gumaamo ikkannohu gorsu loosi irko heedhuro callaati. Anfannihuno Wodiidi Soojjaati, Wodiidi Galchiminna, Aliyye Soojjaati xea baatto qarqariraati.

### H. Yemosolisi (Yemosols)

Itophiyaho halallittenna mereerima moola ayyare noo qarqarira afamanno. Zerosoli bushshinni roore giddosi maxine amadino moola bushshaati. Giddosi asiide noosihura mu'rote diinjanno.

### I. Luuwisolisi (Luuisols)

Luuw isoli bushshi giddosi duucha kemikaalete niyutireente afi'rino daafira baatto loosidhe galtinorira injanno. Taalonna gottiima baatto ikkituro mannu saada alaa'lanno.

Veritisoli bushshi gede konne bushsha saadatenni hawuurate di"injaanno. Arro moolano bushsha ikke hawado kayinni qa'ma ikkanno bushshaati. Itophiyu giddo afamanno. Xaanu garbi qarqarira, Wodiidi qarqarira, mereerimunna Soojjaati gottiimanna Wodiidi xeichaame baatto qarqariraati.

### J. Fuluvisolisi (Fluvisols)

Muli yannanni kalaqamino shaqqado bushshaati. Kalaqaminohuno wayinninna laggate hoshoshammenni kae boonnaamenna xea baattora kuusamanno bushshaati. Giwirinnu loosira injanno. **Korkaatuno**, taalo baatto qarqarira, laggatenna baattote giddoydi waynni jiraamo ikkino qarqarira afamanno bushsha ikkasinniiti. Itophiyu giddo afamanno. Wodiidi Abbayi lagira, Wabishebele, Gannaale, Oomo, Baaro, Abbay laginna lixxino baatto qarqariraati.

## **Itophiyunnita bushshu hoshoooshamme korkaata**

### **Xa'mo: Bushshu hoshoooshamme yaa mayyaate?**

Bushshuhoshoooshamme yaakalaqamunni baattonnihualiidi bushshi babbetenninna wayinni mittu baychinni kae wolu baychira ha'rate. Bushshu hoshoooshamme yannara bushshu mittu baychinni hayishshamme xea baatto widira hoshoooshamme ha'rano. Bushshu hoshoooshamme wo'ma woyte kalaqantanno ikkito ikkite tini hoshoooshamme rakkinota woy keeshshitino ha'rinsho ikkitara dandiitanno.

### **Itophiyu bushshira hoshoooshammete kora ikkitinori:**

- jawu xeeninni dirranno lolahi
- giwirinnu loosi haawittotenni loonsanni ogimmanni ikka hooga
- shiimu bayichira hala'lado saada lowo yanna allaala
- baattote giddo noo shiilla uma
- mannu babbaxxino korkaatira dubbo buujjanna woluno babbaxxino korkaati Itophiyaho bushshu hoshoooshammera qara korubbaati.

### **Itophiyu giddo bushshu jiro qorowate baadillichonna rosantino ogimma no.**

Bushshu hoshoooshamme qorowate yaa bushshu babbaxxino korkaatinni mittu darginni ha're ba'annokki gede assate ogimmaati.

### **Itophiyinke giddo baadillichonna rosantino bushshu hoshoooshamme gargarto ogimma yinanniri:**

- Konsoonnita bushshu hoshoooshammannokki gede karo kartanno ogimma;
- giwirinna loonsanni baatto babbaxxino qarqarira hawiittotenni hawuurate ogimma;
- giwirinnu yannara mu'ro mittu baychira soorrinanni wixate ogimma;
- giwirinna loonsanni baatto gaangaawira diilallo gargartanno mu'ro kaaisate ogimmana
- w.k.1 Itophiyu giddo bushshu hoshoooshammannokki gede gargadhinanni ogimmaati.

### Rosiishsha 3.2.1

#### I. Aante shiqqinno xa'muwara halaaleho woy kaphoho yitine dawarre

1. Konsoonnita bushshu hoshooshammannokki gede horoonsidhanno ogimma gorsu ogimma yinanni.
2. Shiimu baychira hala'lado saada lowo yanna allaala bushshu hoshooshammera mitto koraati.
3. Filuvisoli bushshi, muli yanna kalaqamino shaqadonna giwirinnu loosira injaanno bushshaati.

#### II. Woroonni shiqqinno xa'mora harancho dawaro borreessitine qolle.

1. Zerosoli bushshi Itophiyinke giddo hiikko qarqarira afamanno?
2. Itophiyaho Affareetenna Soojaati Ugaadeeni qarqarira afamanno bushshi dani hiikkonneeti?
3. Itophiyu giddo afamannoha bushshu dana borreesse.

### 3.2.2. Itophiyunnita shiilote jiro

Itophiyu giddo babbaxxitino targubbara babbaxxitino shiilla afantanno. Gobbankera duucha baattote shiilla afantanno ikkironno horote aana dihossino.

**Xa'mo:** *Itophiyu giddo afantanno shiilla ikkitinore borreesse.*

#### Siwiila ikkitino shiilla:

- Culka (Gold) Itophiyu giddo Adoolaho, Ageremariyam, Arero, Moyale Akoobonna Tigrayeteeti.
- Pilatineemi (Platinum), Itophiyaho Galchimi qarqarira yaano, Aliyye Soojaatira Yubdo, Aliyye Gimbinna Akoobo Gaambeellu qoqqowiraati.
- Tatalumi, Itophiyaho Wodiidi Soojaatira Shaakiso giddo Adoolaho, Kentichi qarqarira afantanno.
- Nikele, Itophiyaho Adoolu qarqarira afantano.

### **Siwila ikkitinokki shiilla**

- Maxine, Itophiyaho Aliyye xe'a baattora Affarete qoqqowira Denkaali (Daloli) yinanni xe'a baattoraati.
- Nooru kincho, Itophiyaho Tigrayete, Shawanna Harargete afamanoha ikke ijarahonna ijaru loosira, doogote loosira, Chooketenna Simintote loosira horo aano.
- Doru Itophiyu giddo babbaxxino dargira afamannoha ikke addi addi doru uduunicho loosate horo aanonke.
- Silka (silica) Itophiyaho Hararete, Shawa, Gonderete, Goojjaamete, Sidaamu qoqqowira, Arsi, Tigrayetenna Wollagaho afamaanno shiilooti. Tini shiilo maxanxare (eye glass) industurera horo uyitanno.
- Petroleme: Itophiyaho Ugaadenete gaangaawira afantano.
- Kinchu kasale: Itophiyaho Shawanna Sidaamu qoqqowi giddo afantanno.

### **Itophiyu giddo afantanno shiilla horoonsi'rate qarra ikkinori:**

- ikkado womaashshu eo hooga
- shiillate egennonni fullakkino fullahaano anje hee'ra
- shiilla heedhanno qarqara bada dandiitanno tekinoloje hooga
- lophote horora hasiisanno udiinnichi, shiillate ledo amadaminu udiinnichi hooga
- shiillate industire gobbate giddo tantanamate anje hee'ra
- shiilla noo qarqarira massitannoti hodhishunna doogote anje heera gobbanke noose shiillate jiro horoonsirate qara qarrubbaati.

### **Itophiyu giddo afantanno shiilla horoonsirate qarra tirranni doogo:**

- baaburu hodhishshi doogo qineessa
- Itophiyu giddo afantanno shiilla egennotenni horoonsi'rate ogimma kalaqa
- shiillate ledo amadaminu looso kalaqa
- shiillate industire Itophiyu giddo jawaatanno gede illacha tuga
- baadilicho ogimmanni shiilla horoonsidhanno daga shiillate ogimmanni qinaabbino ogeeyyenni riqiwa
- shiillate baxxitino illacha tunga loosanna w.k.l ogimma horoonsi'ra shiilla gobbatenni ba'annokki gede qorqorto assate qara qarra tirranni ogimmaati.

Mitte gobba shiilo garunninna egennotenni horoonsi'ra hoogguro giddose no shiilla goffanni hadhanno. Shiilla gobbatenni goffanno yannara mitte gobba lopho badhera higganno. Gobbankera qansootu baalu shiilla garimale horoonsidhanni leeltanno. Manchi beetti baalu garunni shiilla horoonsi'ra hasiissannosi.

### Rosiishsha 3.2.2

#### I. Aante shiqqinno xa'muwa halaaleho woy kaphoho yitinanni dawarre.

1. Baadilicho ogimmanni shiilla horoonsidhanno daga shiillate ogeeyyenni riqiwa shiillate aana qara abbitanno.
2. Shiilla heedhanno qarqara bada dandiitanno tekinolooje Itophiyinke giddo hala'ladunni afantanno.
3. Kinchu kasale Itophiyu giddo afantannohu Sidaamu qoqqowi giddo callaati.

#### II. Aante shiqqinno xa'mora xawishsha uytine kifilete filiqishsha shiqishshe.

1. Pilaatineeme Itophiyaho afantanno qarqara kulle.
2. Itophiyu giddo shiilla horoonsi'ratenna keeshshiishate qarri maati?

### 3.2.3. Itophiyunnita kalaqamu dubbu jiro

**Xa'mo:** *Kalaqamu dubbo yaa mayyaate?*

Kalaqamu dubbi mu'ro yaa addi addi haqqe mittu qarqarira kalaqamu tuudantinowaati. Tini haqqe manchi beetti irko nookkiha uminsanni mudhino mu'rooti. Tenne kalaqamu dubbi mu'ro babbaxxitino beehaache afidhino.

- Insano:**
- A. Ilaalame baatto mu'ro
  - B. Dubbu mu'ro
  - C. Haqqetenna hayissote mu'ro
  - D. Mereerima halallitte baatto mu'ro
  - E. Moola halallitte baatto mu'rooti.

### A. Haalaame baatto mu'ro (alpine vegetation)

Tini mu'ro afantannohu ilaalamme baatto diilallote gade afidhino qiidado ayyarete zooneraati. Itophiyu giddo afantannohu: Aliyyeenni, mereerimu Itophiyira, Wodiidi Galchimiranna Wodiidi Soojjaati gottiima baatto qarqariraati. Kuni dargi afamannohu 3300 meetire aleenni gotti yino birxxichiraati.

#### Konne qarqara anfanni ilaali:

- Raasi- Daashini
- Cilaalo
- Baale
- Guna
- Baale

### B. Dubbu mu'ro (forest)

Mittu qarqarira haqqe tuudante heedhannota dubboho yinanni. Dubbu afamannohu 450 meetirenni kayse 3500 meetireraati. Babbaxxitino mu'ronna saada heedhanno baychooti. Konni qarqarira diru xeenu jilbi babbaxxannohu 200 miili meetirenni kayise 2200 milli meetire geeshshi mereerooti. Itophiyu giddo baattote gottiimma kaiminni dubbo gaammannihi:

- I. Gottiima baatto dubbonna
- II. Halallitte baatto dubbo yinneeti.

#### I. Gottiima baatto dubbo

Itophiyaho gottiima baatto qarqarira hee'ranno dubbi giddo afantanno haqqe: hoomme, leemma, dagucho, ejedhe, daadakko haqqenna wolootuno jajjabba haqqe leellitanno dubbooti.

#### II. Halallite baatto dubbo

Konni dubbi giddo babbaxxitino haqqu mu'ronna way qarqarira heedhanno mu'ro karsante heedhanno dubbooti.

#### Halallite baatto dubbi haqqe leellitannohu:

- Awaashi
- Waabishebelete
- Gannaale laga

Qilxonna Odakkote haqqe afantannohu halallite baatto dubbiraati. Shiimmadda babbaxxitino mu'ro batinyunni leellitannowaati.

**Lawishshaho:** Waaccote haqqe halallite baattote dubbi giddo afantanno mu'ro giddo mittete.

Mu'rote suudi kaiminni halallite baatto dubbo lamewa gaammanni.

- a. Hala'lado daro haqqe dubbo
- b. Hoommete (konferese) dubbo yinannireeti.

#### **a. Hala'lado daro haqqe dubbo**

Itophiyu giddo hala'lado daro dubbi afamannohu baattote hallira iibbadunna gottiimu qarqariraati. Wodiidi Galchimira Wollaggaho, Kafaho, Ilbabooretenna Gamo-goofaho leellitannoti hala'lado daro dubbi haqqeeti. Kuni dubbi afamannohu 1500 meetirennna 1800 meetire baaru gaxira aleenni leel'annoha ikke dirunnihu xeenu jilbi jawa ikke leel'annowaati.

**Lawishshaho:**

- ejersa
- xewerrakko
- masincho
- Waaddicho
- dubbu buna

#### **b. Hoommete haqqe dubbo**

Shiimmammaadda daro afidhinonna guma gummisanno mu'ro sirchinni afamanno dubbooti. Qoleno shota haqqe batinyunni afantannowaati. Egennantinoti konni qarqarira afantanno haqqe hoommetenna daguchote.

Hoommete haqqe Itophiyu giddo hala'ladunni afantannohu 2000 meetire aleenni gottiimu qarqarira Arsi Baaleraati. Daguchote haqqe gobbankera afantannohu Harargete, Arsi Baalenna Wollaggaho gottiimu qarqariraati.

### C. Haqqetenna hayissote mu'ro

Giddonsa haqqu, shiimmaaddanna harammaadda mu'ro heedhannowaati. Afantanno hu gottiimunna xea baatto qarqariraati. Diru xeeni bikki babbaxxanno hu 200 miili meetirennu 1400 millimeetiremereerooti.

### D. Mereerima halallitte baatto mu'ro

Konni qarqarira afantanno mu'ro kalaqaminsanni moolle gargadhatu dandiitanno hayyo noonsareeti.

#### Mereerima halallitte baatto mu'ro moolle gargadhitanno hayyo:

- rumushshonsa bushshu giddora lowo geeshsha lixisse soqqatenni
- daronsa shiimmaaddaanna assite way fooraro gargadhitanno hayyonninna
- daronsa aana zaytete biso afidhinohu kainohunni way fooraro gargadhitanno hayyo noonsa.

Aliye Galchimira Matamma, Aliye Soojaatira Affaarete, Wodiidi Soojaatira Ugaadeenetenna Wodiidoonni Booranaho Itophiyaho qacete qarqarira afantanno mu'rooti.

### E. Moola halallitte baatto mu'ro

Moola halallitte baatto qarqari duucha mu'ro heedhannokki qarqaraati. Moola halallitte baatto Itophiyaho mereerima halallitte halallu mu'ro afantanno. Konni qarqari lowo geeshsha iibbadohonna barru iibbillu jilbi 27 digiree saanti gireede aleenni ikkanno qarqaraati.

Jawidihu iibbillu jilbi 50 digiri saantigireede ikkanno qarqaraati. Diru xenu jilbi 200 miililitire woroони ikkanno. halalli qarqarira heedhanno mu'ronna saada moolle gargadhitanno hayyo afidhinnoreeti. Konni qarqarira afantanno mu'ro lawishshaho ikkitinori utaamo carrenna w.k.l.

## **Itophiyunnita dubbu buujjama kora**

Mannu afatenninno ikko afa hoogatenni dubbo dolanni leellanno. Manchi beetti dubbu haqqe babbaxxitino horora dolanni haqqe guddanno rosicho dubbu buujjama yinanni.

### **Itophiyaho dubbu buujjamara qara korkaata ikkitinori:**

- giirate haqqe afi'rate;
- quchuma halashshate;
- baattote looso halashshirate hasatto;
- babbaxxinoha haqqunni loonsanni udiinicho loosi'rate;
- saada alaa'linanni baatto hala'lishirate hasatto;
- addi addi kaggate horo afi'ratenna
- doogo loosatenna babbaxxitino horo afi'rate yee manchi beetti dubbu haqqe buujjanno.

### **Itophiyaho kalaqamu jiro agaroooshshi hayyo**

Kalaqamu jiro gobbankera babbaxxitino doogonni ajjanninna ba'anni hadhanni leellitanno. Tini kalaqamu jiro ba'annokki gede gobbankera babbaxxitino hayyo xaa yannara horoonsi'nanni hee'noonni.

### **Lawishshaho:**

- konni albanni haqqe nooti dalante goffinno darga marro qolle haqqe kaasatenni;
- haqqe heedhe egentinokki baycho haaro haqqe kaasatenni;
- bushshu lolahunni hoshoshamannokki gede karo karatenni;
- baatto haawitto hawuuratenni;
- mu'ro soorrine haaro mu'ro kaasatenninna wolen babbaxxitino haqqe kaasatenni kalaqamu dubbi ba'annokki gede gobbanke gargadhitanni leellitanno.

### Rosiishsha 3.2.3

#### I. Aante shiqqino xa'muwara halaaleho woy kaphoho yitine dawarre.

1. Ilalaame baatto mu'ro 3300 meetire baaru gaxira aleenni gotti yino birxxichira anfanni.
2. Haqqe heedhe egentinokki baycho haaro haqqe kaasanna baatto haawiitto loosa dubbo buujitanno korubbaati.
3. Shiimmamaadda daro afidhino mu'ro sirchi afamannohu qilxote dubbiraati.
4. Moola halallite baatto qarqarira duucha mu'ro sirchi hee'ranno qarqaraati.

#### II. Aante shiqqino xa'muwara dowaro borreessitine qolle.

1. Itophiyu giddo dubbu buujjamara kora ikkitinore borreesse.
2. Mereerima halallitte baatto mu'ro moolle gargadhitanno hayyo aana hasaabbine dawaro'ne borrootenni qolle.

#### 3.2.4. Itophiyunnita way jiro

Battonniti 71 anga wayinni diwantinote. Tenne way amado giddo qara ikkitinori wuqiyanosenna baaraho. Woolotu kayinni lagu, garbu, caffu baatto way maxine giddosi amadinokkinna baattote aaniidi waati. Kuni giddosi maxine noosikki way duuchanta baattote qarqarira afamanoha ikkirono geeshshisi dargunni darga babbaxxanohu. Itophiyu giddo afamanno way babbaxxitino horo aanno.

#### Lawishshaho:

- |                       |                 |
|-----------------------|-----------------|
| • qulxu'me ceate      | • hodhishshaho  |
| • korreentete wolqara | • gorsu loosira |
| • turizimete eora     |                 |

### 3.2.4.1 Itophiyunniha way jiroha qara qarra

Itophiyu kalqetenna Afiriku deerrinni way jironni affaminoha ikkirono way jironni egennamino deerrinni horote aana hosiisirate didandiino. Tenne horote aana hosiisirate qara qarra ikkinori:

- way aana wo'ma xiinxallo assa hooga;
- way amadooshshinna tekinoloojete anje hee'ra;
- way amadooshshi aana yoote qoso jawaata hooga;
- jajjabbaa lagga afantannohu lophotenni badhera gattino qarqarira hee'ra;
- baattotte giddoonni noo way jiro horoonsi'rate wo'ma egenno hooganna
- gorsu loosi hayyonni fullahino manni anje hee'ranna wolen konne lawanno qarri Itophiyu gobbankera way jiro amadooshshi qarraati.

### 3.2.4.2. Itophiyu garbuwanna akatansa

Hala'lado way biso ikke gaangaawisi baattotenni doyissaminoho. Giddosi maxinete shiilo noosikkiho. Duucha garbuwara giddonsara eanno timaano afidhinohu laggatenninna xuuxxote wayinniiti. Kalaqamu garbaati yinanniri mannu wolqa woy eggeno nookkiha kalaqamunni kalaqantino garbuwaati. Duucha lagga loosantinohu mannunni ikkite horo uytannohu industiretenna giwirinnu loosiraati. Tini mannu loosino garbuwa babbaxxitino horo uytanno.

#### Lawishshaho:

- korreentete wolqa burqisate;
- gorsu loosiranna
- qulxume woshshaadate.

Gobbanke giddo afantanno garbuwa lixxino baattonna gottiimu baatto garbuwa gaamo afidhino.

**Lixxino baatto garbuwa ikkitinori:** Hawaasi, Ziwayetenna, laanganno garbaati.

**Gottiimu baatto garbuwa ikkitinori:** Xaana, Hayqinna Ashenge garbaati.

## Kifile looso

1. Itophiyinke giddo afamanno waa horoonsirate qara qarrubba ikkitinori hiik-kuriiti?
2. Itophiyinke giddo mannu loosino garbuwa uytanno horo borreesesse.
3. Itophiyu laggate akata borreesitine xawishsha uyiyye.

### 3.2.4.3. Itophiyunnita qara way daado

Way lolahanno woy haranno doogo way daadooti yinanni. Way daado kalaqantannohu lagunninna lagu giddora eanno way bisinniiti. Lagu kalaqamanno baycho lagu kaima yine woshshinanni. Way daade iillanno baycho kaynni way afoo (mouth of rivers) yinanni. Xaphoomunni, way daado kalaqama dandiitannohu gottiimu qarqarinni lolakkanno lagganniiti. Itophiyu giddo afantanno daado kalaqama dandiitannohu baattote gottiimma suudinniiti.

#### Insano:

- baattote gottiimu darginni fultanno daado Galchimi Wodiidi xawu baattora daaddanno;
- lolahunni xeino baatto (rift valley) giddora eanno daadonnninna
- daaddanno lagga korinni dhookkinonna daadhantino daao korinni kalaqantino.

#### Itophiyu giddo afantanno qara way daado yineemmori:

- A. Galchimi ragi daado
- B. Wodiidi Soojaati daado
- C. Xeino baatto ragi daado

#### A. Galchimi ragi daado

Galchimi ragi daado wolootu way daado giddonni jawiidi daadooti. Baattonke daado giddo 40 anga amaddannotenna 60 anga diru xena gobbara fushshitanno daadooti. Tini daado hanqaffannohu Galchimi ragaanni, Galchimi Itophiyanna Galchimi hallali baatto geeshsha iillitanno daadooti.

## Tenne daado giddo afantanno lagga

- Tekeze                  • Abbayinna
- Baaro                  • Gibe

Gibe lagi wolootunni baxxanohu Wodiidi lagira daadanno laga ikkasiinniiti. Wolootu gattinori Abbay, Tekezenna Baaro Galchimi lagira daaddanni Nayli lagira xaaddannoreetinna Mediteraaniyu Baara tintanoreeti.

Abbay lagi amadotenni jawa ikkinohonna tenne daadora jawiidi qeecha afi'noho. Abbay lagi hala'linyesi 199,812 kiilomeetire iskuweere ikkanno. Itophiyaho Amaara, Oromiyanna Beenishanguli Gumuzete qoqqowo hanqafinoho. Abbayinna Abbaya tintanno lagga dirunni 65 anga iiminni dirranno xeena gobbara fushshitanno. Abbayi lagi kaimi xaanu garbinni ikke 1450 kiilomeetire fafe harihu gedensaani **Kaartumete waajju Nayli** lagi ledo Suudaanete **Nayli laga** kalaqanno.

Tekezenna Tekeze tintanno timo diru giddo iiminni dirranno xeena 12 anga gobbara fushshitanno daadooti. Tekeze daado tintanno timaasine Angirebinna Goang, mereerimu Itophiyu gottiimu qarqarinni ba'annoreeti. Tekeze lagi Suudaanete Atibari yine woshinanniha ikke Nayli laga mare timanno.

Baaro, Akobo lagi daado shaqqado gottiima baatto widiranna Wodiidi Galchimi Itophiyiraati. Diru giddo 17 anga iimini dirranno xeena lolahunni gobbara fushshanno. Baaro, Akobo lagi gaangaawi 75,912 kiilo meetire iskuwere hanqaffannoha ikke Baaronna Akoobo mitteenni Suudaanete xaadde Sobaati yinanni laga kalaqqanno.

- Beenishangul-Gumuzi,      • Gamballanna,
- Oromiya,                      • Wodiidi daga dagoommi qoqowo amadanno.

## B. Wodiidi Soojaati ragi daado

Wodiidi Soojaati ragi daado Hindi Wuqiyanoose daadooti yine woshshinanni. Hindi Wuqiyanoose daadooti yine woshshinannihu lagga ka'annohu Wodiidi Soojaati gottiimu darginni ka'e Hindi Wuqiyanoose e'annohuraati. Waabishebelenna Gannaale tenne daadora e'anno timooti.

Tenne timo kalaqqanno lagga moolana mereerima moola Itophiyanna Sumaalete gobba tayisse sa'anoreeti. Itophiyu giddo Galchiimi ragi daado diru giddo iiminni dirranno xeena 25 anga lolahunni waa gobbara fushshitanno daadooti.

Seedanna jawa daado ikkitinoti Itophiyu giddo Waabishebelete lagaati.

Gannaale lagi Wabishebelete laginni roore way amado Hindi Wuqiyanoosera illishanno lagaati. Itophiyu giddo laggate giddonni Hindi Wuqiyanoose eano lagi Gannaale laga callaho. Gannaale lagi Hindi Wuqiyanoose iillara albaanni Itophiyunna Suudaanete qasiisora Daawwa lagi ledo xaadi gedensaanni Sumaalete daado **Juba** yine woshshinanniha ikkanno.

### C. Xeino baatto ragi daado

Itophiyu giddo afantannohu laggate giddo shiimiidi daadooti.

#### Xeino baatto ragi daado akata ikkitinori:

- kaiminsa xea baatto ragaati;
- soorrama dandiitannohu xeenu anjenninna jawu way foorarinniiti;
- baattote giddoydi daadooti;
- kullannita mittu ragi daado diafidhinote;
- Awaashi lagi tenne daadora qara lagaati;
- Awaashi laga agurranna wolootu gattinori shiimmaaddanna harancho buichooti.

#### Itophiyu lagga akata

- kalaqamunni wuqiyanoosete, baaru, garbunna woy lagu widira higge daaddanno lagaati,
- giddosi maxinete shiilla afi'rinokki baattote aanaanni shalaale ha'ranno waati
- geeshshisi wolootu giddosira tintanno timonni lexxara dandaanno,
- kaiminsa gottiimu baattote raginni, lagga abbitanno baattote ragira shalaaltanno way bisubbaati,
- gobba tayse wole gobbara daaddano way bisooti,
- jilbinsa hawadi yannara luphi yaanno,
- xeenu anje noo yannara, yaano arri yannara jilbinsa ajjannoreeti,
- bushshu hoshooshammera garbunni roore kora ikkitannoreeti,
- baattote ea fulimma kalaqa dandiitannoreeti.,

Lagga Itophiyinke giddo gottiimu targinni xeu dargi widira bobbakkanno woyte bushsha hoshooshe haadhe hadhannohura baattote aana ea fulimma kalaqanno.

### Gaamote looso

Rosaano woroonni noo xa'muwa aana gaamotenni hassaabbine kifile rosiisaanchi'nera filiqishsha shiqqishshe.

1. Itophiyu giddo afantanno daado kalaqama dandiitannohu may korkaatinniiti?
2. Galchimi ragi daado giddo afantanno lagga hiikkuriiti?

### 3.2.5. Itophiyunnita gobba saada jiro

Kalaqamu qarqarira kalaqamuni heedhano saada gobba saada yinanni. Tini saada heeshshonsanni mannu irko nookkiha uminsanni qarqaraho teesse heedhannoreeti.

#### Gobba saada yinanniri:

- qaaffaninna goshshooshantanni hadhano saada;
- qulxu'me;
- cea
- wayinna moola baatto aana heedhano saadanna qansidhanno saada mitteenni xaphi assite amaddanno.

Gobba saada jirooti yinanniri kalaqamu saadanna kalaqamu mu'rote aana irkidhe heedhanoreeti. Tini gobba saada baattote ofollanna ayyarete gade sooramanni babbaxxitanno. Babbaxxitino ayyarete gadenna mu'rote qarqari Itophiyinike giddo hala'ladunni babbaxxanno. Hattono gobba saada ayyarete gadeeninna mu'rote amadooshshi babbaxxa kainohunni babbaxxitanno.

Itophiyaho babbaxxitino ayyarete gadenna dubbu haqqe noosi kaiminni gobbanke giddo babbaxxitino gobba saada afantanno. Ikkollanna kayinni, tini gobba saada jiro batinyunni afantannohu Galchiminna Wodiidi Itophiyu qarqariraati.

#### Lawishshaho:

- Oomonna Maago paarkera;
- Hararge gottiima qarqara,,
- Gaambeellu qoqqowi paarkeranna
- Arsi baale.

Semeeni ilaali paarkera Itophiyu giddo gobba saada jiro heeshshonsa garinni ontewa gaamanni.

- I. Duuchu qarqarira afantanno saada,
- II. Haqqete aana heedhanno saada,
- III. Way giddo hedhanno saada,
- IV. Itophiyaho calla afantanno muxxe saadanna
- IV. Qarru aana noo gobba saada yinanni gaamooti.

### **I. Itophiyu giddo duuchu qarqarira afantanno saada**

Duuchu qarqarira afantanno saadaati yinoonnihu aye ayyarete gade zonnara hee'ra dandiitannohuraati. Gotiichunna yeedaala Itophiyaho duuchunku qarqarira afantannoreeti (misile 3.1 la'e).



yeedaala

Gotiicho

**Misile 3.1.** Itophiyu giddo wo'mankawa afantanno dubbu saada

### **II. Haqqete aana heedhano saada (Arboreals)**

Haqqunni haqqa sa'anno saadaati. Kuri saada heeshshonsa amadantinohu haqqu ledooti. Itophiyaho dubbu hee'ranno qarqarira afantanno saadaati.

### Lawishshaho:

- galashshu • wee' nichunna • qamalcho (misile 3.2 la'e).



Qamalcho

Galashsho

Wee'niicho

**Misile 3.2.** Haqqete aana heedhano saada

### III. Way giddo heedhanno saada

Way giddo heedhanno yineemmo saada Itophiyu giddo babbaxino way bisi giddo heedhannoreeti. Hakuno garbbuwatenna laggate way giddooti.

### Insano:

- qulxu'me • rooenna • naachu (misile 3.3 la'e).



Qulxu'me

Rooe

Naacha

**Misile 3.3.** Way giddo heedhano saada

### IV. Itophiyaho calla afantanno muxxe saada

**Xa'mo:** Muxxe saada yaa mayyaate?

Muxxe saada yaa mitte gobbara calla afantanno saada sirchooti yaate. Xaa yannara tini muxxe saada Itophiyaho gottiimu qarqarira kiironsanni shiima ikkite leeltanno. Muxxe yaa mittu sirchi wole gobbara nookkiha, mitte gobbara calla anfanni sirchooti.

**Shae 3.2.** Muxxe Itophiyu saada su'manna leellitannowa

A.K	Muxxe saada su'ma	Itophiyu giddo leellitannowa
1	Waaliya (walia Ibex)	Semeeni ilaalira
2	Nayila (mountain Nyala)	Baale ilaalira
3	Bullicha (minilik Bush buck)	Baalle gotiima baattora
4	Geedimo (swayne's herte beest)	Neci saari dagoomu paarkera
5	Duume yeedala (semen fox)	Baale ilaalaame baattora
6	Xawu harricho (wild Ass)	Affarete Wodiidi Soojjaatira
7	Galashshu moote	Semeeni ilaalira

Gobba saada sagalensa afidhanno kaiminni sasewa gaammanni.

- A. Mu'ro calla ittanno saada
- B. Maala calla ittanno saada
- C. Muronna maala ittanno saada

**A. Mu'ro ittanno saada**

Mu'rote haqqenna hayisso heedhano qarqarira afantanno gobba saada ikkite mu'ro sagalimmate horoonsidhanni heedhanno saadaati.


**Lawishshaho:** Qorke, xawu harricho, dubbu harricho, daaniicho, bulaycho, Waaliya, geedimonna Golja (**misile 3.4 la'e**)



xawu harricho



daaniicho



dubbu harricho



golja



waliya



qorke

**Misile 3.4. Mu'ro calla ittanno gobba saada**

## B. Maala calla ittanno gobba saada

Tini saada kalaqamunni maala calla itte heedhannoreeti.

**Lawishshaho:**

- Doobbicho
- Daguncho
- Woluno konne labbannori, maala calla ittanno saada yine woshshinannite. (misile 3.5 la'e).



doobbichu



daguncho



kewelcho

**Misile 3.5.** Maala calla ittanno dubbu saada

## C. Muronna maala ittanno gobba saada

Dubbu giddo afantanno saada ikkite mu'ronna maala ittannoreeti.

**Lawishshaho:** Qamalchonna Galashshu

## V. Qarru aana noo gobba saada

Itophiyu gobba saada jiro kiironsannina sirchinsanni diru dirunkunni ajjanni hadhanni no. Mite mite saada addintanni ba'ate birxe iillite leellitanno.

**Lawishshaho:** Waaliyu Aliyye Itophiyira afamannoha muxxe saada ikke xaa yannara Itophiyu gobbanni ba"ate birxe iille leellannoho

**Itophiyunni tini muxxe saada kiironsano ajate korkaata ikkinori:**

- dubbu buujjama;
- Saada allaa'linanni baatto hala'lishshi'rate;
- fajjo nooikki ugaaxe;
- W.k.l korkaatinni gobbankenni ba'anninna ajjanni leellitanno.

## Gobba saada horo

- woxu eo abbitanno,
- bushshu shaqanno gede assate,
- gobbate dona ikkate,
- kalaqamu qarqara taashshate,
- xagichimmate kaa'litanno
- saadate xiinxallo kaimira.

### Gaamote looso

1. Gobba saada horo borreesse.
2. Itophiyu giddo gobba saada ikkite ba”ate bixicha iillitinori hiikkuriiti? Ba”ansara kora ikkannori maati?
3. Itophiyu giddo gobba saada ikkite mu’ro calla ittannori hiikkuriiti?

### 3.3. Itophiyunniha wolqate dana

Rosate dandoo

Rosaanno konne roso rossuhu gedensaanni:

- *Itophiyunnita riqiwantanno wolqate bu’ a kultanno;*
- *Itophiyunnita riqiwantannokki wolqate bu’ a kultanno;*
- *Bayo-gaazete wolqa tiro borreessitanno.*
- *Arrishhote wolqare hasaabbanno.*

### Qara qaalla

- Riqiwantanno wolqa
- Riqiwantanno kki wolqa

**Xa’mo:** *Itophiyu giddo afamannoha wolqate dana kulle.*

Layinki fooliishsho iima wolqa mitto looso loosate dandoo ikkitinotanna gobbankera babbaxxitino wolqate buicho noo gede rossinoonni qaangannita ikkitanna xa kayinni tenne fooliishsho aana wolqate dana rossinanni. Gobbankera afantanno wolqa lamewa gaammanni.

**Insano:**

- A. Riqiwa dandiinanni wolqanna
- B. Riqiwa dandiinannikki wolqa yinannireeti.

**A. Riqiwa dandiinanni wolqa**

Tini wolqa manchi beetti horoonsiri gedensaanni ba'annokki gede marro qole riqiwa dandiinanni wolqate danaati woy uminsanni riqiwama dandiitannote.

**Riqiwama dandiitanno wolquwa ikkitinori:**

- way
- baattote giddoydi iibilli wolqa
- diilallo
- dambalu wolqa
- arrishsho
- Bayo-gaazete wolqanna w.k.l

**Riqiwa dandiinannikki wolqa**

Tini wolqa kalaqamunni geeshshinsanni afantinore (finite) ikkite mitte hinge horoonsi'niro marro qolle riqiwa dandiinannikireetinna uminsanni riqiwantannokki wolqa danaati.

**Lawishshaho:**

- zayte;
- kalaqamu gaaze (laamba);
- kinchu kasale (coal);
- Nukileerete wolqanna w.k.l

**Rosiishsha 3.3**

**Aante noo xa'muwara dawaro borreessitine qolle.**

1. Riqiwama dandiitanno wolqate dani lawishsha ikkitinore borreessitine xawishsha uyiyye.
2. Riqiwantannokki wolqa dani lawishsha borreesse.
3. Arrishshotewiinni afi'neemmo wolqa manchi beettirano ikko wole lubbo noonsarira uytanno horore xawisse.

### 3.4. Itophiyaho qara qarqaru qarranna agarate deerra

#### Rosate dandoo

##### Rosaano konne roso rossuhu gedensaanni:

- ❖ *Qara Itophiyu qarqaru qarrubba tiro borreessitanno;*
- ❖ *Itophiyu qara qarqaru daafamanna qarra tirranni gara hasaabbanno;*
- ❖ *Itophiyu kalaqamu jiro horoonsi'ratenna agarate deerra kultanno;*
- ❖ *Kalqate iibbillu jilbi lexxa gobbankera abbitanno qara borreessitanno;*
- ❖ *Babbaxitino lubbo noonsa sirchi gobbatenni ajjate kori maatiyo xawissanno.*
- ❖ *Gobbanke giddo qara qarqaru qarraati yinannire borreessite xawishsha uytanno.*

#### Qara qaalla

- |                  |                             |
|------------------|-----------------------------|
| • Daafama        | • Dubbo dola                |
| • Iibbillu jilba | • Jiro horoonsi'rate deerra |

**Xa'mo:** *Itophiyu giddo xaa yannara qarqaru qarra ikkite leellitannori hiikkuriiti?*

Qarqarinkera woy gobbankera babbaxino qarri leellanno. kuni qarri yanna yannatenni lexxanni gobbate aana jawa qarra abbanni leellanno. Qarqaru qarrubba abbitanno mitiimma aana illacha tunge daga rosiisa tenne qarrubba ajishate tunge agurranikki hajooti.

##### Gobbanke giddo qarqaru qarrubba yinanniri giddonni:

- A. qarqaru daafama (pollution),
- B. kalqete iibbili lexxa,
- C. mannu kiiro batira,
- D. ishine hunanni doogo lifinxo nookkita ikka,
- E. way bisi babbaxitino raginni e'anno kemikaallanni asiidete amado lexxa,
- F. babbaxitino korkaatinni lubbo noonsa sirchi gobbatenni ajjanni ha'ra,
- G. ozone shaaltanni hara,
- H. asiidete xeeni dirranna
- I. fayyimate mitiimma batira labbinoreeti.

### A. Qarqaru daafama (Environmental pollution)

Qarqaru daafama kalaqamunni lubbo noonsariranna manchi beettira heeshshote hasiisannonsari babbaxino korkaatinni keeraanchimmate aana qarra abbanno widira hige soorramate ikkitooti. Kuri kalaqamunni daafama dandiitanno yineemmor: ayyarete wayinna bushshu daafamaati.

**Lawishshaho:** Tenne qarqaru daafamara kaima ikkitannori laastikka, siwiillanna niyutireentete shiilla gedeereti.

Kuri aleenni xawinsoonni qarqara gawajjitannori kaiminsa gawajjitanno bissa gaaze fushshitanno faabirikkanni, giiranni kalaqamu kasalenni, asiidaamu xeeninni, zayteteninna babbaxxitino industirranni fultanno ishinna kaiminni qarqara daafatenni lubbo noosari baalaho rakko abbitannoreeti.

### B. Kalqete iibbillu lexxa

Mannu korkaatinni kalqete ayyarete iibbilli lexxa qarqaraho qarra abbitanno. Qarqaraho iibbillu jilbi lexxannohura baaru way amado lexxitanni hadhanno, Antartiku Ahigure giddo afantannoti kaadete duuno daaqqe way giddora du'nantanno. Baaru way geeshshi lexxate kaimi kalqete iibbillu jilbi naggi yaate korkaataati. Tini kalqate iibbillu jilbi lexxa gobbankera qara abbitanno.

**Lawishshaho:** Itophiyu giddo anfanni diilallote gade soorramanno daafira gobbatte xeenu jilbi ajaranna jilbisi geeshshi jawa ikkara dandaanno.

Mitte gobbara xeenu jilbi jawa ikkiro bushshu hoshoshame, laalchu aani jaddo, giwirinnu loosi aana mittiima kalaqanno. Qoleno, xeenu jilbi ajiro gobbatte moolle lexxitanohura jawu qarri woy hude kalaqamate qara kora ikkanno daafira kalqete iibbilli lexxa gobbankera qarqaru qarrubba giddo mitto korkataati.

### C.Mannu kiro battira

Mannu kiro batira qarqaraho heedhanno kalaqamu jiro aana qarra abbitanno. Sagalete, wayinna nadaajete hasatto lexxitanni hadhannohura manchi beetti

kalaqamu jiro mulqamara kaima ikkatenni qarqaru aana babbaxxitino mitiimma hala'litanni hadhanno gede assanno. Mitte gobbara mannu kiiro lexxitanni hadhu bikkinni sagalete anje kalaqantanno. **Hattonno**, qarqaru talloonyu heeshsho aana qarru daanno yaate.

#### **D. Ishine hunnanni hayyo lifinxo nookkita ikka**

Lifinxo nookki hayyo doogonni ishine mulla gede tuga qarqaraho hee'ranno mannira ikko lubbo noonsari baalaho fayyimate qarra abbitanno. Babbaxxino raginni e'anno kemikaallanni way asiidaamo ikkanno. Qarqaraho mannu korkaatinni giirantinno ayyarete geeshshi lexxa way bisi aana asiidete amado lexxitanno gede assitanno. Ayyarete aana giirantino gaaze batidhuro, xeena gananno yannara tini giirantino gaaze way ledo xaade asiide kalaqanno. Tini asiide xeenu diranno yannara way giddora e'e way bisi giddo asiidete amado luphi yitanno gede assitanno.



#### **E. Babbaxxitino lubbo noonsa sirchi gobbatenni aja**

Babbaxxitino lubbo noonsa saadanna mu'ro manchi beetti abbino korkaatubanni gobbatenni ajjanni hadhanno. Lubbo noonsari gobbatenni sirchinsanninna kiironsanni ajjanni hadhano yannara qarqaraho kalaqamu heeshshote taalloonyi aana qarra abbitanno. Gobbat turizimete eonno ajjanno.

#### **F. Dubbo dela**

Qarqaraho hee'ranno dubbi manchi beetti kaimini mu'rume baanno yannara qarqaraho qiidado ayyare aja, iibbillu jilbi lexxanna xeenu jilbi ajate korkaatu dubbu dolamaati. Manchi beetti dubbo mu'rannohu industirete loosira, daddalu harinshora, quchumu hala'linyira, doogote loosira, irshu loosiranna babbaxxitino hajubbara dubbu mu'ranno. Tini dubbu mu'rama qarqaraho qarra abbitanno.

#### **G. Asiidete xeenni**

Asiidete xeeni kalaqamanno hu ayyarete aana heedhannoti daafantinno gaaze salferikete okisaydenna ( $\text{S}_2\text{O}$ ) nitrojinete okisaydooti ( $\text{N}_2\text{O}$ ) amadonsanni luphi yite leelturooti. Tini daafantinno gaazete atomma way ledo xaaddanno

yannara asiidete xeeni kalaqamanno gede assitanno. Kuni asiidete xeenni uullara dirranno yannara baattote aana manchi beettira, dubbu gaxigaliranna, way giddo heedhanno saada aana gawajjo abbanno.

### H. Fayyimate qarra

Keeraanchu way hoonge, fayyimmate uurrinshuwa anje, mannu kiiro rahotenni leexxitanni ha'ra, sagalete anje gobbankera luphi yite yanna yannatenni hara manchi beettira fayyimate hoongera kaima ikkitannoreeti. Aleenni xawinsoonni korkaatinninna wolootu korkatuwanni gobbankera babbaxxitino xisso yanna yannantenni luphi yitanni leeltanni no.

#### Lawishshaho:

- foolaate amanyooti xissonna
- wodannu daafuri xisso labbano mitiimma kalaqantanni leeltanni noo.

#### Itophiyaho kalaqamu jiro horoonsiratenna agarate deerra

Itophiyinke giddo babbaxxitinno kalaqamu jiro nooha ikkironno horoonsi'nanni hee'noonni deerri ikkado ikkinokkiho.

#### Lawishshaho:

- dagomitte paarke agarooshshi deerri ikkado ikka hooga;
- bushshu hoshoo shamme gargarranni hee'noonni deerri ikkadimma hooga;
- shiilla badillico hayyonni uma qarqaraho jawa ikkite leellanna
- gobba saada aana assinanni fajjiweello ugaaxe hala'llite leellate korubbaati.

### Rosiishsha 3.4

#### Woroonni shiqqinno xa'muwara borrotenni xawishsha uykiye.

1. Qaraqaru daafama xaphi assite amaddannori hiikkuriiti?
2. Manchi beetti qarqaru daafamannoikki gede assa hasiisannosiri maati?
3. Itophiyu giddo babbaxxitinno saadate sirchi ajjanni leellannohu mayi korkaatinniiti?
4. Kalqete iibbillu jilbi lexxa mu'rotenna saadate aana abbanno qarri maatiro xawisse.

## Fooliishhote xaphishsha

- Manchi beetti hasatonna halcho wonshate manchi beetti loosinoreenna kalaqamunni afi'neemmore baala jirote yinanni.
- Baattote aana anfannire lubbo noonsarennna lubbo noonsakkire ayyare, way bushshu, zayte, kaasalenna shiilla baalu kalaqamu jirooti.
- Diilallote gade yaa hala'ladu qarqarira seeda yanna giddo kalaqantanno ayyarete soorrammeeti.
- Diilallote ikkito yinanniti kayinni mittu qarqarira harancho yanna giddo noo ayyarete ikkito soorramaati.
- Itophiyu giddo afamanno bushshu dana ikkitinnori: nitosolisi, akirosolisi, vertisolisi, kambisolisi, litosolisi, regosolisi, zerosolisi, yemosolisi, luuwisolisinna fuluvisolisi yinannireeti.
- Itophiyu kalaqamu mu'ro babbaxxitino beehaache ikkitinnori: ilaalambe baatto mu'ro, dubbu mu'ro, haqqetenna hayissote mu'ro, mereerima halallite baatto mu'ronna moola halallite baatto mu'rooti.
- Itophiyu giddo hedhanno gobba saada jiro heeshonsa garinni: duucha qarqarira afantanno, haqqete aana heedhanno, way giddo hedhanno saadaati.
- Itophiyaho calla afantanno muxxe saadanna qarru aana noo gobba saada yinanni gaamoti.
- Itophiyaho muxxe saada ikkitinori: Waaliya, Nayila, Bulicho, Geedimo, Duume yeedalanna Xawu harrichooti.
- Itophiyu giddo afantanno qara way daado yineemmori, Galchimi ragi daado, Wodiidi Soojjaati daado, Xeino baatto ragi daadooti.
- Itophiyu giddo afantanno shiilla ikkitinori Camo (Gold), Platinum, Tatalum, Nikele, Maxine, Nooru kincho, Doru, Silka (silica), Petroleemenna Kinchu kasale labbanoreeti.
- Gobbankera afantanno wolqa dana ikkitinori:
- Riqiwa dandiinanni wolqanna riqiwa dandiinannikki wolqa yinannireeti. Insano:Riqiwa dandiinanni wolqa way, diillallo, arrishsho, baattote giddoyidi iibilli wolqa, dambalu wolqanna bayo-gaazete wolqaati.
- Riqiwa dandiinannikki wolqa yinanniri: zayte, kalaqamu gaaze, kinchu kasalenna nukileerete wolqaati.

- Gobbanke giddo qarqaru qarra yinanniri giddonni: qarqaru daafama, kalqete iibbilli lexxa, mannu kiiro bati'ra, ishine hunanni doogo lifinxo nooikkita ikka, ozone shaaltanni ha'ranna fayyimmate qarrubba batira qara qarraati.

## Fooliishhote xaphishshu rosiishsha

### I. Aante shiqqino xa'muwara halaaleho woy kaphoho yitine dawarre.

1. Dagoomitte paarkete agarooshshi deerri Itophiyinke giddo ikkadoho.
2. Foolate amanyooti xissonna wodanu daafuri xisso Itophiyu giddo lowo geeshsha wofi yitinote.
3. Itophiyu giddo xaa yannara saadatenna mu'rote sirchi ajjanni leellanno.
4. Itophiyu giddo kalaqamu qarqari daafamara kora ikkitannori laastike, siwiilunna nitrikete gedeereeti.
5. Bayo-gaazenna dambalu wolqa marro higge riqiwama dandiitannokki wolqaati.
6. Itophiyu giddo baabburu hodhishshi doogo batinyunni afantanno.
7. Wodiidi Soojaati raggi daado Itophiyu daadooti yine woshshinanni.
8. Yedalanna Gotiichu Itophiyaho calla afantanno muxxe gobba saadaati.
9. Waaccote haqqe halalitte baattote dubbi giddo afantanno mu'rooti.
10. Litosolisi bushshi kalaqamunni kaajjadu kinchinni kalaqamino bushshaati.

### II. Woroonni shiqqino “A” gaamo “B” gaamo widoonni shiqqinori ledora fixoonse.

- | <u>‘A’</u>         | <u>‘B’</u>                       |
|--------------------|----------------------------------|
| 1. Waaliya         | A. Semeeni ilaalira              |
| 2. Nayila          | B. Baale ilaalaame baatora       |
| 3. Bulliche        | C. Itophiyaho duuchu qarqarira   |
| 4. Geedimo         | D. Baale gottiima baattora       |
| 5. Duume yeedaala  | E. Necci saari dagoomu paarkera  |
| 6. Xawu harricho   | F. Affaarete wodiidi soojjaatira |
| 7. Galashshu moote |                                  |

### III. Woroonni shiqqinno xa'mora taalo dawaro doortinne qolle.

1. Itophiyu giddo xeenu jilbi baattote qarqarira badooshshe afi'rate korkaata ikkinohu hiikkonneeti?  
A. Woggate soorrama      B. Diillalote gade badooshshi  
B. Xeenu jilbi bati'ra      D. Dubbu batinyi
2. Itophiyu giddo culku shiilo anfannihu  
A. Adoola      B. Tigirayete  
C. Ageremariyamete      D. baalunku
3. Gamoojjete dirunni iibbillu jilbi \_\_\_\_\_ 0°C ikkanno.  
A. 3°C woroonni      B. 10-16°C  
C. 16-20°C      D. 20-28°C
4. Qorru diillalote gade afidhino zoone giddo anfanni ilaalli hiikkonneeti?  
A. Raasi-Daashini      B. Baattu  
C. Gunna      D. Baalunku dawarote
5. Itohiyinke giddo baadillichonna rosantino bushshu hoshoo shamme gargartote hayyonni egennantinori  
A. Gaambellu daga      B. Affaarete daga  
C. Konsote daga      D. Amaaru daga
6. Baattote shiilla umanna mannu kiiro lexxa Itophiyu giddo \_\_\_\_\_ abbitanno.  
A. Sagalete injo      B. Qarqaru taalloonye  
C. Dubbu saada kiiro lexxa      D. Bushshu hoshoo shamme qarra
7. Itophiyu gottiima baatto qarqarira heeranno dubbi giddo afantannokki haqqe nni ikkinohu hiikkonneeti?  
A. odako      B. leemmu  
C. daguchu      D. ejersa
8. Konni woroonni noori giddo heeshshonsa garinni wolootunni baxxannohu hiikkonneeti?  
A. qulxu'me      C. qamalcho  
B. naacha      D. rooe

9. Itophiyu giddo Galchimi ragi daado diru giddo iiminni dirranno xeena \_\_\_\_\_  
anga lolahu wanni gobbara fushshitanno daadooti.
- A. 50                    C. 30  
B. 60                    D. Dawaro dino

**IV. Konni woroonni shiqqino xa'muwara xa'mote garinni taalo dawaro  
borreesse.**

1. Qara Itophiyu diilallote gade wogga ikkitinore borreesse.
2. Itophiyu giddo afantanno shiilla borreesse.
3. Itophiyu dubbu buujjamara qara kora ikkitinore borreesse.

**V. Woroonni shiqqino xa'mora tittiritinne xawishsha uyiyye.**

1. Gobba saada sagalensa afidhano doogo kaima assitine beehaachinsara xawishsha uyiyye.
2. Halallitta baatto mu'ro leellitannohu hiikko qarqariraati?
3. Itophiyu giddo afantannota qara way daado borreessitine xawishsha uyiyye.
4. Moola halallitte baatto mu'rora xawishsha uyiyye.

# FOOLIISHSHO SHOOLE

## ITOPHIYU DAGOOMU QARQARA

### Rosate dandoo

Rosaano tenne fooliishsho rossuhu gedensaanni:

- ❖ *Itophiyunniha budu babbaxxooshshe ayirrisanno;*
- ❖ *Itophiyunniha addi addiha budu assoote baddanno;*
- ❖ *Itophiyunnita qara qara afuu maate baddanno;*
- ❖ *Itophiyunniha qara qara budu dona baddanno;*
- ❖ *Itophiyunnita baadiliichonna yannitte budu uurrinshuwa horo baddanno;*
- ❖ *Itophiyunnita qara miinju kifilla baddanno;*
- ❖ *Itophiyunniha babbaxino giwirinnu loosi gara badde hasaabbanno*
- ❖ *Itophiyunnita qara baara widira sonkanniha gibirinnu laalcho borreessa dandiitanno*
- ❖ *Itophiyunniha babbaxino industirete dananna horonsa xinxallitanno;*
- ❖ *Itophiyunnita daa "atote (turizimete) horo xinxallitanno;*
- ❖ *Itophiyunnita turizimete industire gawijjitanno korkaatubba affanoo.*

### Qara amado

- 4.1. Itophiyunnita budu babbaxxa
- 4.2. Itophiyunniha budu dana
- 4.3. Baadillichonna yanni budutte uurrinsha
- 4.4. Qara Itophiyunnita miinju kifilla

## Bitima

Rosaano shoole kifile deerrinni qoqqowi'ne budu donna rossiinonniiti qaangannita ikkitanna xa kayinni Itophiyinke giddo afamanno budenna budu donna rossinanni. Itophiyinke giddo duuchu gari budi afamanno. Tenne budu babbaxara korkaata ikkannohu dagatenna baychu babbadooshsheeti. Donu mitte gobbara lophote kaa'lanno miinju kifileeti. Gobbankera noo donna babbaxxitino gaamora gaammanni. Insano: millissannonna millisannokki dona, kalaqamunna mannu loosino dona, angate amandanninna amadamannokki donaati. Uurrinsha mitte gobbara lophote mereershaati. Uurrinshuwa nookkiha lopho heedhanno yine dihendanni. Uurrinshuwa kalaqantannohu mootimmate woy gashshootu wodhonni, budu wodhonninna lamente xiiwonni ikkite wodho, budenna gashshootu xiiwo gamba assite hanqaffanno. Tini baadillichonna yannitte uurrinshuwa hee'ra mitte gobbara miinju lophorano ikko mittimmate heeshshora tenneeti yinannikki horo afidhino. Itophiyaho duucha miinju kifilla noosiha ikkirono, qara gobbatte miinju eo kifilla ikkitinori Giwirinna, Industirennu Turiizime labbanoreeti. Tenne fooliishsho rossino rosaano Itophiyu budu babbaxxo huwattanno gedenna ayirrsi'nanni gede buuxxanno. Qoleno, Itophiyu giddo afantanno daganna afuubba kula dandiitanno.

## 4.1. Itophiyunnita budu babbaxxa

### Rosate dandoo

Rosaano konne roso rossuhu gedensaanni:

- ❖ Budeho yaa mayyaatero kultanno;
- ❖ Budu babbaxxonni Itophiyu daga mereero noo badooshshe xawissanno;
- ❖ Itophiyunnita budu kifilla xawissanno;
- ❖ Itophiyaho egennantinota budu assooti ikkito kultanno;
- ❖ Qara Itophiyu afuubba maate borreessitanno
- ❖ Itophiyu giddo batinyunni horoonsi' nanni afoo xawissanno.

### Qara qaalla

- |                 |                |
|-----------------|----------------|
| • Budu babbaxxa | • Budu assoote |
| • Budu kifilla  | • Afuu maate   |

Shoolki kifilera qoqqowi'ne giddo leellannoha babbaxxino budenna addi addi budu assooti kalaqamu jiro agaratenna qorowote noo kaa'lo yaano rosu amado rossiinoonniti qaangannita ikkitanna xa kayinni Itophiyu deerrinni afantanno budu babbaxxo yaannoha rosu umo rossiinanni.

**Xa'mo:** *Itophiyu giddo afamanno budi lawishsha kulle.*

Itophiyinke giddo duuchu gari budi afamanno. Budu babbaxxara korkaata ikkannohu dagatenna baychu babbadooshshinniiti. Daga babbaxxitu bikkinni buduno hattonni babbaxxanni haranno. Itophiyinke giddo 86 aleenni ikkitanno daganna dagoomi afamannoha ikke horoonsidhanno afiino hattonni 80nna aleenni ikkanno yine hendanni. Konni daafira, budu babbadooshshi dagatenna dagoomittete mereero babbaxxino suudi noosi.

### Budu mitte daganni wole daga mereero babbaxxara dandaannohu:

- baattote ofollanni
- daganna dagoomite babbadooshshinni
- ayyarete gadenni
- dagoomu heeshsho hassatto garinni
- dagate kiiro lexxanninna w.k.l.

### Itophinke giddo budu babbaxxo lawishsha ikkannori:

- daga horoonsidhanno afii gari
- uddi'rate gari
- ji'late gari
- wi'late seeri gari
- budu udiinni
- sirbu
- adhamate seeri
- mi'natenna w.k.l.

Kuri aleenni xawinsoonni korkaatuwanni Itophiyu daga mereero budu babbadooshshi hala'ladunni afamanno.

#### 4.1.1. Itophiyunha qara budu assoote

**Xa'mo:** *Itophiyaho qara budu assooteeti yinanniri hiikkoreeti?*

Itophiyaho babbaxxitino daganna dagoomi teese hee'ranno gobbaati. Gobbanke babbaxxitino afuu booso afidhinote. Tinino xaphoomunni gobbanke giddo 80 nna hakkunni alee ikkitanno daganna dagoomu gaamo heedhannoha ikkanna, mitte mittenti uminsa afoo, woga, uddi'rate budu amanyootenna wolootunno kore labbannori uminsa budi noonsareeti. Itophiyu wole gobbuwanni baxxannohu qara ikkitinoti umisi borrote dani hee'rasiiti.

**Xa'mo:** *Umi yannara Itophiyu borro hanaffinnohu hiikkunni afiinniiti?*

Itophiyu borro umi yannara giriiketenninna Ayhudete ama'note maxaafa borro albi yannara Giizete afiinni tire, haaru garinni kayinni Amaarunna Tigirete afiira soorrinoonnite.

### Itophiyunnita budu assootubba

- A. Koo/Tee      B. Budu dana      C. Budu sagale

#### A. Koo/Tee

**Xa'mo:** *Meyateranna labaahura yine budu garinni bandoonni looso rosiisaanchi'nera kulle.*

Itophiyaho meyateranna labbaahura bandoonihu loosu qeechi noonsa. Budunni labbaahu maatete hasiissannore abbatenna maate gobbaydi manni ledo xaadate hajo lainohunni massagate qeechi noosi. Meyatera kayinni, mini loosiranna ooso lossate qeechi noose. Meya beetto labbaa beettinni roore illacha tunga ha'runso assinannise. Itophiyu budu laonni labbaa beetti sagale diqishanno. Hattono dikko didikkiranno. Kuni leellishannohu dikko dikki'ranna sagale qisha meyate loosooti yine ammannannihuraati. Kuni laooshshi Itophiyaho batinye darga ama'note gede la'nanniho. Ikkirono, quchummate meya beetto jajjabba hadara loosu widoonni amaddanni dagginoohura labballu mini loosono loosanni leellanno.

#### Gaamote Looso

Rosiisancho ballo, kifilete giddo leellitanno rosaano gaamotenni beekkensa Itophiyinke giddo Koo/Tee looso gaamatenni bude horoonsira garaho yitannota mitte gaamo assite, Kuni assooti digaraho yitannore layinki gaamo assite heewisantanno gede assatenni harunso assitanni, jeefoteno kuni budu laooshshi may horonna may gawajjo afi'rinoro lamenti gaamo hasaabbino hasaawa kora assite kifilete rosaanoikkira xawishsha uyinsa.

## B. Budu dana

**Xa'mo:** *Itophiyunniha budu udiinni dana rosiisaanchi'nera kulle.*  
Itophiyinke giddo babbaxino budu dani no.

### Insano:

- mine mi'na
- ooso loossira
- kalaqamu jiro agara
- budu uurrinshuwa
- xisso xagis'ira
- ama'no
- uddi'ra
- gashshootunna kalaqamtanno gaance tira
- gashshootu wolqa horoonsi'nanninna barru tuqa asiinanni assootubba gari babbaxinoho

Kuri aleenni xawisoonniri giddo Itophiyaho budu uddi'ra garinni labbaahu gaawe, meyati kayinni naxala uddidhanno. Meyati roore yanna seeda uddanonna (qamise) naxala qaccesi kuulaamo ikkinoha uddidhanno. Wole daga kayinni, Wodiidinna Galchimi Itophiyira babbaxxitino budu uddanna uddidhanno. Mitu mitu bisonsa gogunni boodewa diphite uddidhanno. Wolootu kayinni kalaqamunni mullootu heedhannori albinsanna bisinsara maka buudhite qurra dadhite biifisidhe hadhanno.

## C. Budu sagale

**Xa'mo:** *Itophiyunnita budu sagalete dana kulle.*  
Itophiyinke giddo duuchu daganna dagoomu manni afamannoha ikkate kaiminni gobbankera duucha sagalete dani hee'ranno.

**Lawishshaho:** Buddeenu, iibbinshe fushshinoonni maali, shuro-buurunni, daankoonni, maali, bunu, xajjite agatto, juusete agatto, injeeru firi-fireenna lukkichu woxi labbinori Itophiyi giddo afantanno budu sagale lawishshaati.

Itophiyunniti dagoomittete hala'ladunni horoonsi'nanniti sagalete qaamatto woxiiti. Tini woxi du'namaancho buddeenaho wodhine qaammannite. Buddeenu sagale Itophiyu giddo loonsannihu gaashetenna wolootu gidu dani ledo mitteenni karsineeti. Amaaru daga gaashe lewu kumi diri albaanni gaashete wixanna sagalimmate horoonsi'nanni gara hanaffinoha ikkanna xaa yannara haammatu Itophiyu dagawa gaashete gidi sagalimmate hala'ladunni horoonsi'nanni hee'noonni. Tini gaashe gobbankera baxxitinota ikkite mudhannohuno hala'ladunni Itophiyaho gottiima baattoraati. Gaashete buddeeniranna addi addi sagalera horoonsi'nanni qaamatto woxiiti yinanni. Tine woxi qaamatto danino babbaxxinoho.

### **Lawishshaho:**

- lukkichu woxi
- mu'rote kaashshi woxi
- lalu maali woxi
- missiru woxi
- ge'reewu maali woxi
- baaqeelu woxi
- me'u maali woxi
- ataru woxi

Babbaxxitino Itophiyu daga uminsahu budu sagale dani noonsa.

### **Lawishshaho:**

Sidaamu daga umiseti ayirrado budu sagale noosee lawishshaho

- buurisame
- huuffisa
- cuukkame
- gafumma
- omolcho
- ado
- sherko

Ado kayinni woxi gede Sidaamu daga waasunni qaamate horoonsi'nannite.

## **4.1.2. Itophiyunnita budu kifilla**

**Xa'mo:** *Itophiyinke giddo afantano budu kifilla rosiisaanchi'nera kulle.*

### **Itophinke giddo budu kifilla ikkitinori:**

- A. bude illachisha
- B. budu rosicho
- C. budu malaate woy suude

- D. afuu bude
- E. borreessantinokki yaatto
- F. maynae yaa
- G. borreessantino yaatto
- H. wodho

### A. Bude illachisha (Values)

Bude illachisha budu kifilla giddo angatenni amandannikki qara budu kifleeti. Xawisa dandiineemmu hee'nanni heeshshonni, hasaawunni, hexxotenni, doorshuninna iillishhatenni xawinseemmo ikkitooti.

### B. Budu rosicho (Norms)

Budu giddo hasiissanno budu kifleeti. Tini budu kifile leellishshannohu dagoomu wodho heeshsho, fiixoomanna xaado xaphi assite leellishshanno kifleeti.

### C. Budu malaate (Symbols)

**Xa'mo:** Rosaano, Itophiyu giddo afantanno budu malaate ikkitinore lawishsha kulle. Malaatu budeho mereershu amadooti. Malaateho yaa ayericho ikke manchi beettira tiro aannohonna wolu manni ledo sokka saysate kaa'lanno xaadu buusaati. Hala'ladunni xaphi assinummoro, malaateho yaa qaale, udiinne, albu xawishsha, huuronna misile labbannori budu giddo daga mimmitu ledo hedo xaadisirate horoonsidhanno budu kifleetti.

**Lawishshaho** Itophiyu baandeerinna Aksuumete hawulte w. k. labbannoreeti.

### Kifilete looso

Rosaanno gaamotenni hasaabbine Itophiyu giddo budu malaate ikkitinori lawishsha borreesse.

### D. Afuu bude (Language)

Afuu yaa, fidalsate hayyonni, borreessate malaatininna coyirate bude kaima assine wole daga ledo xaadate kaa'lanno budu kifleeti. Afoo horoonsi'ne bude dagate saysa woy borrotenni xawisa dandiinanni. Afuu nookkiha bude ilamatenni

ilamate saysanna bude lossa didandiinanni. Afuu lophara woy ba”ara dandaanno. Mittu afii horoonsidhanno daga hoogguro gobbatenni hakku afii ba”anno yaate. Ikkolana kayinni, mitto afoo horoonsidhanno daga lexxituro hattono yanna yannatenni lophanni ha’ranno yaate. Itophiyu giddonni bainno afii lawishsha ikkinohu Gaafaati afooti.

### Gaamote looso

*Itophiyinke giddo Gaafaati afoo agurranna wolootu ba ’inno  
afuubba hiikkoreetti?*

## **E. Borreessantinokki yaatto (Folk ways)**

Borreessantinokki yaatto budu kifilla giddo mitte ikkite heeshshote garinni manchi beetti jajjabba gaamo wodhitino budu wodhooti. Mitte dagara hala’ladunni shiimmammaadda gaamote wodho ikkite manchi beetti baadillico dagate yaatto, barru barru looso, garunni loosanno gede kaa’litanno. Tenne yaatto, wonsha hooga wodhotenni qorichu nookkite.

### **Lawishshaho:**

*Sidaamu daga “hibbo” woy “maatto” barra godo ’liniro umoho buudu fulanno” yitanno yaatto no. Tenne yaatto giddo noose sokka la ’nummoro ooso barra lalo allaaltino bayicho hibbo woy maatto godo ’litanna saada mulla gede assitannokki gede waajjishiishate horoonsi ’nanni yaattooti ikkinnina maatto woy hibbo godo ’la manchi beettira umoho buuda fushshitannoha dikkino.*

## **F. Maynae (Mores)**

Maynae yitanno hedo budu kifilla giddo manchi beetti hee’ranno daga giddo kaajjillunni agadhanno budu kifleeti. Tenne maynae yitanno budu kifile huninohu dagate giddo kaajjado qoricha uynannisi. Tenne maynae yitannota budu kifile saysinohu budu giddo wodhinoonni wodho huninohu yine gumullanni.

## **G. Budu assoote (Custums)**

Kuni budu assooteeti yinannihu seeda yanna giddo mitte daga mereero daga mittimmatenni sumuu yite horoonsidhanno budu kifleeti. Akatu mittu manchi

ikkito ikkanna,budu assooti kayinni mitte daga gaamo assitanno ikkitooti. Budu assooteeti yinannihu soorramannohu seeda yanna giddooti.

### H. Wodho (Law)

Itophiyinke giddo mitte mittenti daga uminsa wodho afidhino. Hattenne dagara wodho daga mittu qarqarira heedhanno yannara mitteenni sumuu yite loosidhanni adhantanni, ji'litanninna wi'litanni heedhanno yannara mitteenni sumuu yite mittimatenni horoonsidhanno budu kifleeti. Tenne wodho daga sumuu yite horoonsidhanno, huninoha qorichishanniiti.

**Lawishshaho:** Sidaamu daga; ama, anna woy jawa mancho xoninohu budu garinni qorichishamanno yaate.

#### 4.1.3. Qara Itophiyu afuubbatte maate

##### Xa'mo:

1. *Itophiyu deerrinni loosu afuubba ikkite horote aana noore kulle.*
2. *Itophiyu giddo heedhanno dagara qara afuu booso ikkitinori hiikkoreeti?*

Itophiyaho 86 babbaxxitino daganna dagoomitte no;hattono 80 aleenni ikkano afuu dani nooha ikkanna dagate batinyinni konni afi giddonni hala'ladunni coyidhanno mannooti batinyi garinni Oromo, Amaaru, Sumaale, Tigirennna Sidaamu daga afuubbaati.

Itophiyu deerrinni loosu afuubba ikkite horote aana noo afuubba

- Amaau afoo
- Affaarete afoo
- Oromiiffa
- Sumaalete afoo
- Tigrete afoo

Kalqete deerrinni noo afuubba giddonni Ingilizete Afii kalqete deerrinni horoonsi'nanni loosu afooti. Itophiyunnita qara afuubbate booso shoolewa gaammanni.

I.Seeme

II. Kushe

III. Oomoo

IV. Niilo sahaara

## I. Seemete afuubba booso

**Xa'mo:**

1. *Seemi afuu booso ikkitino daga Itophiyinke giddo hiikkoreeti? Hanni gaamotenni hasaabbine rosiisaanchi 'nera kulle.*
2. *Seemi afuu booso giddonni jawiidi booso ikkinoha kulle.*

**Seemi afuu booso ikkitinori:**

- Adaari
- Argobba
- Gaafaati
- Guraage
- Chaha afuu gaamo ikkitinori: chaha, Muher, Izhaha;
- Inoori afuu gaamo ikkitinori (Inoori, Inneri, Indegenya, Giytonna Mesimes);
- Silxe afuu gaamo ikkitinori (Silxe, Albergi, Iniqorinna Walane)nna
- Sooddote afuu gaamo ikkitinori (Sooddo, Gogotinna Galiila).
- Gi"ize;
- Tigire
- Zay
- Amaara

## II. Kushii afuu booso

**Xa'mo:**

1. *Itophiyinke giddo kushi afuu booso ikkitinori roorenkanni teesse heedhannohu hiikkunni ragiraati?*
2. *Kushi afuu booso ikkitinore kulle.*
3. *Kushi afuu booso giddonni jawiidi booso ikkinohu hiikkoneetiro kulle.*

Kushi afoo coyidhannori batinyunni afantannohu mereerimu, Wodiidinna Soojaati Itophiyira batinyunni coyi'ramannohu, Affaarete Oromiyahonna Sumaalete qoqqowiraati. Kushii afoo coyidhannori giddonni lowo coyi'raano noosihu Oromiiffaho.

**Kushiiitiki afuu booso ikkitinori:**

- |            |            |              |           |
|------------|------------|--------------|-----------|
| • Affaare  | • kambaata | • Sidaamu    | • Hadiyya |
| • Qimaanti | • Bussa    | • Agewu      | • Awnyi   |
| • Bayso    | • Libido   | • Sumaale    | • Arboore |
| • Gawwada  | • Tsamai   | • Alaaba     | • Werize  |
| • Oromo    | • Saho     | • Konso      | • Kunfali |
| • Burje    | • Gedio    | • Daasenechi | • Xamti   |

### III. Oomote afuu booso

#### Xa'mo:

1. *Oomote afuu booso Itophiyu giddo hiikko qarqarira heedhanno?*
2. *Oomote afuu booso ikkitinore borreesse.*

Oomote afoo coyidhanno daga batinyunni afantannohu Wodiidi xea baatto garbuwa mereeronna Oomo lagi qarqariraati.

#### Oomote afoo coyidhannori:

- |               |                  |             |            |
|---------------|------------------|-------------|------------|
| • Angilla     | • Kachama        | • Ganjulle  | • Dorze    |
| • Kara        | • Gamo goofa     | • Bambassi  | • Kafa     |
| • Shekko      | • Basikeetto     | • Koore     | • Ganza    |
| • Benchi      | • Male           | • Wolayitta | • Boro     |
| • Diizi       | • Yemsanna       | • Caara     | • Oyidda   |
| • Hamer       | • Baana          | • Dime      | • Shakacho |
| • HozoAarinna | • Zayse-zergulla |             |            |

### IV. Nilo saara afuu booso

#### Xa'mo:

1. *Nilo saara afii booso ikkitinore kulle.*
2. *Itophiyu giddo hiiko qarqarira afantanoreetti?*

Kunni afii booso Itophiyunna Sudaanete danni gaangawira afantanoreetti.

#### Insano:

- |             |           |          |          |
|-------------|-----------|----------|----------|
| • Anyuwaak  | • Gumuuze | • Murle  | • Kwama  |
| • Komo      | • Mursi   | • Berta  | • Opuulo |
| • Nuer      | • Kunaama | • Obatto | • Near   |
| • Me'en     | • Kiwegu  | • Majang | • Uduk.  |
| • Nyangatom | • Shabo   | • Suri   |          |

#### Xa'mo:

1. *Itophiyu giddo baino woy ba "ate birxicha iillite noo afuubba hiikkoreetti?*
2. *Ba'ate korkaata ikkinori maati?*

Xaa yannara Itophiyu giddo Weyto, Gaafatinna Mesmes ba'ino affuubba ikkitanna ba"ate mereero noo afi Ongootanna wolootuno 22 afuubba ba"ate qacce marte leellitanno.

#### **4.1.4. Itophiyaho roore horoonsi'nanni afuubba**

**Xa'mo:** *Itophiyu deerrinni roore horoonsi'nanni afuubba ikkitinore borreesse.*

Itophiyaho batinyunni hasaawantanno qara afuubba ikkitinori hasaawanno manni kiiro garinni jawiidihunni hananfe mereerimu geeshsha noori

- |                         |                   |
|-------------------------|-------------------|
| 1. Amaru Afoo           | 2. Oromate Afoo,  |
| 3. Sumaalete foo        | 4. Tigrete Afoo   |
| 5. Sidaamu Afoo,        | 6. Wolayitu Afoo  |
| 7. Sabatti beet Guraage | 8. Affaarete Afoo |

### **Rosiishsha 4.1**

#### **I. Aante shiqqino xa'mora halaaleho woy kaphoho yitinanni dawarre.**

1. Itophinke giddo 86 worooni ikkitanno daganna dagoomi afamanno.
2. Budu mitte daganni wole daga mereero babbaxxannohu baattote ofollanni callaati.
3. Itophiyinke giddo budu babbadooshshi hee'ra horo uytannota dikkitino.
4. Itophiyinke giddo nooti mitte mittenti daga uminsa wodho diafidhino.
5. Sidaamu daga uddi'rate garinna Affaarete daga uddirate mereero badooshshu dino.
6. Itophiyinke giddo labbaahuranna meyatera bandoonihu loosu qeechi dino.

#### **II. Woroonni noo xa'muwara dawaro doortine qolle.**

1. Giriiketenninna Ayhudete amma'note maxaafa borro albi yannara qixxaabbinohu
 

A. Tigrete Afinni	B. Amaaru Afini
C. G"zete Afini	D. Ingilizete Afiniiti

2. Itophiyinke giddo meyate loosu qeecha ikkinohu hiikkoneeti?
  - A. Gobbaydi manni ledo xaadate hajo lainohunni massagate qeechi
  - B. Mini loosiranna ooso lossate qeechi.
  - C. Sagale qishate qeechi
  - D. Dikko dikki'rate qeechi
3. Itophiyunnihu batinyu budu udiinni loosaminohu fuuttunniti.
  - A. Halaaleho B Kaphoho
4. Itophiyu giddonni ba"ino afii lawishsha ikkinohu \_\_\_\_\_ afooti.
  - A. Gumuze B. Gaafaati C. Mursi D. Baalunku
5. Kunni woroонни noori giddo mittu Seemi afuu booso gaamooti.
  - A. Oromo B. Guraage C. Kambaata D. Sidaama
6. Inoori afuu gaamo giddo kiiramannokkihu hiikkonneeti?
  - A. Giyto B. Mesimes C. Indegrnya D. Albergi
7. Kushii afoo coyidhannori batinyunni afantannohu \_\_\_\_\_ ragiraati.
  - A. Mereerimu Itophiyra B. Wodiidi Itophiyra
  - C. Soojaati Itophiyra D. Baalunku dawarote
8. Konni woroонни noori giddonni mittu ba"ate birxe iille noo afooti.
  - A. Uduki B. Suri C. Ongoota D. Mursi

### **III. Woroонни shiqqino xa'muwa aana dawaro'ne borreessitine qolle.**

1. Itophiyinke giddo afamanno budita babbaxxitino kifilla borreessitine dawarre.
2. Itophiyu budu assoote ikkitinore borreesse.
3. Itophiyu daga budu sagale dana borreesse.
4. Sooddote afuu gaamo ikkitinore kulle.

## 4.2. Itophiyu Budu Dona

Rosate dandoo

Rosaano konne roso rossuhu gedensaanni:

- ❖ *Itophiyu budu donna kultanno;*
- ❖ *Millissannonna millissannokki donna xawissanno;*
- ❖ *kalaqamunna mannu loosino donna lawishsha borreessitanno;*
- ❖ *Angatenni amandannikkinna amandanni Itophiyu budu donna xawissanno;*
- ❖ *Angatenni amandanni budu donna lawishsha kultanno;*
- ❖ *Angatenni amandannikki budu doni lawishsha hasaabbanno*
- ❖ *Itophiyu giddo bude agarate, qorqoratenna irkisate gashshootuwiinni agar-ranni looso borreessitanno.*

### Qara qaala

- |                       |                              |
|-----------------------|------------------------------|
| • Millisanno dona     | • Angatenni amandanni dona   |
| • Millisannokki dona  | • Angatenni amandanikki dona |
| • Kalaqamu dona       | • Bude agara                 |
| • Manchu loosino dona | • Bude qorqora               |

### 4.2.1. Millisannonna millisannokki dona

**Xa'mo:** *Donu mitte gobbara eote buichooti yinannihu mayraati?*

Donu mitte gobbara lophote kaa'lanno miinju kifileti. Togo yaano babbaxxitino daa'ataano gangalataho dagganno woyte woxe baattanno daafira daa"atote dona afidhino gobba eote bue afidhanno.

**Donu lamewa gaamamanno:**

- I. Millisanno donanna
- II. Millisannokki dona

## I. Millisanno ha budu dona

**Xa'mo:** *Itophiyinke giddo millisanno budu dona ikkitinnori hiikkoreeti?*

Millisanno budu dona yinannihu mittu baychinni wole baycho haa'ne ha'ra woy milli assa dandiinanniha woy umisinni milli yaanno donu dana millisanno donaati yine woshshinanni.

**Lawishshaho:**

- Aksuumete hawulte
- Saada
- Mootichu womaashsha (Nugusu saante);
- Udiinnichu
- Borreessantinno yaatto w.k.l.

## II. Millisannokkiha budu dona

**Xa'mo:** *Itophiyu giddo millisannokki budu dona yinanniri lawishsha borreesse.*

Millisannokkiha budu dona yinannihu baychunni baycho sa'a woy millisa didandaanoho.

**Lawishshaho:**

- huuccattote minna
- Isilaamu huuccattote mine (masigiida)
- Jaagooli gimbe
- dagoomu paarike
- lixxinno baatto
- Oromiyunnihu sofimeri godi
- Konsonniti baattote ofolla
- Ilaalu w.k.l

### 4.2.2 Kalaqmunna mannu loosinno donna

Itophiyke giddo afantanno donna kalaqantinohu kalaqamunninna manchi beetti ogimmanniiti.

## A. Kalaqamu Dona

Kalaqamu doni kalaqamunni afi'nanniha ikke manchu beetti egenno noyikkiha kalaqamu ikkitonni calla afi'nanniho yaate. Kuni doni kalaqamannohu kalaqamu ikkittonniiti.

### Lawishshaho:

- way foonchi
- Affaarenniti xea baatto
- dubbu kalaqamu saada
- baattote giddonni fulanno ruqani
- lixxino baatto
- ilaallanna xe”a baatto
- shiilla.

## B. Mannu loosino dona

Manu loosino dona yinanniri gobbanke giddo mannu irkoni kalaqantino donubbaati. **Insano:**

- |                              |                                  |
|------------------------------|----------------------------------|
| • Laalibelu huuccattote mini | • Sidaamu sumudi                 |
| • Xiyya soodiyu kincho       | • Addisaawu andineti paarke      |
| • Waamma                     | • abbay foonchi kofattonna w.k.l |
| • Akisuumete hawulte         |                                  |

### 4.2.3. Angatenni amandanninna amandaanikki Itophiyu budu donna

#### 4.2.3.1. Angatenni amandanni Itophiyunnita budu dona

**Xa'mo:** *Angatenni amandanni Itophiyinke giddo afantanno donna kulle.*

Itophiyu honse angatenni amandanni budu donna kalqete deerrini borreessidhino gobbaati. Kuri honse angatenni amandanni Itophiyu budu donna yinanniri:


1. Laalibelaho Heewaani huuccattote kinchu mine
2. Faasil Gimbe,

3. Aksuumete hawulte
4. Awashi lixxino baatto
5. Oomo lagi xea baatto
6. Semeeni dagoomu paarke
7. Xiyya Soodiyyu kincho
8. Hararete Jaagooli Gimbe
9. Konsonniti baattote ofolla

### 1. Lalibelaho Heewaani huuccattote kinchu mine

**Xa'mo:** *Laalibelaho Heewaani huuccattote kinchu mine kalqete deerrinni yunesikote Angatenni amandanni budu dona ikke boreessaminohu mamarooti?*

Haaro Iyerusaalame yine woshshinannita ikkite yuneskotenni kalqete deerrinni angatenni amandanni budu dona ikkite 1971 M.D. borreessantino. Kuni baychi afamannoohu Amaaru qoqqowi giddo ikke giddosi 11 jajjabba kinna kurkurre loonsoonni huuccattote minna noosihonna minantinohu 13<sup>ki</sup> saniraati.(Misile 4.1Lae)



**Misile 4.1.** Laalibalu Am'note mine (Rock-Hewn church of lalibela)

### 2. Faasil Gimbe

**Xa'mo:** *Faasil Gimbe angatenni amandanni doni giddo mitte ikkite giddose me''e base afidhino?*


Yuneskote kalqete angatenni amandanni budu dona ikkite borreessantinohu 1972 maarote diriniiti. Kuni doni giddosi settu babbaxino baychi no. kuri giddo bayriidihu **Faasil Ghebbi** gashshaanote mine yinanniho. Wolootu lamalu baychi kayinni Gondarete quchumi giddo afantannoreeti. Konni doni giddo afantannori huuccattote minna, Cuu'ammanni way, gashshaanote minnanna iibbalichote waati.

### 3. Aksuume

#### *Xa'mo:*

- Aksuumete hawulte afantanno hu hiikko qoqqowiraati?*
- Kalqete deerrinni angatenni amandanni dona ikkite yuneskote borreessantinohu mamarooti?*

Aksuumete hawultubba loosantinohu mitto kincho kurkurreenna callaati. Tini aksuumete hawultubba yuneskote kalqete deerrinni angatenni amandanni doni giddo 1973 M.D borreessantinno. Aksuume xaa yannara Tigrayete qoqqowi giddo afantanno. Aksuumete quchumi albi yannara Itophiyahonna Afiriku buudira qara quchumaati. Aksuume yaa hattenne yannara qara quchumanna gashshootu su'maati. Kuni quchumi xintu Itophiyira noo gashshootu wolqa leellishano quchumaati.(Misile 4.2 lae)



**Misile 4.2.** Aksuumete hawulte

#### **Aksuumete donna busule ikkitinori:**


- Yowolote loosi
- Mootete mini (Bête-Mengiste)
- Amma'note uurrinshuwanna
- Hawultete loosi Aksuumete qara busulleeti.

#### 4. Awaashi lixxino baatto

**Xa'mo:**

1. *Awaashi lixxino baatto angatenni amandanni doni Itophiyu giddo  
hiikko qoqqowira afamanno?*
2. *Awaashi lixxino baatto budu doni may horo aannoho?*

Kuni baychi afamannohu Itophiyu giddo Affaarete qoqqowira ikke manchi beetti sirchi kaimi afamino xea baattooti. Kalqete deerrinni yuneskote xaggete dona ikke borreessaminohu 1980 Aworopu kiironniiti. Xaa yannara kuni baychi jawa xiinxallote darga ikke afamanno. Awuropu kiiro garinni 1974nni 52 manchu beetti ekera (miqqa) anfoonniha ikkana tenne miqqa xaadinse **Luusi (Dinqineshi)** yinanni su'ma su'minooni. Anfoonni miqqa giddo jawiidi diro hee'rinoihu 4,000,000 diro aleenni keeshshitinote.(Misile 4.3 lae)



**Misile.4.3.** Luusi (Dinqineshi) miqaa leellishshanno

#### 5. Oomo lagi xea baatto

**Xa'mo:** *Oomo lagi xea baatto giddosi afantanno miqqate xinxiqqa giddo  
egennaminoha miqqate xinxiqo maynanniho?*

Kuni dhaggete baychi kalqete deerrinni donu kifilenni borreessaminohu 1980 Awuropu kiiro garinniiti. Batinye kiiro afi'rino miqqate xinxiqo anfoonni darga ikke leellannohuno Turkaanu garbi muleeti. Tenne dhaggete doni darga anfoonni xinxiqqa giddo egennaminohu miqqate xinxiqi **Hoomo Giracilis** yinanniho.

## 6. Semeeni dagoomu paarke

**Xa'mo:** *Semeeni dagoomu paarke giddo Itophiyaho calla afantanno muxxe saada ikkitinore kulle.*

Semeeni ilaalira afantanno dagoomu paarkeeti. Kalqete angate amandannikki doninni borreessantino callico paarke ikkite Awuroppu kiiro garinni 1987nni maarekkantino. Tenne dagoomu parke giddo Itophiyaho calla heedhanno muxxe saada Waaliyunna Duume Yeedaala afantanno baychooti.

## 7. Xiyya Soodiyuu Kincho

**Xa'mo:** *Xiyya soodiyu kinchi kirsiisino yine hendanni diri me "eho?*

Xiyya Soodiyu Kinchi quxame qasamino hawultete donaati. Kuni kinchi Itophiyu qaru quchuminni Wodiidi ragaanni Wodiidi Itophiyra Guraagete Zoonera Wodiidi daga dagoomi qoqqowira afamanno angatenni qansooni hawultete kinchooti. Kuni kinchi kiirsisino yine hendanni diri 1000 diro aleenniti. Xaa yannara Xiyya Soodiyu kinchi Itophiyinke giddo huuxamenna danchu agarooshshinni agarame dhaggete kincho ikke leellanno. Diru giddo duucha baara widinni dagganno daa"ataano daa"attanni afantanno.(Misile 4.4 lae)



**Misile 4.4.** Xiyya soodiyuu kincho

## 8. Hararete Jaagooli Gimbe

**Xa'mo:** *Hararete Jegooli Gimbe giddo batinyunni leellitannoti hiittenne amma'note minaati?*

Kuni budunna dhaggete baychi leellannohu Itophiyu giddo Hararete qoqqowi giddo Hararete quchumiraati. Hararete Jaagooli Gimbe huuxantinohu 1560nni **Emir Nur Mujahid** yinanni hatte yanna wominniiti. Isilaamu amma'nora Hararete

quchumi qullaawa quchumaati yine ammananniho. Korkaatuno, Jaagooli Gimbe giddo 82 Masgiiddanna 102 maga'ninanni baychi noosihyo. Tini Harerete Jaagooli Gimbe Awuropu kiiro garinni kalqete deerrinni donunni maarekantinohu 2006 M.D..(Misile 4.5 lae)



**Misile 4.5.** Hararete Quchumira Jaagool Gimbe leellishshanno

## 9. Konsonniti baattote ofolla

**Xa'mo:** Konsote baattote ofolla budu doni mayimma kulle?

Konsote daga egennantinohu bushshu hoshoo shamme gargadhate horoonsidhanno karote busuile loosinniiti. Tini busulle 21 ilama horoonsidhanni keeshshitino seeda yanna busulleeti. Kalqete deerrinni ba"anoikki dona ikkite Awuropu kiiro garinni maarekkantinohu 2011niiti. Konsote daga baattonsa agarate lalo, ge'rewonna me"ensa mini giddo angatenni itissanonna gargartanno egennaammaati. Loosunninno jawaata dagaati.(Misile 4.6 lae)



**Misile 4.6.** konsote baattote karo

### 4.2.3.2.Angatenni amandannikki Itophiyu budu donna

**Xa'mo:** *Itophiyunnita budu donna giddonni angatenni amandannikki donna ikkite kalqete deerrinni yuneskote borreessantinore rosiisaanchi'nera kulle.*

Itophiyu kalqete deerrinni budu donansa yuneskote borreessidhino gobbuwa giddo mitette. Itophiyu kalqete deerrinni **shoole** angatenni amandannikki budu donnanna **honse** angetenni amandanni budu donna kalqete deerrinni yuneskote borreessidhino gobbaatti.

Itophiyu shoole angatenni amandannikki budu donna kalqete deerrini yuneskote borreessidhino gobbaati.

- |                               |                         |
|-------------------------------|-------------------------|
| I. Masqala                    | III. Fichee Cambalaalla |
| II. Cuuamete ayyaana (Timket) | IV. Irreecha            |

#### I. Masqala

**Xa'mo:** *Itophiyu deerrinni Masqalu ayyaana angatenni amandannikki dona ikke kalqete deerinni yuneskote mamaro borreessamino?*

Amma'note ayyaana ikke, Kirstoosi sutamino Masqalu dawe anfoonni barra qaanganni ayyaanaati. Kuni ayyaanni kalqete deerrinni yuneskote borreessaminohu 2006 maarote dirira angate amandannikki budu dona ikke borreessamino. Kirstaanu ammanaano ikkitinorinna gangalatote daanno manni Wocawaaru aganira 17nni Masqalu ayyaana ayirisanno. Itophiyaho qaru quchumira ayirrinssanni ayyaanaati. Ayyaana ayirrisa hananfannihu quchummate mereerira xawu battallara (Mesquel Addebaabayete), Amma'note uurrinshubbara (Church), shiimmaada qaxawaru haqqe labbinore gamba assine giiratenni ayyaantu barri soodara balanxe Masqalu ayyaana ayirrinsanni.

#### II. Irreecha

**Xa'mo:** *Itophiyu daganna dagoomi giddo Irreechu ayyaana ayirrissannoti hiittenne dagaati?*

Irreechaho yaa ayyaana ikke mannu gamba yee Magano huuccirannowanna galata shiqishanno ayyaanaati. Irreechu ayyaanni Gadu gashshooti amanyoote ikke Oromote dagara dagoomu, polotikunna budu xawishsha ikkino ayyaanaati. Kalqete deerrinni 2009 M.D yuneskotte manchi beetti angatenni amandannokki budu dona ikke borreessamino. Irreechu Oromote daga kaaliiqira galata shiqishshanno ayyaana ikke ayirrinsannihu Birru aganira Oromote qoqqowi giddo duuchankawaati.

### III. Fichee Cambalaalla

**Xa'mo:** *Fichee Cambalaallate ayyaana diru soorro ayyaana assite ayirrisidhanno daga hiittenneeti? Ayirrisidhannohuno hiitto ha'rinshonniiti?*

Fichee Cambalaalla Sidaamaho diru soorro ayyaana ikkite ayirrinsannihuno Itophiyaho Sidaamu daga giddooti. Xaa yannara kayinni kalqete yunskote maarekkantu kawa Itophiyu deerrinni ayirrisantanni afantano angatenni amandannikki budu donaati. Kuni ayyaani ayirrisamanno hunku diru dirunkunni hawadi agannara Sidaamu beeddahe layire kiirosi garinni soorrote aganna daggu barrinniiti. Sidaamu daga Fichee Cambalaallate ayyaana ayirri sanohu haaru diru soorro ayyaanaati. Kuni ayyaani yuneskote angatenni amandannikki budu dona ikke borreessamino 2008 M.D. Fichee Cambalaallate ayyaanni annuwatenni sa"nni dayno ayyaana ikke ayiirisamanni keeshshinohuno 2,000 diri aleenniiti.

### IV. Cuuammete ayyaana

**Xa'mo:** *Cuuammete ayyaana ayirrissanno amma'no hiittenneeti?*

Kuni ayyaani Yesuusi Kirstoosi yordaanoosi lagira cuuaminota qaagooshshunni ayirrinsanni ayyaanaati. Wo'mu Itophiyu deerrinni Arfaasu aganira barra 11 tunni diru dirunkunni ayirrinsanni ayyaanaati. Konne cuuamete ayyaana ayirrissannori Itophiyu kirisitiyaanu amma'no harunsaano ikkite kaaliqi yordaanoosi lagira cuuamino barra qaagatenna addi addi cubbinni keera'minanni yite heddanno kaiminni konne ayyaana ayirrissanno.

Ayirrissannohuno kuulunni biifino udiine uddi're Itophiyu manni Cuuamate ayyaana ayirrisanno. Itophiyaho shoolki angateni amandannikki manchi beetti budu dona ikke yuneskote Sadaasu aganira 2012 M.D borreessamino.

#### **4.2.4 Bude agarate, qorqoratenna irkisate gashshootunna dagateiinni agarranni qeecha**

**Xa'mo:**

- Itophiyunniha budu dona qoroqortenna agarate gashshootu qeechi maati?*
- Itophiyu budu donu agarooshshira dagateiinni agarranni qeechi maati?*

Dona illacha tunge agara Itophiyu gobbara lowohunni hasiissanno hajooti. Korkaatuno, Itophiyu gobbara duuchu doni afamannohura gobbate lophora jawa qeecha afidhino eote buicho ikkitinohuraati. Xaphoomunni, donna afantanno qarqarira co'ichimmana qorqorto assitanno hajo la'annonsa bissara hasiissanno hajooti. Ledotenino donna afantanno qarqara huuxxanna hakkoni qarqarira agaraancho wora hasiissanno.

Itophiyu giddonni mannu loosino donnanna kalaqamunni anfanni donna agarate mootimma illacha tugge daa'atote daggannonna qarqaraho heedhanno dagara rosicho aa hasiissanno.

**Itophiyu mootimmate bisi daa"atote budu qarqarira hedhanno qarqaru dagara illacha tugge rosiisa hasiissannohu:**

- donanna donu qarqara agartanno gede assate;
- qarqara daafannore addi addi ishine tungannikki gede assate;
- donna gawajja dandiitanno kemikaalla donu qarqarira tungannikki gede qorowo aate;
- shotu garinni qarqaru aana giira kayisannori tugamannokki gede assate;
- donna da"atara martanno daa'ataano qarru aana reqecci yitannoikki gede illacha tunge dagate rosicho aanna w.k.l donna agaratenna lossate qara ikkitino korkaatubbaati.

Itophiyu giddo noo donna ba'annokki gedenna biiffe leellitanno gede qarqaru manninna gobbate mootimma jawa qeecha afidhino.

##### **A. Donu agarooshshira qarqaru dagawiinni agarranni qeecha**

- budinsa giddo donu agarooshshi wodho hee'ra,
- donu aana gawajjo abbitannore budunni qorichisha,
- budunni dagate rosicho aanna w.k.l qarqaru dagawiinni agarrannireeti.

## B. Donu agaroooshshira gashshootuwiinni agarranni qeechi

- donna qorqortanno uurrinsha kalaqa,
- Itophiyu wodhote biillonyi giddo donu qorqorto wodho jawaachisha,
- Donu qarqarira hasiissanno hodhishshu doogo latishsha qineessa,
- agaraano wora,
- dagate rosicho aa,
- huxxa (donu qarqara) w.k.l motimmate bisinni agarranni qeechaati.

### Rosiishsha 4.2

#### A. Aante shiqqino xa'muwara halaaleho woy kaphoho yitinanni dawarre.

1. Jaagooli Gimbe giddo 82 Masgiidanna 102 maga'ninanni baychi no.
2. Oomo lagi xea baatto Waaliyunna Duume Yeedaala afantanno dagoomu paarkeeti.
3. Angatenni amandanni dona baala Itophiyinke giddo millissanno donaati.
4. Itophiyu wodhote biillonyi giddo donu qorqorto wodho jawaachisha donu agaroooshshira dikaa'litanno.

#### B. Woroonni shiqqino xa'muwara taalo dawaro doortine qolle.

1. Konni woroonni noori giddo muli yanna kawa loosamanni leellanno mannu loosino donna giddonni mitto ikkinohu hiikkonneeti?
  - A. Xiyyu soodiyu kinchi
  - B. Abbay foonchi kofatto
  - C. Aksuumete hawulte
  - D. Dawaro dino
5. Woroonni noori giddo budu dana ikke wolootunni baxxannohu hiikkonneeti?
  - A. Jaagooli Gimbe
  - B. Semeenni dagoomu paarke
  - C. Ilaalu
  - D. Saada
6. Itophiyu giddo afantanno donna kalaqantinohu \_\_\_\_\_ doogonniiti.
  - A. Lame
  - B. Onte
  - C. Mitte
  - D. Shoole

#### C. Woroonni shiqqino xa'muwara borreessitine dawaro qolle.

1. Itophiyu deerrinni loosu afuubba ikkite horote aana noo afuuba borreesse.
2. Aksuumete donna busule ikkitinore borreesse.
3. Itophiyu mootimmate bisi daa'atote budu qarqarira hedhanno daa'ataanora illacha tuge qarqaru daga rosiisa hasiissannohu may korkaatiraati?

## 4.3 Baadillichonna yannitte budu uurrinsha

### Rosate dandoo

Rosaanno konne roso rossuhu gedensaanni:

- ❖ Baadillichonna yannannita budu uurrinsha kultanno;
- ❖ Itophiyu giddo leeltanno baadillico uurrinshuwa borreessitanno;
- ❖ Yannitte budu uurrinsha borreessitannonna
- ❖ Budu babbaxxo babbaxxitino kalaqamu babbaxxanno dhage giddo maa labbannoro xawissanno.

### Qara qaalla

- Baadillico budu uurrinsha
- Yannitte budu uurrinsha
- Wodho
- Budu babbaxxo kaa'lo

**Xa'mo:** *Baadillichonna yannitte budu uurrinsha badooshshi maati?*

Uurrinsha mitte gobbara lophote mereershaati. Uurrinshuwate gobbaanni lopho heedhanno yine dihendanni. Uurrinshuwa kalaqantannohu mootimmate gashshootu wodhonni, budu wodhoninna lamente xiiwonni ikkite wodho, budenna gashshootu xiiwo gamba assite hanqaffanno.

### A. Baadillico budu uurrinshuwa

**Xa'mo:** *Rosaano, baadillico budu dona ikkitinota kulle.*

Giddonsa mittimmate uurrinsha, kalaqamu egenno, rosamino assoote, wogate wodhonna rosicho hanqaffino. Baadillico qarqaru uurrinshuwa, kalaqamu rosicho, egenno keeshiishshannonna ragisiissanno hala'lado dagate wodhooti.

**Itophiyinke giddo baadillico uurrinshuwaati yineemmor:**

- Iddire
- Iqqube
- Maamara
- Dee labbinori

## B. Yannitte budu uurrinshuwa

**Xa'mo:** Yannate budu uurrinshuwa ikkitinore kulle.

Yannanniti budu uurrinshuwa gobbankera qara lophote kaima ikkite leellitanno. Addi addi uurrinshuwa babbaxxinoha loosu qeecha afidhinoha ikkirono duuchanti uurrinshuwa gobbate lophora jawa qeecha afidhinote.

### Gobbanke giddo leellittannoti yannitte uurrinshuwa yinanniri

- Baanke
- Inshuraanse
- Baaburu doogo
- Fayyimmate uurrinsha
- Attamu uurrinsha
- Yaannate bikkaancho woy saate
- Telekomunikeeshiine (Ethiopia Telecommunication Institution),
- Poostu minna
- Horophillu xaawa
- Rosu minna
- Hoteella
- Baambu waa
- Korreentete wolqa

### Budu babbaxxa babbaxxitino kalaqamu babbaxxanno dhage giddo

Gobbanke giddo mu'rotenna saadate sirchi batinyi babbaxxo calla ikkikinni budu babbaxxonno hala'ladunni leellitanno gobbaati.

### Lawishshaho:

- babbaxxitino amma'no
- afuu babbaxxo
- dagoomittete babbaxxo
- Sidaamu daga uddi'ra gari
- wi'la
- jii'l
- mi'na
- Affaarete daga uddi'ra gari
- Amaaru daga uddi'rate gari

Tini Itophiyinke giddo budu babbaxxo heera babbaxxitino horo uytanno.

- daa"atote kaa'litanno
- gangaalatote kaa'lo uytanno,
- surretenna mannimate hagirre uytannonna
- wodannu hagiirre qansootaho uytanno.

### Rosiishsha 4.3

#### I. Woroonni noo xa'mora halaaleho woy kaphoho yitine dawarre.

1. Uurrinsha mitte gobbara lophote mereershaati.
2. Iddirennna baanke baadillico uurrinshuwa lawishshaati.

#### II. Aante shiqqinno xa'muwara borreessitine dawaro qolle.

1. Itophiyinke giddo baadillico uurrinshuwa horo maati?
2. Baankenna Iddireti mereero noo badooshshi maati?
3. Itophiyinke giddo yannate budu uurrinshuwa yinnanniri hiikkoreeti

### 4.4 Qara Itophiyunnita miinju kifilla

#### Rosate dandoo

Rosaanno konne roso rossuhu gedensaanni:

- ❖ *Qara Itophiyu miinju kifilla kultanno;*
- ❖ *Gibirinnu qeechi Itophiyu miinju milimmo aana noo deerra xawissanno;*
- ❖ *Itophiyunni qara baaru widira sonkanni gide borreessitanno;*
- ❖ *Itophiyu giddo leellitanno industire donna hasaabbanno;*
- ❖ *Itophiyunnita babbaxxitino industirete dananna horonsa borreessitanno;*
- ❖ *Indistirete qeechi Itophiyu miinju millimmo aana noo horo kultannonna*
- ❖ *Itophiyunnita turii zimete industire gawajjitanno qara mitimma xawissanno.*



**Xa'mo:** *Qara Itophiyu miinju kifilla kulle.*

Itophiyaho duucha miinju kifilla noosiha ikkirono qara gobbathe miinju eo kifilla ikkitinori,

- Gibirinnu, Industireenna Turizime labbinori Itophiyu gobbara qara miinju kifillaati.

#### 4.4.1 Giwirinnu qeechi Itophiyu miinju millimmo aana

**Xa'mo:** *Itophiyu miinju millimmo aana giwirinnu qeechi mageeshsha ikkinoro gaamotenni hasaabbine kifilete miilla'nera shiqishshe.*

Itophiyunnu lophote umi miinji giwirinnu loosooti. Giwirinnu loosi Itophiyu gobbara badhete miqichoooti. Itophiyaho giwirinnu loosi badhete miqicho ikkinohu wooronni borreessinnonni korkaatinniiti.

- Itophiyu gobbate lopho giddo 30 anganni kayse 42 anga geeshsha amadinohu giwirinnu loosooti.
- Itophiyu gobbara soye afi'ranno woxu eo giddo giwirinnu loosi gumi 90 anga amadanno.
- Giwirinnu loosi gumi industirete loosira jawa qeecha amadino.
- Itophiyu daga 80 anga ikkitannori loosidhe galtinohu giwirinnu loosiniiti.

#### Itophiyu qara baaru widira soqqanno gidi

**Xa'mo:** *Itophiyunni baara widira soonkanni gidi dana borreesse.*

Itophiyunni wole gobbara sonkanni eo afi'nanni gidira, qara ikkitinori:

- buna
- loggomu wahe
- shaete daron
- gati kaashsho
- zayte loonsanni guminna daraaro

#### 4.4.2 Itophiyu giddo leellitanno industire dana

**Xa'mo:** *Itophiyu giddo leellitanno industire dana ikkitinore kulle.*

Itophiyu giddo industirete loosi lowo geeshsha badhera hige leellanno uurrinshaati. Ikkollana kayinni, xaa yannara Itophiyu giddo hala'ladunni safantanni leellitanno.

**Itophiyu giddo industirete dana ikkitinori:**

- Budu industireenna
- Faabiriku industireeti.

## 1. Budu industire

**Xa'mo:** *Itophiyu budu industirenni loosamanno udiinne kulle.*

Itophiyu giddo tini budu industire seeda yanna kiirisiissino industirete danaati. Tini budu industire duuchu manni huwatinokki industirete dana ikkiturono babbaxxino udiinni loosamanno industireeti. **Insano:**

- Shimaanete looso (Naxala, Gaawe, Seemmanna Darbata)
- Haqqu loosi (Barcima, Daallasa, Qambara, Digireenna Kado)
- Doru loosi (Finiincho, Gambaycho, Googide, Dissite, Shaate, Guggudu, Xiltenna Shaaqu)
- siwiilu loosi (Meesane, Ura, Haanto, Billawu, Bisenna Amaxxo)
- Miciicu loosi (Saffe, Ciico, Zambeellenna Koffiyu) gedeere qixxeessinanni seeda yanna keeshshinoonni budu industire danaati. (Misile 4.7 lae)



**Misile 4.7.** Budu industire

## 2. Fabiriku industire

**Xa'mo:** *Itophiyaho faabiriku industirenni qixxeessitanni leellitano uduunne kulle.*

Itophiyu giddo haaro yannara industire ikkite, xaa yannara gobbathe jawa loosu kaayyo kalaqqanni leellitannonna gobbateno lophote kaima ikkite leellitanno industire danaati. Tini industire xaa yannara,

- hoccu loosira
- sagalete
- agatote

- babbaxxino bisoho horoonsi'nanni buuro qixxeessatenna wolootunno konne lawanno looso loossanni industireeti.(Misile 4.8 lae)



#### **Misile 4.8 Yannitte Faabiriku Industire**

#### **Industirete qeechi Itophiyu miinju millimmo aana**

**Xa'mo:** *Industirete qeechi Itophiyu miinju millimmo aana maa lawannoro kulle.*  
Industirete Itophiyu miinju millimmo aana noosi qeechi lowoho, Qara ikkitinota kayinni woroonni xawinsoonni.

- Gobbaydinni dureeyye Itophiya e'anno gede assitanno;
- Loosu kaayyo kalaqqanno;
- Gobbara sokkanno udiinni kiiro leddanno;
- Doolaarete eo luphi assanno;
- Kalaqamu egennonni sayinsetenna haaro yannara busulle ledo xaadisate;
- Gobbatte giddonna gobbaanni noo egenno ledo xaadisate
- Wole gobbuwa ledo daddalu fiixooma kalaqate;
- Uurrinshu nookki lophonna dagate heeshshote ikkadimma kalaqate;
- Gobba duuchu raginni luphi yite afantanno gede assate kaa'litanno.

#### **4.4.3 Itophiyu Turizimete dana**

**Xa'mo:** *Itophiyu giddo hiittoo turizime dani nooro kulle.*

Itophiyu babbaxxitino baattote offolla haqqu fugudanna mannu miqqa, dhagetenna heeshshote budi turizimete industire biifado ikkitanno gede assanno koraati. Turizimete babbadooshshi biifadimma kaima assine gobbankera afantanno turizime babbaxxitino garinni beenkanni.

### **Insano:**

- heeshhote gari turizime
- dhaggete turizime
- dagoomu paarke turizime
- Baattote ofolla gari turizime
- Giwirinnu heeshsho babbadooshshi turizime,
- Bunu turizime,
- Baadillico turizime
- Ispoortete turiizime.

### **Turizimete qeechi Itophiyu dagoomu miinju millimmo aana**

**Xa'mo:** *Itophiyu miinju millimmo aana turiizimete maa qeechi noose?*

Turizime Itophiyu giddo hee'ra, konni woroonni xawinsoonni gobbatte miinju millimmo abbitanno:

- Doolaarete woxu eo luphi assitanno;
- Gobbatte haaro loosu kaayyo kalaqanno;
- Gobbatte giwiru baatooshshi eo leddanno;
- Itophiyu gobba wole gobbanni xaadanno fixooma luphi assitanno.

### **Itophiyunnita turizimete industire gawajjitanno qara mitiimma**

**Xa'mo:** *Itophiyunnita turizimete industire noo walqanni gobbatte miinju millimmo aana hasiisanno qeecha irkissannokki gede assitanno mitiimma maati?*

Aleenni rossininte gede Itophiyu giddo babbaxxitino seessallite turizimete injiitino bisubba afantanno. Ikkolanna kayinni, tenne seessallite industirete kaayyo aana babbaxxino qarri afamanno.

### **Lawishshaho:**

- Industire la'anno uurinshuwa jawaata hooga,
- Loosu wolqa jawaata hooga,
- Turiizimete uurrinshuwaro ogimmatteni fullahino manni aje leella,
- Gobbatte miinju wolqa ajjinota ikka,
- Kompiyterete egennonni luphi yitino mannooti kiiro aje leella,
- Laafa jawaattinoikki uurrinsha ikka,
- Tenne uurrinshara qixxeessinanni mixo hayyo noota ikka hooga
- Daa'atote dagganno wosinna daa'achiishanno manni aje leella Itophiyu giddo turizimete illachi aana qarra ikkite afantanno.

## Fooliishhote Xaphishsha

- Itophinke giddo 86 aleenni ikkitanno daganna dagoomi afamanno; hattono horoonsidhanno afino 80nna aleenni ikkanno.
- Budu babbadooshshi dagatenna dagoomittete mereero babbaxxino budi afamanno.
- Itophiyu budu assoote ikkitinori: Koo/ Tee, budu dananna budu sagaleeti.
- Itophinke giddo afamanno budi babbaxxitino kifilla afirino.
- Donu mitte gobbara lophote kaa'lanno miinju kifleeti.
- Itophiyu deerrinni loosu afuubba ikkite horote aana noo afuuba Amaaru, Affarete, Oromiyu, Somaletenna Tigrete Afuubbaati.
- Itophiyunnita qara afuubbate booso Seme, Kushe, Oomoonna Niilo saahara afuubba boosooti.
- Itophiyaho batinyunni hasaawantanno qara afuubba Oromiyu, Amaru, Sumaalete, Tigrete, Sidaamu, Wolayitate, Sabatti beet Guraagenna Affaarete afuuubbaati.
- Itophiyu kalqete deerrinni **shoole** angatenni amandanikki budu donanna **honse** angetenni amandanni budu donna kalqete deerinni manchi beetti budu dona yuneskote boreesidhino gobbaatti.
- Itophiyu mootimmate bisi daa'atote budu qarqarira hedhanno daa'ataanora illacha tuge qarqaru daga rosiisa hasiissanno.
- Itophiyinke giddo baadillico uurrinshuwa iddire, uqqewe, maamarunna deete.
- Yannitte budu uurrinshuwa Baanke, inshuraanse, rosu minna, baaburu doogo, horophilu xaawi, fayyimmate uurrinshanna hotelete gedereeti.
- Itophiyu budu babbaxxo miinju kaa'lora: miinju eora irko ikkitanno, gobbate lophora, gobbate biinfilliranna turiizimete lophora kaa'litanno.
- Itophiyaho qara miinju eo kifilla gibirinnu, industirennu turiizimete.
- Itophiyunni baara widira sonkanni gidi Bunu, loggomu wahe, shaete daro, gati laalichi, zayte loonsanni guminna daraaro gedeereti.
- Itophiyu giddo afantanno industire budu industirennu faabiriku industireeti.

## Foolishhote Xaphishshu Rosiishsha

### I. Aante shiqqino xa'mo halaaleho woy kaphoho yitine qolle.

1. Itophiyu budu babbaxara kora ikkinohu daganna dagoomitete babbadooshsheeti.
2. Itophiyunnu budu uddi'ra garinni labaahu gaawe, meyati kayinni naxala uddidhanno.
3. Itophiyunniti dagoomitete hala'ladunni horoonsi'nanniti sagalete qaamatto gaashete.
4. Malaateho yaa ayericho ikke manchi beettira tiro aannohonna wolu manni ledo sokka saysate kaa'lanno xaadu buusaati.
5. Itophiyinke giddo noo mitte mittenti daga uminsa wodho diafidhino.
6. Millisanno budu dona yinannihu mittu baychinni wole baycho haa'ne milli assa dandiinanniho.
7. Shiilla mannu kalaqeenna mannu kalaqonni kalaquantanno donubbaati.
8. Jaagooli Gimbe giddo 82 Masgiiddanna 102 maga'ninanni baychi noosih.
9. Xiyya soodiyyu kinchi Itophiyu qaru quchuminni Wodiidi ragaanni Wodiidi Itophiyra Wolayitu Zoonera Wodiidi daga dagoomi qoqqowira afamanno.
10. Konsote daga egennantinohu bushshu hoshooшhamme gargadhate horoonsidhanno karote busule loosiniiti.

### II. Woroonni “A” gaamo widoonni shiqqinnota “B” gaamo ledo fixonse.

“A”

“B”

- |                             |            |
|-----------------------------|------------|
| 1. Kushe afuu booso         | A Me'en    |
| 2. Niilo sahaaru afuu booso | B. Affaare |
| 3. Oomote afuu booso        | C. Amaaru  |
| 4. Seemi afuu booso         | D. Gaamo   |

### III. Taalo dawaro doortine qolle.

1. Konni woroonni noori giddo Itophiyinke giddo baadilicho uurrinshuwaati yineemmori hiikkoreeti?
  - A. Iddire
  - B. uquwe
  - C. Dee
  - D. baalunku dawarote
2. Indistirete qeechi Itophiyu miinju millimo aana maa lawanno?
  - A. Gobbaydinni dureeyye Itophiya e'anno gede assitanno.
  - B. Loosu kaayyo kalaqanno.
  - C. Loosu wolqa jawaattannoikki gede assitanno
  - D. A nna B dawarote
3. Konni woroonni noori giddo gobbankera leellittannoti yannitte budu uurrinshuwa ikkitinori hiikkoreeti?
  - A. Naxala
  - B. Gaawe
  - C. Baanke
  - D. Buna
4. Woroonni noori giddo yannaniha Turizimete dana ikkinohu
  - A. Haanto
  - B. Shole
  - C. Meesane
  - D. Baalunku dawarote.
5. Itophiyinke giddo afamanno budi babbaxxo kifile ikkinokkihu hiikkoneeti?
  - A. Budu rosichi
  - B. Budu malaati
  - C. Koo/Tee
  - D. Afuu budi
6. Itophiyinke giddo batinyunni hasaawaantanno qara afuubbate gaamo ikkinoikkihu hiikkoneeti?
  - A. Sumaate aAoo
  - B. Wolayitu Afoo
  - C. Sidaamu Afoo
  - D. Baalunku
7. Angatenni amandannikki budu dona ikkinohu hiikkonneeeti?
  - A. Cuuammets ayyaani
  - B. Faasili gimbe
  - C. Aksuumets hawulte
  - D. Awashi lixxino baatto
8. Itophiyu mootimmate bisi daa'atote budu qarqarira heedhanno dagara illacha tuge rosiisa hasiissannohu:
  - A. donanna donu qarqara agartannonna qorqortanno gede
  - B. qarqara daaffannore addi addi ishinna gargaritanno gede
  - C. donu qariqara giirate dano gargaritanno gede
  - D. baalunkku dawarote

9. Kushi afuu booso gaamo ikkinokihu hiikkonneete?

- A. Oromo      B. Sidaama      C. Baskeetto      D. Hadiyya

10. Kalaqamu dona ikkinohu hiikkonneeti?

- A. Dubbu saada      B. Affarete xea baatto  
C. Xiyya sooddiyyete kinchi      D. ‘C’ agurranna baaluku

#### IV. Fanu baychira halaalanya dawaro borreesesse

1. Semeeni dagoomu paarke giddo Itophiyaho calla heedhanno muxxe saada

\_\_\_\_\_ nna \_\_\_\_\_ afantanno baychooti.

2. Itophiyunnita qara afuubbatte booso ikkitinori

A. \_\_\_\_\_

B. \_\_\_\_\_

C. \_\_\_\_\_ nna

D. \_\_\_\_\_

3. Itophiyu budu sagalete dana ikkitinnore shoole borreesesse.

A. \_\_\_\_\_

B. \_\_\_\_\_

C. \_\_\_\_\_

D. \_\_\_\_\_

#### V. Woroonni noo xa’muwara harancho xawishsha borreessitine qolle.

1. Itophiyu budu garinni babbaxxinoha qaamattote dana borreesesse.

2. Itophiyu gobanni baara widira sonkanni gidu dana borreesesse.

3. Qara Itophiyunnita miinju kifilla borreessitine xawishsha uyiyye.

4. Itophiyunnita baadilicho turizimete dananna yannanita turizimete dana borreessite lamente mereero noo badooshshe xawisse.

5. Itophiyunnita afuu booso borrotenni xawisse.

# FOOLIISHSHO ONTE

## WAAXANTINOTA QARA HAJUBBA

### Rosate dandoo

#### Rosanno konne rosu rossuhu gedensaanni:

- ❖ *Gawajitanno kemikaale baddano;*
- ❖ *Qara amale amadisiissannoricho affanno;*
- ❖ *Itophiyinke giddo gawajitanno baadillico assotta baddano;*
- ❖ *Hudenna moolle yitanno hedo affanno;*
- ❖ *Itophiyaho moollete koranna abbitanno gawajjo buxxanno;*
- ❖ *Xeenu fiinco kaarti moollete reqecci yitino qarqarra ledo noonsa xaadooshshe la 'e xawissanno affanno;*
- ❖ *Xeenu finco mashalaqqe, mashalaqqete tekinooloje horoonsidhe danditanno;*
- ❖ *Itophiyunniha moollete reqecci yitino targubba baddano;*
- ❖ *Moolle yaa hudde anchishshe daa calla ikkitinokkita korkaatunni buuxxanno*
- ❖ *Itophiyaho moolle gargarrannita baadillico doogga huwatanno.*

### Qara qara amado

- 5.1. Echi Ay Vii/ Eedisi (HIV/AIDs) Itophiyaho
- 5.2. Kemikaalenna xagga seerimale horoonsi'ra
- 5.3. Gawajitannota baadillico assootubba
- 5.4. Moollenna hude

## Bitima

Itophiyinke giddo babbaxxitinno waaxantinno qarrubba afantanno. Waaxantinno qarrubba gobbankera duucha ikkituronno qarra ikkitinnori: Echi Ay Vii, seenne ofooshshiisha, qaaqquullu hinko uma, diiru, diru iillikkinni adhamanna moollete reqecci assitanno korubba labbinoreeti. Echi Ay Vii manchi beetto calla amaddannonna waajjo mundeete seele gawajjitanno vayireseti. Eediisi Echi Ay Vii yinanni vayiresenni daanno xiwanaati. Caate, Seerimale xagga, Alkoole, Hashiishe, Kakkayisannonna, Goxisanno xagga manchi beetti fayyimma aana qara abbitannoreeti. Seenne ofooshshiisha qaaqquullu hiinko uma, diru iillikkinni adhamanna diiru jawajjitanno budu assootubbaati. Mollenna hude gobbankera qara qarrubaati. Moolle yaa manchi beettono ikko wolootu lubbo noonsari baalu waa hasidhannohura woroonni qarqaraho heeranno ikkitooti. Hude kayinni lubbo noonsari hasidhanno bikkinni sagale afira hoogate ikkitooti.

## 5.1 Echi Ay Vii / Eedisi Itophiyaho

Rosate dandoo:

Rosaano konne roso rossuhu gedensaanni:

- ❖ *Echi ay vii / Eedisi maatiro kultanno;*
- ❖ *Echi ay viinna Eedisi badooshe xawissanno;*
- ❖ *Echi ay vii / Eedisi taraawanno doogo borreessitanno;*
- ❖ *Echi ay vii / Eedisi gargadhinanni doogo hasaabbanno;*
- ❖ *Eediisi xissora reqicci yitino mannooti aana assinanni irko kultanno*
- ❖ *Echi ayi vi / Eedisi xisso abbitanno qarrubba xawissanno.*

### Qara qaalla

- Echi Ay Vii
- Eedisi
- Taraawanno doogo
- Gargadhinanni doogo

## Echi Ay Vii / Eedisi Itophiyaho

Rosaano, shoolki kifilera Echi Ay Vii/ Eedisi xisso qoqqowi'ne deerrinni maa labbanoro rosiinoonni. Xaa kayinni tenne kifile deerrira Echi Ay Vii xisso Itophiyu deerrinni maa labbanoro rossinanni. Aanchitinne leelki kifile deerrinni Ach Ay Vii/ Eedisi xisso Soojaati Afiriki gobbuwara tarawosse deerranna abbitinno qarrubbare rossinanni.

**Xa'mo:**

1. *Echi Ay Vii / Eedisi yaa mayyaate?*
2. *Echi Ay Vii / Eedisi dagatenna miinju aana may qarra abbano?*
3. *Echi Ay Vii hiiitto assine gargadha dandiineemo?*

Echi Ay Vii yaano su'mi vayresetu su'ma ikkanna Eedisi yaano qaali kayinni xib-baho uynoonni su'mati. Kuni dhibbi mannuwiinni mannaho taraawanno

dhibba ikke Ech Ay Vii yinanni vayresenni daanno. Tini vayrese manchi beetti kalaqamunni afirinota dhibba gargadhate wolqa laanshesanno.

Echi Ay Vii woy Eedsi vayrese mundeensa giddo noonsa mannira addi addi mitiimma iillitansara dandiitanno. Konni daafira Echi Ay Vii woy Eedisi vayrese tarawo murate dagoomaho taraawote doogo illacha tunge rosiisa hasiissanno.

**Xa'mo:** *Rosaano gaamotenni hasaabbine Echi Ay Vii woy Eedisi vayirese tarabbano doogo afinooniro rosiisaanchi'nera kulle.*

Eedisi xisso taraabbanohu shoole qara doogoniiti.

- xisso noosi manchi ledora assinanni siimu xaadoshshinni,
- xisso noosi manchiwiini haa'ne keeranchoho uynanni mundeenni,
- amatewiini qaaqqoho ilamate albaaninna ilami gedensooni noo mundeetenninna unuunu kikkisamenninna
- daafantino qaraamu uduunichinni (Lawishshaho: marfeteninna wolereno manchi beetto qasanno qaraamu siwilu udiininni).

Tini xisso Itophiyunna Soojaati Afrikira hala'ladunni taraawatenni lowo manni lubbo ba'ate kora ikkitino xisso. Mittimmattenna miinju lopho iima jawa gufeenya abbitanno xisso. Tini xisso manchi beetto ikkinoha baala meyaata ikkito labbaaha jawa ikko shiima rosinoha ikko rosinoikkiha baddanoikki xisso. Eediisi xisso miinju lopho iima qarra ikkitino wedellu gaamo gawajjateni kainohunni gobbatelophoranna maatete heeshsho aana qarra abbitano xisso.

### **Mittu ontu waaxonni loose**

*Echi Ay Vii /Eedisi miinjunna mittimate aana may qara abbanoro lame lamu waaxonni hasaabbine dawaro kifile'nera shiqqishshe.*

Echi Ay Vii woy Eedisi anna woy ama shaatenni qaaqquullu anniweelannonna amiweelanno gede assitano xisso. Kuri aniweeltinonna amiweelitino qaaqquulli qarqaraho lowo qarra ikkitara dandiitanno.

**Korkaatuno:** qarqarinsanni kaa'lo woy irko hasidhanohuraati. Irkonna kaa'lo hooggino qaaqquuli doogote galtanore moortanorennna rosunni badhera gatinore bisonsa woxeho hirtanore ikkatenni qarqaru mittimate heeshshoranna uminsa aana jawa qara abbitanno.

Xa'phomunni,kuri amanna anna hooggino qaaqquulli qarqaru iimanna uminsa heeshsho iima Eediisi xisso qarra qara ikate kaima ikkitinohura qaraqaraho teessino manooti tenne xisso gargadhate hayyo iima baqqi yitinore ikka hasiissanno.

Eediisi/ Echi Ay Vii yinanni vayresenni manchi beetti bisi giddora e'uhu gedensaanni bisunita kalaqamunni xibba gargadhate xuka laanshese hune reyoote geeshsha iillishshano xibbaati woy wole shitanno xissora sayise reqechi assannoho.

Kalqete aana 2020 Awuropu kiiro jeeftora 37.6 miiloone Eedisete xiwamaano nooha ikkana, Kuri giddonni 2/3 anga ikkitanori Afiriku giddo afantanore ikkitanna Itophiyu giddo 2018 Awuropu kiiro garinni 718,000 kume xiwamaano heedhano. Kuni xibbini kainohunni Itophiyu gobbara 2019 Awuropu kiiro garinni 310,000 kumi qaaquulli amiweeloh woy aniweeloh.

Echi Ay Vii / Eedisi xisso gawajjitanohu bisu giddo xibba gargaritanota waajjo mundeete seellaati. Kunni garinni bisunita kalaqamuni xibba gargadhate xuka gudanno daafira manchu xiwamaancho ikkano yaate. Tini xisso amaddanohu manchi beetto callaati.

***Xa'mo: Echi Ay Vii Vayrese hiiko afantanno?***

**Echi Ayi Vi vayirese afantanohu:**

- xisso noosi manchi mundeete giddo;
- xissotenni amadantinno meyaatenna labbaahu sirote seella du'namaano giddo
- xisso noose ama unuunni ado giddonna
- daafantino qaraammu uduunichira (marfe, milaacenna labbanori giddo afantanno).

Xiinxallo kultano garinni Echi Ay Vii vayrese batinyunni heedhannohu mundeetenna sirote seella du'namaanno giddooti.

**Echi Ay Vii / Eedisi gargadhinanni doogga**

***Xa'mo: Echi Ayi Vi /Eedisi dhibba hiittooni gargadha dandiinanniro xawisse.***

Baabbaxxitino xagga noonsakkirinna kittiwaatu gargaroshi noonsaikki xisso no.

**lawishshaho:** Kaanserenna Sukkaarete xibbi. Hattono, Echi Ay Vii Eedis xisso gargadhinanni xagga taraawosi ajinshanni xagga noosikki dhibbaati. Ikkolanna kayinni, kaanseretennina sukkaarete xissonni Eedisi xisso baxxitannohu woyyitino gargaroooshu doogo afi'rasinniiti.

### Echi Ay Vii Eedsi taraawo agadhinanni doogo

- Qoropha – adhamate albaanni siimu xaadooshshe assatenni qoropha,
- Ammanama- mittu mittete ledo adhame kaajje hee'ra,
- Qaraamo siwiilla wolu horoonsirinoha horoonsi'ra hooga,
- Hinkote fiquiqicho mittu horoonsi'rinoha wolu horoonsi'ra hooga,
- Akimete udiinnicho seekkine ganfe horoonsi'ra,
- Vayrese giddose afantanno ama godobbanno yanara akimete amaaile afiranna
- Siimu xaadooshshi yannara kondome horoonsi'ratenni tenne xisso gargadha dandinanni.

Xaphoomunni qoropha, mittu mittete ledora ammaname hee'ranna kondome horoonsi'ra mitteenni QAK wodhooti yinanni.

### Shae 5.1 QAK Wodho Eedsete xiwani aana

Q	Qoropho	Siimu xaadooshshe assa hooga.
A	Ammanama	Mittu mittete ledo ammaname siimu xaadooshshe horoonsira.
K	Kondome	Siimu xaadooshshi yannara kondome garunni horoonsi'ra.

Afa hoogatenni woy egennote anjenni duuchu manni hedannohu Echi Ay Vii Eedis xissonni amadamino manchiwiinni wolu keeranchu manchi widira tini xisso taraabbanno yee hedannohu:

- xisso noosi manchi ledo ofollatenni;
- xisso noosi manchi anga kikkisatenni;
- sunqamatenni;
- shumate mine guto horoonsiratenni;
- mittu uduunnichira waa agatenninna;
- biinetenni taraawano yee hedanno manni duucha ikkironno.

Tini Eedis xisso kayinni kuri aleenni xawinsoonni doogonni xiwamino manchinni keeraanchu manchi widira ditaraabbanno.

Kunni aleeni xawinsoonni egenote anjenni gumuloonni doogonni Eedis xisso taraabanno yite daga hedatenni kainohunni, Eedis xisso afi'rino manni aana mittimate heeshshonsa aananna surensa aana jawa qarra illishshanni leellannonsa. Kayinilla, xisso afidhino mannira daga hasiisannonsa irkonna gamba assatenni kaa'lo hasiissanno.

**Lawishshaho:** Xisso afi'rino mannira daga

- udiinnensa hayishshatenni,
- minensa feyatenni,
- hojjatanokki gede gamba yee baxxile aatenni kaa'lo assa hasiisanonsa.

Qarqaru dagara Eedisi xibbi sa"ano doogo, gargadhinannni doogonna Eedis ixibbinni xissamino mannira hasiisanno baxxili daafira rosiicho aa hasiissanno.

**Xa'mo:** *Echi Ay Vii woy Eedisisi xiwanni abbanno qarri maati?*

### Echi Ay Vii woy Eedisisi xiwanni abbanno qarri maati?

- gobbate wolqara qara ikkitinota ajja dume gawajjitanno,
- gobbate miinju lopho ajjishshano,
- qaaqqulu aniweellonna amiweelo ikkano gede assanno,
- gobba doogote galanno manni kiiro leddannonna wole kone labbano qarrubba abbitanno.

## Rosiishsha 5.1

### I. Aante shiqqino xa'muwara dawaro borreessitine qolle.

1. Echi Ay Vii/ Eedisi taraawano doogo xawisse.
2. Eedis xiwanna gargadhinanni doogo kulle.
3. Echi Ay Vii nna Eedis badooshe xawisse.

## 5.2 Kemikaalenna xagga seerimale horoonsi'ra

### Rosate dandoo

Rosaanno konne roso rossuhu gedensaanni:

- ❖ *Gawajitanno kemikaale bade borressitanno;*
- ❖ *Qara araado amadisiissanno keemikaalla borreessite kultanno;*
- ❖ *Seerimale xagga woy kemikaalla horoonsiratenni daggano qarrubba xawissannonna*
- ❖ *Qarqarinsara wedellu horoonsiranni leellanno seerimale kemikaalla kultanno.*

### Qara qaalla

- |                   |            |
|-------------------|------------|
| • Seerimale xagga | • Jingilli |
| • Alkoole         | • Kakkaysa |
| • Hashiishe       |            |

Shoolki kifilera xagga seerimale horoonsira qoqqowi'ne deerrinni maricho labbannoro rossinoonni. Tenne kifilera kayinni Itophiyinke giddo xagga woy kemikaalla seerimale horoonsira yaanno rosu umo rossinanni. Ha'runsitinenna leelki kifilera Soojjaati Afirikira xagga woy kemikaalla seerimale horoonsi'ra yaanno rosu rossinanni.

Xagga woy kemikaale seerimale horoonsi'ra yaa babbaxxitino kemikaaloota manchi beetti surre hagiirsii late yine horoonsi'nannireeti.

Kalqete deerrinni 190,000,000 (mitte xibbeena honsaa miiliyone) aleenni ikkitanno mannooti xagga woy kemikaale horoonsidhanni leellitanno. Xagga seerimale horoonsira kalqete deerrinni yanna yannatenni lexxitanni daggino ikkitooti. Tenne ikkito hala'ladunni horoonsidhannori dirinsa 30 mereero noonsa wedellootaati. Itophiyinke giddonno babbaxxino qarqarira yaano hala'ladunni quchummate qarqara heedhanno wedellooti tenne kemikaalla horoonsidhanni leellitanno.

**Xa'mo:** Rosaano qariqari 'nera labbalu woy seennu wedelli horoonsi 'ranori  
giddo araado amdisiisatenni woy jallinna jangalli assitannori hiikkuriiti?

**Itophiyinke qarqarira wedellu horoonsiranni leellanno xagga woy agatto  
yneemmorì:**

- alkoole
- chaate
- shiishu
- siixo (qo'moolu)
- kokayne yinanni kemikaale kooka yinanni haqqenni
- opiyume woy Opiyode yinanni kemikaale poppiy yinanni mu'rote haqqewiinni;
- hashiishe woy marijuana yinanni kemikaale kanabiisetewiinninna
- heerooni yinanni kemikaale labbannori gobbankeranna wole gobbarano wedellu horoonsiranni leellanno seerimale kemikaalootaati.

Xagga woy kemikaalla seerimale horoonsira yaa gashshootunna xaggate egennaammi fajjo nooikkiha manchi beetti babbaxxitino garimale ikkitora horoonsi'rate harinshooti. Mini giddo woy industirete giddo loonsoonni kemikaalla manchi beetti surresi wolu hasiissannokki loosira qineessate horoonsi'rate yaate.

Sequ woy siixa, Sijaara wiliishhanna agatto aga seerimale ikkitooti. Tenne seerimale doogonni xagga woy kemikaalla horoonsi'ra manchi beetti aana araado ikkitanno. Seerimale xagga horoonsira qaaqqimmate hanaffe qeedhichimmattenna saeno geedhimmate geeshsha manchi beetti surrera araado ikkite jawa fayyimmattenna dagoommite heeshsho aana qarra abbitanno.

## Loosu assoote

Mittu qarqarira kaayyamonna kaayyite yinanni minaaninna minaama heedhanno. Barrunni mitto barra kaayyite xiwante fayyimmate owaantewa hadhu. Fayyimmate owaante aannohu dotorchu buuxo assisehu gedensoonni kaayyite mannimma giddo shekeerete xisso nooseta kule, lamalu barrira horoonsidhanno xagga uyse. Kaayyite fayyimmate mine uynose xagga adhite minisera higguhu gedensoonni, wona fayyimmate mine dotorichu uynose hajajo garinni xagga mitte higge egemitu, ikkollana kayinni kaayyitera xissose aana woyyimma dagguikkinni layinki barri iilli. Kaayyamono minisi ama aana xisso jawaatanni hadhinota laihu gedensoonni, xisso kaayyitera woyya hooggino hu uynoonnise xagga gudisse horoonsira hoogasenni ikkinota kule gattino xagga Kaayyite gudisse egemmitanno gede kuli. Kaayyiteno minaannise kullose garinni uynoonnise xagga duuchanta mitteegge egemmitu.

Rosiisancho ballo, Tenne yaatto rosaanokki gaamotenni ofoshshiishensa kaayyite horoonsidhino xagga umise aana horo uytannoro woy gawajjitanoro rosaano hasaabbe hedonsa kifilete millansara filiqishsha assitanno gede irkisinsa.

Jeefotenno, Kaayyite xagga dotorichu hajajino garinni horoonsi'ra hoogase mayne woshshinanniro rosaanokkira xawishsha uyinsa.

Itophiyinke giddo wedellu kemikaaloota horoonsi'rannohu babbaxxino korkaatinniiti.

- miillansa xiiwonni, baxxino hunni rosu mini rosaano miillanninna wedellu gaamonni,
- gangalattote hasatto korkaatinni,
- Mite mite ama'note xiiwonnninna w.k labbanno korkaattanni wedellu babbaxxitino kemikaallota horoonsi'rate kaiminni araadote sae aamamanno.

### Seirimale horoonsi'nanni xagga sasewa gaammanni.

#### Insano:

##### 1. Yaaddaaleessa assitanno xagga (depressants)

Tini xagga manchi beetti aana goxano abbitanno woy caacceesitanno xaggate danaati.

## 2. Kakkayissanno xagga (stimulants)

Tini xagga manchi beetti surre babbaxino loosira kakka'anno gede assitanno xaggate danaati.

**Lawishshaho:** Manchi beetti aana wodanu xiqqeessa leddanno, mundeete xiiwo leddanno, geannoikki gede assitanno, tushshishannonna woy akatu soorro abbitanno xaggaati.

## 3. Jingilli assitanno xagga (hallucinogens)

Tini xagga manchi beetti meessaneetosi hawanno gede assitanno xaggaati.

### Xagga seerimaletenni horoonsi'rate rosantino malaatta

Seerimale xagga woy kemikaalloota horoonsi'ra manchi beetti umisi aana, mittimmate heeshsho aana, mini giddo loosu aana, gashshootu wodho aana, babbaxino qarra abbitanno.

**Xa'mo:** *Seerimale kemikaalla woy amale amadisiissanore horoonsira dagoomaho abbitanno mitiimma maatiro kulle.*

Xagga seerimale horoonsi'rate ledo amadante dagganno mitiimma malaata.

- deeru aleenni hexxa,
- mannu ledo noosi xaadi injinoha ikka hooga,
- loosu woy rosu aana ikkadimma hooga,
- loosu aana keeshsha hooga,
- xagga woy kemikaalla horoonsi'rikkinni looso loosa hooga.
- woxu qarra afira,
- siimu xaadooshi hasatto qarrubba hee'rра,
- kemikaalla horoonsi'rate hasatto luppi yite leella,
- uynoonnisi hajajo wonshshate qarri hala'ladunni leella,
- wodhote ledo amadamino qarri hala'ladunni leella,
- xagga horoonsi'ra agurate hasatto araadu korkaatinni urrisa hooganna
- mitto looso loosate albaanninna gedenoonni xagga horoonsirate ikkito hala'ladunni leella qara xagga horoonsi'rate qarrubba malaateeti.

**Xa'mo:** Seerimale xagga woy kemikaalla horoonsi'rate jawu qarri maati?

Seerimale xagga woy kemikaalla horoonsi'rate ledo amadame daanno qarri bab-baxxinoha ikkirono woroonni xawinsoonni qara qarrubbaati.

**Insano:**

- surrete xiwanni;
- kaanserete xisso;
- wodanu daafuri xisso;
- afalete xisso;
- surrete qaagate mitiimma;
- shombunna mulu xisso;
- sagalete hasatto aja;
- foolate amanyooti xisso;
- Echi Ay Vii/ Eedisi xissora reqeccaawate qarranna
- hedeweelcho messaneete hawanna wolero kore labbanno qarrubba abbitanno.

**Rosiishsha 5.2**

**I. Aante shiqqino xa'muwarra halaaleho woy kaphoho yitine dawarre.**

1. Xissote fayyimmate uurrinshanni uynoonni xagga hajanjoonihu aleenni horoonsira xagga seerimale horoonsirate yinanni.
2. Xagga horoonsira agurate hasatto araadu korkaatinni uurrisate diqarramanni.
3. Caate horoonsi'ra manchi beetti aana fayyimmate qarra diabbitanno.

**II. Woroonni noo xa'mora xawishsha uuyye.**

1. Xagga seerimale horoonsi'ratenni leellitanno maalatta hiikkoreeti?
2. Manchi beetti aana araadu hiiitto ikke kalaqamanno?

## 5.3 Gawajjitannota baadillico assootubba

### Rosate dandoo

#### Rosaanno konne roso rossuhu gedensaanni:

- ❖ *Itophiyinke giddo gawajjitanno baadillico assotta xawissanno;*
- ❖ *Seene ofoshshiisha abbitanno qarra kultanno;*
- ❖ *Itophiyinke giddo afamanno adhamate amanyoote seera borreessitanno;*
- ❖ *Diiru gobbankera noo deera hasaabbannonna*
- ❖ *Qaqquullu hiinko uma hiikko qarqarira leeltannoro xawissanno.*

### Qara qaalla

- **Gawajjitanno ikkito**
- **Seenne ofooshshiisha**
- **Diiru**
- **Hinko uma**
- **Anjete adhamme**

Rosaano, tenne kifile deerrinni baadillico gawajjitanno assootubba Itophiyu deerrinni afantannore rossinanni. Aanchitinenco leyikki kifilera gawajjitanno baadillico assootubba hala'ladunni Itophiyinke giddonna Soojaati Afrikira afantannore rossinanni. Itophiyu giddo duucha gawajjitanno budu assootubba no. Tenne amado aana rossinannihu, Seene ofooshshiisha, qaaqquullu hinko fushsha, yanna agadhitinokki adhammenna diiro labbinore rossinanni. Itophiyu giddo duucha gawajjitanno budu assootubba no. Tenne amado aana rossinannihu, seenne ofooshshiisha, qaaqquullu hinko fushsha, yanna agadhitinokki adhammenna diiro labbinoreeti.

## A. Seenne ofoshshiisha

### Loosu assoote

Seenne ofooshshiisha fayyimmansara abbitanno qarri noonso dino? Seenne ofoshshiisha fayyimansara qarra abbitanno yite heddanno gaamonna seenne ofoshiisha fayyimansara qarra diabbitanno yitanno hedo irkissanno rosaanote gaamo mimmitu ledo yekkeerantanno gede assatenni jeefoteno rosiisaancho, halaalu hedonni gumulinsa.

Seene ofooshshiisha budu egenonni meya beetto boqichi aana afamanno bixicha woy wahicho murre hoollanni harinshooti. Tenne meya beetto ofoshshiishate amanyoote barcinshiishate yine woshshinanni. Konne assinanni korkaatino, dagoomittete heeshsho giddo meya beetto barcima hoogguro ila diseekkanno woy mine udiinne hiiqqaqqitanno yine hendannihuraati.

### Gaamote Looso

*Rosaano qarqari'nera meya beetto ofoshshiishate rosichi nooro mayi korkaatinni ofoshshiinshanniro gaamotenni hasaabbine hedo'ne borrotenni irkissine filiqqisha'ne kifilete jaalla'nera shiqishshe.*

### Meya beetto ofoshshiinshani korkaata

- siimu xaadooshshi hasattose ajishate,
- budu garinni seeminatese agarate,
- meya beetto barcima hoogguro budu garinni coichimma diagadhitinote yine hendannihuraati,
- meya beetto wodanaame ikkitanno yine hendannihuraati,
- mite mite amma'no hajajo ikinohuraati,
- meya beetto iltanno yannara barcintinota ikkituro lowo qarri diheeranno yine hendannihuraati,
- galte afi'rate balaxote qixxaawootinna w.k.l. meya beetto barcinshiishate budu korkaatubbaati.

## Meya beetto ofoshshiishatenni daanno qarra

**Xa'mo:** *Meya beetto ofoshshiishatenni daanno qarri maa lawanno'ne?*

Meya beetto ofoshshiishatenni dagganno mitiimma batinyeno ikkituro qara ikkitinore lamu gari qarra kullanni.**Hakkurino**

### I. Muli yanna qarra

### II. Seeda yanna qarra

#### I. Muli yanna qarra

- meessaneete hawa
- jawa gede asse xissa
- titaanooste xisso
- barcintanno woyte sharrantanna xiiwe amadanno maninni kainohunni miqichu iima qarru iilannon
- jawa mundeete du'nama kainohunni meya beetto reytara dandiitanno.

#### II. Seeda yanna qarra

- jawu bassi kalaqama
- siimu xaadooshi yannara macchiishshantanno xisso kalaqama
- aganu mundee sirote bissi giddo kalaqamanno bassi korkaatinni kuusama
- duucha woyte shumate boombe xisso macchiishshama
- Echi Ay Vii Eedis xibbira reqecci yaa
- feestullu xisso, yaano jawiidi shuma boombenna way shuma boombe xaadate qarri kalaqamanno. Wolootu siimu xaadi hasatto aja, siimu xaado waajja, umonsa ammana hooga (saalfataa'ma) galte hossanni daganno qarrubbaati.

## B. Qaaqquullu hinko fushsha

**Xa'mo:** *Qaaqquulleho maxinete yinanni hinko fushshinanna affine egentinoonni?*

Itophiyinke giddo qaaqquullu hinko uma babbaxxino qarqarira rosantino

ikkitooti. Maxinete hinko yinanniti fula hanafanohu 5-7 aganni geeshsha noo qaaqquulliraati. Maxinete hinko qaaqquullu aana dhibba ikkituikkinni dhibbu macciishshama ikkite qaaqquuleho hisanyo huntara dandiitanno.

Qaaqquullu amatenne maxinete hinkonoonsa qaaqquullira angasenni gaanganansa hangaartanno yannara babbaxxitino xisso abbitanno shiimmaadda lubbuwa woy jarne eatenni qaaqquullu deeunna wolotta xissora rejecceesitanno.

Qaaqquulleho maxinete hinko uma Itophiyu deerrini duuchu qarqarira rosantinno gawajjitanno budu assooteeti. Maxinete hinko fushshinanni yannara qaaqqimmate yannara fushshinannihu ilaminkunni 21 barrinni ikkanna tenne maxinete hinko fushshate horoonsi'nanihuno milaaceteninna marfetenniiti. Kuri horoonsi'nanni uduunni coichimasi agaroonikkiha ikka dandaanno. Qaaqquullu hinko uma qaaqquullu aana ummoonni dargira hinko layinkimeeshsho fultannokki gede assate korkaatinna coichima agarroonikki udinnicho horoonsi'nanni yannara qaaqquullu Echi Ay Vii nna wolootu xissubbara rejecci yaa dandiitanno.

### C. Yanna agadhitinokki adhamme

*Xa'mo: Yanniweelo adhamme woy anjetenni hee'ne adhama abbitanno  
qarri maati?*

Lamunku meyatinna labbaahu qeedhicimmanna seeminatu yanna iillitunsakkinni adhantanno ha'rinshooti. Roore yannara, labbaahu qeedhichimma iillinoha ikkanna meyaati kayinni seeminate iillitukinni adhame heedhanohura roorenkanni qarraho rejecci yitinoti meya beettooti.

**Tini yannimale adhamme Itophiyu giddo sase doogonni ikkitanno.**

- annunna amate hasaawi callunni
- labbaahunna meyate hasaawinninna (aduulshinni)
- jajjabbu hasaawinniiti.

Yannimale adhama baadillichu qarqarira calla ikkikkinni jajjabba quchummaranno ikkitanni leellanno gawajjanno budu assooteeti.

**Lawishshaho:** Itophiyu giddo qaru quchumirano hala'ladunni leellanno.

**Xa'mo:** Gobbanke giddo yannimale adhamara korkaata ikkannori maatiro xawisse.

Annu woy ama tenne yannimale adhamme jawaachishannohu woy harunsitannohu worooni xawinsooni korkaatiniiti:

- seeminatensa agarate
- ilate sircho lexxate (batisate)
- budunni dagate mereero ayirre leellate
- miinete woxe afi'rate.

Yannimale adhamate ledo amadante dagganno qarruba.

- yanniweelo godowa
- hasinoonnikiti godowu gata
- yannimale qaaqko lossi'rate mittii'ma
- barru iillikkinni ilamanna qaaqquullu kiiro aje leella
- Eedisi xissora shufurunna harkummete xissora reqecci yaa
- ilate ledo amadamin korkaatinni rewote danora reqecci yaa
- areenna aruu badamate ikkito luphi yite leella
- iltanno ama feestullu xissora reqecci yaa
- quwu nookki qaaqquule ilama
- buxima (ooso loosi'rate ikkadimma hooga)

Yannimale adhamma gargarranni doogo

**Xa'mo:** Rosaano, Itophiinke giddo yannimale adhamme gargara dandiinanni yitine heddinanni? Heddinanniha ikkiro maa assine gargara dandiinanni?

Yannimale adhamme qarrubba ikkitinore dagate babbaxxitino doogonni rosiisa.

**Lawishshaho:**

- Raadootenni
- Televizhiinetenni
- Hasaawunni

- Yannimale adhama abbitanno qarra leellishshano borro amaddinota shiimmaada woraqata, gaazeexa labbinore horonsi'ratenni,
- Koo/Tee taalloonye dagate rosiisatenni,
- Wedellaho rosu mini yannimalete adhamme abbitano qarra rosiisa,
- Amma'note minna giddo yannimale adhama abbitanno qarra rosiisa,
- Konne looso loosano mannira gashshootu qorichu qaafu adhanna
- Rosu minna, babbaxxitino hajo biiro yannimale adhamme qarra ilachishe rosiissanno gede gashshootu xiiwo assa.

## D. Dii'ra

### **Xa'mo:**

*Rosaano qarqari'nera diirunni adhama maa labbannoro mimmiti'ne  
ledo hanni hasaabbine hasaawi'neta jeefote gumulo kifilete rosaanora  
shiqishshe.*

Dii'ru maya beetto wolqatenni adhinanni doogooti. Diiru meya beetto fajose gobbaanni wolqatenni adhate harinshooti. Wole kayinni adhano beettina adhantano beetto sumuu yaatenni diirunni adhamanni ikkito budu laoshinni keeraancho adhamaati yine hendanni. Diiru harinsho adhamate fajjo afidhanohu diirihunna diirantu beetto maatenna ayiddi lamunkuti sumuum noota anfihu gedensaaniiti. Itophiyahonna wole Afiriku gobbuwara dii'ru adhama rosicho ikkitino seerimale adhammete ha'rinshooti. Diiru harinsho hanaffanohu dii'nanni beetto dii'rantannota affuikkinni woy maatese affuikkiniiti.

Mito mito woyte dii'rantanno beetto dii'naniseta affe diiru ha'rinshora sumuu yitanno. Konne assitanohu meyaa beetto diiranose beetti ledora baxxantanoha ikkironna beettote maatte diiranno beetti beettonsa adhanota gibburooti. Togoo harinshonni diiru ikki gedensooninno beettote maatera dii'rantinota kullanni.

Beetto diiramase sumuu yite diirantinota ikkituro, dii'runni daanno qarri shiima ikkanno. Lowo yannara dii'ru ikkihu gedensaanni dii'ri beettina dii'rantu beetto maatehu geeru hasawunni coyire mursiisi gedensaanni dii'rantino beetto ledo galte ikkite heedhanno. Kuni ikkanohuno mitteegge dii'rantino beetto wole galte afirate qarantanno yine hendanhuraati.

**Xa'mo:** *Labbalu seenne dii're adhate kakka "annohu mayi korkaatinniiti?*

### Itophiyu giddo dii'ru adhamme kora

- miinete baatooshshe baatate qarri hee'ra ,
- adhamate hasidhinori mereero budunni fajjinoonnihu adhamate ayiddu xaadooshshi hooga,
- adhamate yannara fulanoha batinye woxxe fushi'rate qarri hee'ra,
- meya beetto woy maatese xa'mirinoha labbaa beetto adhama gibburo woy baxa hoogguro,
- lamunku mimitoho adhamate sheemaate e'uronna minni maatensawinni adhantanno gede fajjo hooganna wolurino dii'ru adhamara qara koraati.

**Xa'mo:** Dii'runni adhamanno wedellichira woy adhantannotera  
may mitiimma iillitannoha lawanno'ne? Gaamotenni  
hasaabbine kifilete filiqqishsha shiqqishshe.

### Dii'ru adhamanni daanno qarra

- Diiru adhamanni daanno qarri aane nooho
- meya beettora, bisise aana gawajjo abbanno, dii'rannose manniwinni reyote geeshsha iillitanno mitiimma iillitasera dandiitanno,
- lamunku maate woy ayiddi mereero giwansho abbitanno,
- kalaqantanno giwanshoni kainohunni araaraho fushshinanni jiro/woxe,
- sumiimmete hooga kainohunni geinoikki adhamme/maatte/ kalaqantanno,
- coyinni ka'nohunni meyaa beetto surrese xiwama hattono umose hunate geeshsha iillitanno
- siimu xaadooshshinni daanno dhibbira reqecci yaa kalaqantanno

### Lawishshaho:

Echi Ay Vii Eedis xissora reqecci yaanna meya beettora hasidhinokki godowi gata.

### Kifilete looso

*Diiru adhamme ajishate dagoomunna gashshootu assa hasiissannoiri maatiro mimmitu ledo hasaabbine kifilete jaalla 'nera filiqkishsha shiqishshe.*

#### Diiru adhama hunate assa hasiissannore:

- diiru adhamanna dagganno mitiimmare daga babbaxxitino doogonni rosiissa **lawishshaho:** mashalaqqete buichonni, televizhiinetenna w.k. labbannorinni
- dagate giddo su'mi manna ikkitinorennu gashshootunni ikkitinoikki uurrinshuwa daga rosiissannonna dii'ru adhama hunate daga kakkayissanno gede assa
- meya beetto wolqa babbaxxitino doogonni. Hakkuno rosunni, gashshootunni, keeranchimatenninna mixotenni jawa qeecha afidhanno gede assa
- diiru harinsho giddo beeqqaano ikkitino wedelli aana yoote mini qoricha adha.

#### Rosiishsha 5.3

#### Woroonni shiqqino xa'muwara dawaro borreessitine dawarre.

1. Itophiyu giddo diiru adhama ikkitannohu mayi korkaatinniiti? Dii'runni adhantino minaanninna minaama mereero mayi qarri hee'rara dandaanno?
2. Yannimalenni adhammiro may qarri hee'ranno yitine heeddinanni?
3. Itophiyinke giddo meya beetto ofoshshiinshannihu may korinniiti?
4. Qaaqqullu hinko umme fushsha may qarra abbitanno yitine heddinanni?

## 5.4 Moollenna hude

### Rosate dandoo

#### Rosaano konne roso rossuhu gedensaanni:

- ❖ *Hudenna moolle yitanno hedo aana hasaabbanno;*
- ❖ *Itophiyaho moollete koranna abbitanno gawajjo xawissanno;*
- ❖ *Xeenu finco kaarti moollete reqecci yitino qarqarra ledo noonsa xaadooshshe la 'e xawissanno;*
- ❖ *Xeenu finco mashalaqqe, mashalaqqete tekinooloje horoonsidhe xawissanno;*
- ❖ *Itophiyunniha moollete reqecci yitino targubba bade kultanno;*
- ❖ *Molle yaa hude anchishshe daa calla ikkitinokkita korkaatunni xawissanno;*
- ❖ *Itophiyaho moolle gargarannita baadilicho doogga tittirte kultanno.*

#### Qara qaalla

- Moolle
- Hude
- Reqecci yaa

### 5.4.1. Moolletenna hudete tiro

- Xa'mo:**
1. *Moollete yaa mayyaate?*
  2. *Hudete yaa mayyaate?*

Mitte gobbara woy kalqete deerrinni way anje woy qarqaru ayyarera giddo qunfete anje leellanna hattonno baattote giddoydi wayinna baattote aaniidi way bisi hasi' nannihura woroonni ikkite mitte gobbara heedhuro hattenne ikkito moollete yinanni. Moolle aganna woy dirra keeshshitara dandiitanno. Moolle mitte gobba taalloonyenna giwirinnu looso gawajjитanni gobba lophotenni badhera higganno gede assitanno.

Moolle jawa kalqete ayyarete gade soorrama kainohunni kalaqantanno qarrubbaati. Ayyarete gade sooramanni kainohunni moolle mitte gobara seeda yanna qarra ikkite leellitanno. Moolle sagalete anjenna dagoomu mittimma aana jawa qarra abbitanno.

**Xa'mo:** *Manchi beetti moollete tiro mayi ledo amadisiise xawisanno?*

### Moolle sasu garinni xawinsanni:

**Insano:**

- **Xeenu jilbinni:** Moolle xeenu jilbinni amadisiinse tiro uynanni yannara xeena kalaqqanno ayyare aana ikkadu gomichu bikki heera hoogate
- **Giwirinnu:** Giwirinnu moolle yinanniti mu'rote hasiisanno way bikki ajje leellironna mu'rote aana gawajjo iilliturooti.
- **Way moolle:** Manchi beettira hasiisanno way jilbi qarqaraho hakuno garbu, lagu, buichonna w.k.l way bisi hee'ra hooga woy anje leellate ikkitooti.

**Xa'mo:** *1. Hudete yaa mayyaate  
2. Hude may korkaatinni kalaqantanno*

**Hude:** yaa mitte gobba qansootira jawa sagalete anje hee'rate ikkitooti.

### Hude kalaqqanno korubba:

- mitte gobbara olu hee'ra;
- dikkotenna dikkiraanote hassatto taala hooga;
- giwirinnu loosi gumaamo ikka hooga;
- mannu kiiro bati'ranna;
- gashshootu wodho qansootu qarra tirtannota ikka hooga hudete korubbaati.

## 5.4.2. Moollete koranna Itophiyinke aana abbitanno gawajjo

**Xa'mo:** *Mitte gobbara moolle may qarrubba abbitanno?*

### Mitte gobbara moollete kalaqamara kora ikkitannori:

- |                           |                      |
|---------------------------|----------------------|
| • gomichu anje hee'ra     | • dubbu giira        |
| • ayyarete gade soorramma | • quchumu hala'la    |
| • bushshu hoshoo shamme   | • mannu kiiro batira |
| • dubbu buujjama          | • qarqaru daafama    |

## Moolle abbanno qarra sasewa gaammanni.

### Insano:

1. Qarqaru qarra    2. Miinju qarra    3. Dagoomitte heeshsho qarra

1. **Qarqaru qarra:** Moolle qarqaraho way jilbi ajate kora ikkite, qarqaru way daafama qarqaraho heedhanno lubbuwa sirchinsanna kiironsa ajate woy ba”ate qarrira kora ikkitanno.
2. **Miinju qarra:** Moolle miinju lopho ajara lawishsha ikkitannori giwirinnu loosi gumi aja, dubbu aja, qulxu’mee kiiro aja, sagelete waagi lexxa, wayinni kalaqantanno elektirikete wolqa aja, way turizime aja, babbaxxitino fabirikkara hasiisanno way aja, quchumma teesaanote shiqishshanno way ajara kora ikkitanno.
3. **Dagoomitte heeshsho qarra:** Moolle dagoomitte heeshsho qarra ikkite manchi beetti keeraanchimma aana qarra abbitanno, manchi beetira hasiisanno way aja, qarqaru daafama lexxa, ajino giwirinnu gumini kainohunni yaado abbitanno. Moolletenni reqecci yaate deerri iillanno qarrino hattonno baxxanno.

### Lawishshaho,

heeshshonsa way bu’ara irkidhino mannootti heedhannowa moolle ikkituro, lowontanni hudenenni gawajjantannore ikkitanno.

Moolle way coichima ajjishshanno. Korkaatuno, shiimu way hee’ra way giddo heedhannori qarqara daaffannori haayishshantano ikkihura way bisira daafama lexxitanno.

**Xa’mo:** *Itophiyinke giddo rosantinno moolle gargadhinanniti baadillico  
hayyo ikkitinore gaamotenni hasabbine kifilete miila ’nera  
filqishsha shiqishshe.*

### Rosantino moolletenni dagganno qarrubba.

- giwirinnu loosi gumi aja,
- duriisu kalaqama, moollete kainohunni mitte base halallitte ikkitanno qoleno, bushshu bubbetenni hoshooashamanno

- moolle hude abbitanno,
- baatote heedhannonna way giddo heedhano kalaqamira heedhanno baychi gawajjama,
- sagalete anjenninna way daafamanni lubbo noonsari way bisi giddo aja,
- batinyu manni darama, kunino gobbatte giddo mannu hee'ranno baycho soori'ranna gobbatte giddo daramanno kalaqantanno,
- way ajanni kainohunni wayinni kalaqantanno elektirikete wolqa aja,
- babbaxxitino fabirikkara way aja,
- daga gea hooga,
- hendoonnikki giira kalaqamanna wolen konne labbannori roore yanna moollete kaiminni kalaqantanno qarrubbaati.

### **5.4.3 Itophiyaho Moollete requecci yitino qarqarra**

**Xa'mo:** *Itophiyinke giddo moollete requecci yite leellitanno qarqarrubba woy qoqqowubba kulle.*

Itophiyinke giddo moolletenni requecci yino qarqaraati yinanniri Sumaaletenna Affaarete qoqqowi qarqariaati, **Ledoteno**, Oromiyu qoqqowi xea baatto gaangawinna Wodiidi daga dagoomi manni qoqqowooti. Itophiyaho ayyarete gade soorro, kalqete iibbillu jilbi lexxa, dirranno xeeni aje leella, mannu kiironni dubbu buujjamanna baatto babbaxxitino ayyarete gade soorritanno ikkito loosate hayyo lexxa gobbankera moollete koraati.

Itophiyu giddo waajishshanno moollenna hude ikkitinohu 2015 Awuroppu kiiro garinni Aliyyenna mereeri Itophiyra ikkitinoti 10,000,000 mannanna jawa mu'ro gawajjite sa'ino busha moolleeti.

**Xa'mo:** *Itophiyu giddo moolle kalaqanno korkaati maati?*

**Moolle Itophiyinke giddo kalaqamate kora ikkitinori:**

- baattotenna way iibbilli jilbinni;
- ayyarete taraawonnninna ayyarete ikkitonni;
- bushshu qunfe deerri ajinoha ikkanna
- way amadonna hasatto taala hooga w.k.l no.

#### 5.4.4 Itophiyinkera moolle gargarranni doogga

**Xa'mo:** *Moolle gargadhinanni dooga ikkitinnore borrotenni rosiisaanchi'nera shiqishshe.*

Manchi beetti moollete kainohunni giwirinnu loosi aana daanno qarra gorsu loosininna loonnsanni gidu dana soorrateeni gargadha dandaanno. Moolle gargadhinanni hayyo horoonsi'ra hoogiro manchi beetti reyotenna babbaxxino qarri giddo uwara dandaanno. Manchi beetti moolle batinye doogonni gargadha dandaanno.

**Lawishshaho:**

- kofatto – batinye koffatto kofatenni moollete yannara waa afi'ra dandiinanni
- baato hayyoteni loosira;

**lawihshaho** moollete yannara lowo waa hasidhannokki gidu dana horoonsi'ra

- xeenu waa kofe amadatenni;
- mu'ro kaasatenni;
- bushshu hoshoo shamme gargaratenni;
- daafamino waa wirro co'eesine horoonsi'ranna woleno kone labbino doogonni moolletenni daanno qarra gargadha dandiinanni.

## FOOLIISHSHOTE XAPHISHSHA

- Itophiyinke giddo babbaxxitinno waaxantino qarrubba afantanno.
- Waaxantino qarrubba gobbankera duucha ikkiturono qara ikkitinnori kayinni Echi Ay Vi/Eedisi, seenne ofoshshiisha, qaaqquullu hinko uma, dii'ru, diru iillikkinni adhamanna moollete reqecci assitanno korubba labbinoreeti.
- Echi Ay Vi yaano su'mi vayresetey uyinooni su'ma ikanna Eedisi yaano qaali kayinni xibbah uynoonni su'mati.
- Eedisi xisso taraabbanohu: xisso noosi manchi ledo assinanni siimu xaadooshinni, xisso noosi manchiwini haa'ne keeranchoho uynanni mundeenni, amatewiini qaaqqoho ilamate albaaninna ilami gedensaanni noo mundeetennina unuunu kikkisamenninna daafantino qaraamu udiinnichinniiti.
- Tini xisso Itophiyahonna Soojaati Afirikira hala'ladunni taraawatenni lowo manni lubbo ba"ate kora ikkitino xissooti.
- Mittimatenna miinju lopho iima jawa gufeenya abbitanno xissooti.
- Echi Ay Vi/ Eedisi ila ayidde ama shaatenni qaaqquullu anniweelannonna amiweelanno gede assitano busha xissooti.
- Echi Ayi Vi/ Eedisi afamannohu: Mundeete giddo, meyatenna labbaahu sirote seella du'namaano giddo, unuunu ado giddonna daafantino qaraammu uduunichiraati.
- Echi Ayi Vi/ Eedis taraawo agadhinannihu: **qorophatenni**, amanamatenni, qaraamma siwiilla wolu horoonsirinoha horoons'ra hoogatenni, fiqiiqicho mittu horoonsirinoha wolu horoonsi'ra hoogatenni, akimete mini udiinnicho seekkine ganfe horoonsi'ratenni, vayrese giddose afantanno ama godobbanno yannara akimete amale afiratenninna siimu xaadooshshi yannara kondome horoonsiratenniiti.
- Xagga woy kemikaalla seerimale horoonsi'ra yaa babbaxxitino kemikaaloota manchi beetti surre hagiirsiiate yine horoonsi'nannireeti.
- Itophiyinke qarqarira wedellu horoonsiranni leellanno xagga woy agatto yineemmor: alkoole, caate, shiishshu, siixo, kokayne opiume woy opioidi hashiishenna heerooni labbannori wedellu horoonsiranni leellanno seerimale kemikaalootati.

- Seenne ofoshshiisha, qaaquullu hiinko fushsha, yanna agadhitinokki adhammenna diiro labbinori gawajjitanno ikkitoti.
- Mitte gobbara woy kalqete deerrinni way anje woy qarqaru ayerera giddo qunfe aje leellana hattonno baattote giddoydi waynna baattote aaniidi way bisi hasi' nannihura woroonni ikkite mitte gobbara heedhuro hatenne ikkite moollete yinanni.
- Hude mitte gobba qansootira jawa sagalete anje hee'rate ikkitooti.
- Mitte gobbara moollete kalaqamara kora ikkitanori: gomichu anje hee'ra, ayyarete gade soorrama, bushshu hoshooshamme, dubbu buujjama, dubbu giira, quchumu hala'la, mannu kiiro batiranna qarqaru daafama labbinori moollete kalaqamara qara qarrubbaati.
- Itophiyinke giddo moolle tenni reqecci yitino qarqaraati yinanniri, Sumaale, Affare, Oromiyu qoqqowi xea baaatto gaangawinna Wodiidi daga dagoomi manni qoqqowooti.
- Itophiyinke giddo moolle gargarate horoonsii'nanni hayyo ikkitinori: mu'ro kaasa, dubbo bujja agura, koffatto horoonsi'ra, way co'ichimma agarranna karo kara labbinori moolle gargadhinanni hayyooti.

## Xaphishshu Rosiishsha

### I. Aante shiqqino xa'muwara halaaleho woy kaphoho yitinanni dawarre.

1. Eedisi xisso noosi manchi anga amadatenni xisso keeranchu manchira taraabbara dandiitanno.
2. Eedisi xisso miinju lopho iima qara ikkitino geerra shaatenni gobbate qarra abbitanno.
3. Eedisi xisso giddonsa no meentinna labballu sirote seella giddo Echi Ay Vii dianfanni.
4. Kalqete deerrinni xagga seerimale horoonsira xaa yannara ajjanni daggino ikkitooti.
5. Meya beetto ofoshshiisha siimu xaadooshshi hasatto ajishshanno.
6. Dii'ru baadillichote qarqarirano ikko, jajjabba quchummara hala'ladunni anfanni gobbate qarraati.
7. Moolle daggannohu gobbate hude batidhurooti.
8. Daga ge'e hee'ra hooganna hendoonnikki giira kalaqama, moolletenni dagganno qarrubbaati.
9. Agatto manchi beetti surre garimale looso loossanno gede kakkayissanno.
10. Qaaqqullu gaangaana babbica woy kokkericho mura gawajjanno bude dikkino.

### II. Woroonni shiqqinno xa'mora taalo dawaro doortine qolle.

1. Eedisi vayrese afantannohu.....  
A. Manchi beettinni fulanno hunkiinni      B. Shumate giddo  
C. Unuunu ado giddo                                D. Sagalete boombe giddo
2. Eedisi xisso gargadhinanni doogo ikkinoikkihu hiikkonneeti?  
A Siimu xaadooshshe duucha meenti ledo xaadooshshe assa  
B. Qoropha  
C. Kondome horoonsira  
D. QAK hayyo horoonsira

3. Woroonni noori giddo mitte Eedisi xisso taraabbanno doogooti.
    - A. Xisso noosi manchi ledo ofolla
    - B. Shumate mine mittimmatenni horoonsi'ra
    - C. Mittu udiinnichira waa aga
    - D. Qaraamma siwiilla mittimmatenni horoonsi'ra
  4. Konni woroonni noori giddanni mittu xagga seerimale horoonsi'ratenni daanno qarraati.
 

A. Surrete xiwani	B. Kaanserete xisso
C. Afalete fayyimma	D. 'C' agurranna baalunku dawarote
  5. Seeda yanna gedensaanni meya beetto barcinshiishatenni daanno qarra ikkinohu hiikkonneeti?
 

A. Jawu bassi	B. Meessaneete hawa
C. Titaanosete xisso	D. Mundeete xisso
  6. Moollete kalaqamara kora ikkinokkihu hiikkonneeti?
 

A. Mannu kiilo bati'ra	B. Haqqe kaasa
C. Gomichu aja	D. Quchumu hala'la
  7. Xaa yannara moolle gobbatenni ajishate horoonsi'nanni hee'noonni hayyo ikkinohu hiikkonneeti?
 

A. Baattote ofolla biifisa	B. Ayyarete ikkito buuxa
C. Bushshu dana buuxa	D. Mu'ro kaasa
- I. Fano bayicho halaalanya dawaro borreesse.**
1. ....manchi beetti, kemmkaalla woy agatto horoonsiratenni umisi iima kalaqantanno ha'runsoot.
  2. Fayyimmate minini uynoonni xagga hajajote aleenni horoonsi'ra .....yinanni.
  3. ....manchi beetti aana goxano abbitanno woy caacceessitanno xaggate danaati.
  4. Itophiyinke giddo yannimaletenni adhamate doogo ikkitinori .....nna.....ti.
  5. Meya beetto hasidhukkinninna affukkinni labbaa beetti wolqatenni minaama assi'rate ha'rinsko .....yinanni.

**II. Woroonni shiqqino xa'muwara dawaro borreessitine qolle.**

1. Eedisi xiwani
  - A. Gobbate deerrinni may qarra abbanno?
  - B. Maatete deerrinni may qarra abbanno?
2. QAK yaa mayyaatero tittirtine borreesse.
3. Itophiyinke giddo babbaxino qarqarira wedellu horoonsi'ranno kemikaalla woy agatto borreesse.
4. Wedellu kemikaallota woy agatto horoonsirate ikkito hanafannohu may korinniiti?
5. Xagga seerimale seeda yanna horoonsi'ratenni leellitanno maalaatta maati?
6. Yannimale adhamate qarra gargadhinanni gara borreessitine qolle.
7. Itophiyinke giddo moollete reqecci yitino qarqarubba hiikkoreeti?

## QAALLATE TIRO

**Amanama:** mittu mittete ledo amaname siimu xaadooshshe horoonsi'ra.

**Amado:** yaa mittu udiinichi bikka woy udiinichu hanqafino darga yaate.

**Daado:** way lolahanno woy ha'ranno garaati.

**Diiru:** maya beetto wolqatenni adhinanni doogooti.

**Echi Ay Vi:** yaanno su'mi vayresete uynoonni su'ma.

**Eediisi:** yaanno qaali dhibbaho uynoonni su'maati.

**Gaxa:** way dirrira ledo taashshineenna baattote eaa fulimmaa leellitannowaati yaate.

**Gobba saada:** kalaqamu qarqarira kalaqamuni heedhano saadaati.

**Hude:** yaa mitte gobba qansootira jawa sagalete anje heerat ikkitooti.

**Iibbillu jilba:** mitturichi iibbilinna qiindillu geeshsha yaate.

**Ji pi Esse(KRA):** kalqete nooricho saatalaytete mashalaqqe  
horoonsiratenni teessonna addi addi millimillo  
yannatenni xawisanno udiinnichooti.

**Kaarta:** baattonna way biso misiletenni riqimbe woraqatu aana leellinshanni malaateti.

**Kaartu bikkaancho:** baattote aana nooha xeertinye woraqatu aana ajinshe xawinsanni hayyooti.

**Lifinxo:** busullete fulahimaati.

**Millisanno budu dona:** mittu baychinni wole baycho haa'ne hara woy milli assa dandiinanniha woy umisinni milli yaanno donaati.

**Millisannokki budu dona:** baychunni baycho sa'a woy millisa didandaanoho.

**Moolle:** mitte gobbara woy kalqete deerrinni way hasi'nannihura woroonni ikkeleellate ikkitooti.

**Muxxe saada:** mitte gobba giddo calla afantanno saadaati yaate.

**Qelpheephox:** mitturichi bisi geeshshisi ayirrinye yaate.

**Qorophox:** Siimu xaadooshshe assa hooga.

**Renguaje:** xeennu jilba bikkinanni udiinnichooti.

**Riqiwantanno jiro:** aye kalaqamu jiro ikkite wirro higgannotanna umonsa riqiwa dandiitannoreeti.

---

---

**Riqwantannokki jiro:** *aye kalaqamu jiro ikkite umonsanni wirro higge riqiwa dandiitannokkireeti.*

**Seendille:** *mitturichi deerra mitte bixxilenni wole bixxile geeshsha noo fanfeeti.*

**Taalootu teesso:** *mitte uurinsha woy gobba baycho wolu dargi ledo amadisiinse raga kullanni ha'rinshooti.*

**Termomeetire:** *Iibbillu jilba bikkinanni udiinnichootti.*

**Urrinshu teesso:** *hawittotena uurrinshu xuruura horoonsi'ne mittu dargi teesso xawinsanni ha'rinshooti*

**Wolqa:** *mitto looso loosate dandooti.*

